

Dižə' Güen Dižə' Cobə De'en Bzoj San Juannə'

Ben' naquə Xtižə' Diozən' golje' goque' beṇaḅ

¹ Catə' gwxe yežlyonə' bazoczə ben' naquə Dižə'anə'. Zoe' len Diozən' na' ben' naquə Dižə'anə' lecə naque' Dioz.

² Dezd nechte zoe' len Diozən'.

³ Na' Diozən' bene' par niḅ ben' naquə Dižə'an bene' yoguə'əloḷ beṇaḅ, angl, bia chsa'aš, na' yez-iquə'əchlə de'e zjəde. Bitobi bi de de'e gwxe de'e gwzil de'e cui ben le'.

⁴ Le' nse'e yelə' mban zejlicane. Na' beṇə' ca' zjənape' yelə' mban zejlicane, yo'o be'eni' lo'o yichjla'ažda'oga'aque'enə'.

⁵ Na' ben' naquə Dižə'anə' nse'e be'eni' par yichjla'aždao' beṇaḅən'. Na' la'anə'əczə chacchgua de'e malən' yežlyo nga gan' ble'enə', de'e malən' bito chgapə'an be'eni' che'enə'.

⁶ Diozən' bsele'e to beṇə' le' Juan.

⁷ Bide' bedəye'e dižə' che ben' nsa' be'eni'inə' par niḅ yoguə'əloḷ beṇaḅən' guaquə so'onlilaže'e ben' nsa' be'eni'inə' catə' se'enene' xtižə' Juannə'.

⁸ Caguə Juan na'anə' nse'e be'eni'inə', sino bide' bedəye'e dižə' che ben' nsa' be'eni' par beṇaḅən'.

⁹ Babžin ža bla' be'eni' che Diozən' yežlyo nga par šo'on lo'o yichjla'aždao' beṇaḅən', na' chse'eni'in len notə'əteze'.

10 Ben' naquə Dižə'anə' gwzoe' yežlyon'. Na' la'anə'əczə len' bene' yežlyon', beṇə' ca' ža' yežlyon' bito gwsa'acbe'ine' non' naque'.

11 Golje' entr neto' naquəto' beṇə' nasyon che'enə', na' casi yoguə' neto' naquəto' beṇə' nasyon che' bito gwyejle'eto' che'.

12 Con beṇə' chse'ejle'e che', beṇə' chso'onlilaže'ene', chone' par ničh zjənaque' xi'in Dioz.

13 Zjənaque' xi'ine' caguə por ni che gwsa'alje' zjənaque' beṇə' belə' chen, na' caguə por ni che de'en gwzelažə' beṇə' byon' na' no'olə, na' caguə por ni che gone'e beṇə' byon' so xi'ine'. Dioz nan' bene' xi'ine' lega'aque'.

14 Na' ben' naquə Dižə'anə' golje' goque' beṇəch na' gwzoe' len neto'. Ble'ito'one' na' gocbe'ito' de que naque' le'ezelaogüe beṇə' zaque'e la' len' naque' Xi'in tlišə' Xacho Diozən'. Lechguale nži'ilaže'e beṇəchən' na' chzejni'ine' beṇəchən' yoguə'əlol dižə' li che Diozən'.

15 Juannə' bzejni'ine' che' gwne': —Che be'ena'anə' babi'a dižə' gwnia' de que ben' ze'e əchoj zaquə'əche' ca nada', chedə' bazoczə le'enə' antslə ze'e soa' nada'.

16 Na' Xi'in Diozən' laogüe de'en lechguale nži'ilaže'e chio'o, zotezə zoe' chaclenchgüe' yoguə' chio'o chonlilažə'əchone'.

17 De'e Moizezən' bzejni'ine' de'e xaxtao' neto' beṇə' Izrael lei che Diozən', na' Jesocristən' bedəlo'e de que nži'ilažə' Diozən' chio'o beṇəch na' chzejni'ine' chio'o yoguə'əlol dižə' li che Diozən'.

18 Ni to cui nonə' le'i Diozən'. Xi'ine' tlišə'anə' ben' chaquene' chei babzejni'iczene' beṇəchən' can'

naquə yichjla'aždao' Diozən'.

Juan ben' bchoa beṇə' nis be'e dižə' che Jeso'osən'

¹⁹ Beṇə' blao che ṇasyon Izrael cheto'on ža' Jerosalennə' bososele'e balə bχoz lao ben' le Juan len yebalə beṇə' gwsa'aljə lao dia che de'e Lebi beṇə' zjəyo'o lao na'aga'aque' so'one' mendad lo'o yo'odao' əblao che neto' beṇə' Izrael. Bososele'e beṇə' ca' lao Juannə' par nič gosə'ənezene' non' naque'.

²⁰ Na' gože' lega'aque' clar: —Caguə nadan' Cristən' ben' naquən əselə' Diozən' par gaquəlene' ṇasyon che chio'o beṇə' Izraelən'.

²¹ Na' gwse'ene': —¿Noxa le' ža? ¿əšə len' Liazən' ben' be' xtižə' Diozən' cana'?

Na' gože' lega'aque': —Caguə nada'anə'.

Nach gosə'əze'ene': —¿Ešə len' ben' naquən yidə par güe'elene' neto' xtižə' Diozən'?

Na' boži'en gwne': —Bitoczə.

²² Nach gwse'ene': —¿Noxaczə le'? nič žjəyeyežto' beṇə' ca' bososele' neto'. ¿Bi natgo' che cuino'?

²³ Nach gože' lega'aque': —Nada' naca' ben' chṇe zizjo latjə dašən', əṇia': “Le'eyoša' yichjla'ažda'olen' par nič əgwzenagle che Xančon' catə'an yide'enə'”, can' gwna de'e profet Isaiazən' ben' be' xtižə' Diozən' cana'.

²⁴ Na' beṇə' ca' ja'ac lao Juannə' bososele' beṇə' fariseo ca' lega'aque'.

²⁵ Na' gwse'ene': —¿Bixčhen' chcho' beṇə' nis šə cui naco' Cristən', na' šə cui naco' Liazən' na' šə ni ben' naquən yidə par güe'elene' neto' xtižə' Diozən'?

26 Na' Juannə' boži'e xtižə'əga'aque'enə' gože': —Nada' chchoa' beṇə' nis, pero na' entr le'e zo to beṇə' cui nombi'ale.

27 Be'enə' ze'e əchoje' na' zaquə'əche' ca nada' na' bito zaca'a par gaca' xmose'.

28 Yoguə' de'e quinga goquən yež de'en nzi' Betabara. Na' yežən' chi'in yešla'alə yao Jordannə' gan' chchoa' Juannə' beṇə' nis.

Jeso'osən' gwxaquə'əlebene' ca xilə' dao' ca' gwso'ot beṇə' Izrael ca' par gwnitlao xtolə'əga'aque'enə'

29 Beteyo ble'i Juannə' za' Jeso'osən' gan' zoe'enə' na' gože' neto' ža'ato'onə': —Le'e gūiašč nga za' ben' bselə' Diozən' ben' gwxaquə'əlebe ca xilə' dao' bia ca' chotcho par chnitlao xtolə'əchon'. Le'enə' yeque'e xtolə' beṇə'chən' con beṇə' so'onlilažə' le'.

30 Che bengan' bi'a dižə' catə'ən gwnia' de que ben' ze'e əchoj zaquə'əche' ca nada', chedə' bazoczə le'enə' antslə ze'e soa' nada'.

31 Bito gocbe'ida' nada' cate non' naque'. Pero na'a za'a chcho'a beṇə' nis par nič yeziquə'əchlə beṇə' Izrael sa'acbe'ine' non' naque'.

32 Na' Juannə' be'eche' dižə' che Jeso'osən' gwne': —Spirit che Diozən' de'en zo yoban' len Diozən' ble'ida' betjən ca to ngolbexə na' bžinən gwzon len Jeso'osən'.

33 Bito gocbe'ida' nada' non' naque' žalə' que Diozən' ben' bselə' nada' par chchoa' beṇə' nis gwne' nada': “Le'ido' yetj Spirit chia'anə' gan' zo ben' gon ca so Spirit chia'anə' lo'o yichjla'ažda'olen' na' nabi'an le'e. Na' catə' əžin Spirit chia'anə' gan' zo be'enə', son len le'.”

34 Nada' bable'ida' goc can' gwne'enə' na' cho'a dižə' de que bengan' Xi'in Diozən'.

Benə' ca' gosə'anaogüe' Jeso'osən' de'e neche

35 Ža beteyo zecha Juannə' len chopə neto' disipl che'.

36 Na' ble'ine' gwde Jeso'osən', na' gože' neto': —Le'e ggüiašc na' zda ben' bselə' Diozən' ben' gwx-aquə'əlebe ca xilə' dao' bia ca' chotcho par chnitlao xtolə'əchon'.

37 Na' chopte neto' gože' ca' jenaoto' Jeso'osən'.

38 Na' beyechj Jeso'osən' na' ble'ine' banaoto'one'. Na' gože' neto': —¿Bixchen' naole nada?

Na' gožto'one': —Maestr, ¿ga zo'?

39 Nach gože' neto': —Le'e šo'o na' le'ile.

Na' gwyejlento'one' na' ble'ito' gan' zoe'enə', na' bega'anlento'one' do yeto chop or, chedə' ca orən' banaquə' ca do cheda tap.

40 Nada' lena' Ndresə'n benə' bišə' Simon Bedən' beneto' dižə' de'en be' Juannə' na' gwnaoto' Jeso'osən'.

41 Na' Ndresə'n antslə' ze'e gone' bichlə' jəyeni'e Simon biše'enə' na' gože'ene': —Babežaglaoto' Mesiasən'—, zeje dižə' Cristən' ben' gwlej Diozən' par gaquəlene' nasyon Izrael cheton'.

42 Nach Ndresə'n gwche'e Simon biše'enə' gan' zo Jeso'osən'. Na' lao chgüia Jeso'osən' le' gože'ene': —Len' Simon xi'in Jonas. Pero yesə'əsi' benə' le' Sefas—, zeje dižə' Bed.

Jeso'osən' gwleje' Lipən' na' Natanaelən' par əžja'aclene' le'

43 Beteyo Jeso'osən' gwčhoglaogüe'en yeyeje' Galilean', na' bežague' Lipən' na' gože'ene': —Yo'o len nada'.

44 Lipən' naque' beṇə' Betsaida, laž Ndresən' na' laž Bedən'.

45 Nach Lipən' bežague' Natanaelən' na' gože'ene': —Babežaglaoto' ben' bzoj Moizezən' xtiže'e le'e libr ca' gan' leczə bzoje' lein', na' che lecze'en boso'ozoj beṇə' ca' gwso'e xtižə' Diozən' cana'. Len' Jeso'osən' beṇə' Nasaret, xi'in Jwsen'.

46 Na' gož Natanaelən' le': —¿Bat benecho Nasaret na' əchoj beṇə' güen?

Na' gož Lipən' le': —Yo'o nič ənezdə'.

47 Na' catə' Jeso'osən' ble'ine' bachžin Natanaelən' baozə, gwne' che': —Na' za' to beṇə' Izrael gwlaž checho ben' naquə beṇə' güen, na' ni latə'əzə cui naque' beṇə' goxoayag.

48 Na' gož Natanaelən' le': —¿Nac chac nombi'o nada'?

Na' Jeso'osən' gože'ene': —Antslə ze'e əne' Lipən' le', catə'an zecha'o xan yag yixgüionə', ble'ida' le'.

49 Nach Natanaelən' gože'ene': —Maestr, len' naco' Xi'in Dioz. Len' naco' Rei ben' chbezəto' yedəṇabia' neto' beṇə' Izrael.

50 Na' Jeso'osən' gože'ene': —¿Epor ni che de'en gwnia' de que ble'ida' le' xan yag yixgüion' chejli'o de que Diozən' gwleje' nada' par gaquəlena' nasyon chechon' ža? De'e zaquə'əche ca de'e nga ze'e za'ac.

51 Nach Jeso'osən' goze'e neto': —De'e li əchnia' le'e, le'ixejele yoban' gan' zo Diozən' na' angl che' ca' əse'ep se'etje' yežlyo nga gan' zoa', la' Dioz nan' bsele'e nada' golja' beṇəch.

2

Gotà' to yelà' gošagna' yež de'en nzi' Cana

¹ Gwde šonə ža nach gotà' to yelà' gošagna' yež de'enə' nzi' Cana distrit che Galilea, na' gwyej xna' Jeso'osən'.

² Na' leczə gwsa'axe' Jeso'osən' len neto' disipl che' nič gwyejto' gan' chac yelà' gošagna'anə'.

³ Na' caguə goque binon' par əse'ej yoguə' beṇə' ca' ža'anə'. Nach xna' Jeso'osən' gože'ene': —Bito bi bino dech čhega'aque'.

⁴ Na' gož Jeso'osən' le': —Nagüe, čbixchen' chi'o nada' ca'? Ze'e əžin or gaquəlena' beṇə' quinga.

⁵ Na' xne'enə' gože' beṇə' ca' chso'on mendadən': —Le'e gon bitə'atezə de'e əne'.

⁶ Na' nitə' xop yej ga chož nis. Yej ca' zjənac ca' choso'ochin beṇə' Izrael gwlaž čheto' ca' par chsa'a chəsə'əyib cuinga'aque' segon can' na lei čheto'onə'. Na' to to yej ca' chožən do xon' che'e o do ši che'e nisən'.

⁷ Na' gož Jeso'osən' beṇə' güen mendad ca': —Le'e yosša' yej ca' nisən'.

Na' gosə'əgue'en xte ca gosə'əža'an.

⁸ Nach goze'e lega'aque': —Le'e gašə' latə'an ṇa'a, na' le'e žjənežjon' be'en chgüe'ej chguaon'.

Nach gwsa'aše'en jəsə'ənežjue'en be'en chgüe'ej chguaon'.

⁹ Na' bnix be'en nisən' banaquən bino, pero bito gwnezene' ga gwza'anṇə', con beṇə' ca' gwsa'ašə' len na' zjəneze. Nach goxe' ben' chšagna'anə'

¹⁰ na' gože'ene': —Yoguə' beṇə' chdie' zgua'atec bino šao', na' catə' beṇə' ca' ža'anə' bazjəne'eje'

zilən', nach cho'e lega'aque' de'e corrient. Pero na' le' bzago'o bino šao' nga xte ņa'ach.

11 De'e nga ben Jeso'osən' Cana distrit che Galilean' goquən milagr nech de'en bene' par blo'e de que nse'e yelə' guac che Diozən'. Na' neto' disipl che' benlilažə'əto'one'.

12 Gwde na' gwyejto' Capernaum len le' na' len xne'enə' na' beṇə' biše'e ca'. Na' jəsoto' na' to chopə šonə ža.

Jeso'osən' bebeje' beṇə' ca' chso'on ya'a chyo'o yo'odao' əblaonə'

13 Na' bazon galə' lni pascw che neto' beṇə' Izrael catə'an gwyejto' len Jeso'osən' Jerosalennə'.

14 Catə' bžinto' chyo'o yo'odao' əblao che neto' beṇə' Izrael na' ža' beṇə' chəsyə'əyotə' go'on na' xilə' na' ngolbexə, na' len beṇə' ca' zjəchi' choso'oše'e mech.

15 Nach Jeso'osən' bene' to sot de do na' bebeje' yoguə'əloḷ beṇə' ca' ža' chyo'o che yo'odao' əblaonə' len xilə' ca', len go'on ca'. Na' beslase' xmech beṇə' goša' mech ca', na' gwlo'oni'ane'e mes chega'aque' ca'.

16 Na' gože' beṇə' ca' chso'otə' ngolbexən': —Le'e yebej yoguə'əloḷ bia quinga nga. Cui gonle ya'a nga liž Xa'anə'.

17 Nach jəyeza'alažə' neto' disipl che' can' nyoj Xtižə' Diozən' gan' nan: “De'e tant chi' yichja' che ližo'onə' xte cheyožlaža'a.”

18 Na' beṇə' ca' zjənaquə beṇə' blao che nasyon Izrael cheto'on ža'anə' gwse'ene': —¿Bi yelə' guac əgwlo'ido' neto'onə' par nič ənezeto' šə napo' yelə' gwnabia' par bebejo' beṇə' ca'?

19 Na' Jeso'osən' gože' lega'aque': —Le'e yochinj yo'odao' nga na' šonə žazə yeyona'an.

20 Nach beṇə' blao ca' gwse'ene': —Xopeyon iz gwso'one' yo'odao' nga, ɷəna' le' yeyono'on šonə žazə?

21 Pero Jeso'osən' gwne' ca' che cuerp che'enə', chsa'acquə'əlebene'en ca yo'oda'onə'.

22 Nach catə' bžin ža bebane' ladjo beṇə' guat ca', neto' disipl che' jəyeza'alažə'əto' can' gwne'enə'. Na' gwyejle'eto' can' na Xtižə' Diozən' de'en nyojən de que Jeso'osən' yebane' ladjo beṇə' guat ca', na' lecəə gwyejle'eto' de'en gože' neto'.

Jeso'osən' nezene' bin' yo'o lo'o yichjla'aždao' beṇəchən'

23 Žlac gwzo Jeso'osən' Jerosalennə' lao lni pascon', beṇə' zan gwso'onlilaže'ene' catə' besə'əle'ine' miłagr ca' de'en bene'.

24 Pero na' Jeso'osən' bito ben cuine' lao na' beṇə' ca' chedə' baṇeze nle'ine' yichjla'aždao' beṇəchən'.

25 Na' bito byažjene' no əgwzejni'i le' can' naquə yichjla'aždao' beṇəchən' chedə' le' nezene' bin' yo'o lo'o yichjla'aždao' to toe'.

3

Jeso'osən' na' ben' le Nicodemo

1 Na' zo to beṇə' fariseo ben' le' Nicodemo. Na' naque' beṇə' blao che nasyon Izrael cheton'.

2 Nicodemon' gwyeje' lao Jeso'osən' še'elə na' gože'ene': —Maestr, nezeto' de que Diozən' bsele'e le' par chzejni'ido' neto', chedə' la' notono no chac gon ca naquə miłagr ca' chono' šə cui zo Diozən' len le'.

3 Na' gož Jeso'osən' le': —De'e li əchnia' le' šə non' cui galjə yeto bito gaquə soe' ca ŋabia' Diozən' le'.

4 Nach gož Nicodemon' le': —¿Nacxa gon to beṇə' galje' šə banaque' beṇə' golə? ¿Eguaquəch yeyo'e lo'o le'e xne'e na' galje' yeto?

5 Nach gož Jeso'osən' le': —De'e li əchnia' le', šə non' cui galjə len nis na' len Spirit che Diozən', bito gaquə soe' ca ŋabia' Diozən' le'.

6 Beṇə' zjənaque' belə' chen chəsə'əzan chəsə'əbeque' xi'inga'aque' leczə bi'i belə' chen. Beṇə' ca' chon Spirit che Diozən' par nič chsa'alje', Spiritən' chnežjon lega'aque' yelə' mban zejlicane.

7 Bito yebando' can' gwnia' le' de que chonən byen galjə yoguə'əle yeto.

8 Ca naquə be'enə' de'en chechj, gatə'ətezə chene'en chechjən, na' chendo' cholən, na' nic nezdə' gaxa za'annə' na' nic nezdə' gaxa šejənṇə'. Can' naquən che yoguə'əloł beṇə' chon Spirit che Diozən' par nič chsa'alje'.

9 Nach Nicodemon' gože'ene': —¿Nacxa chactguan' par chac can' na'onə'?

10 Na' Jeso'osən' gože'ene': —Le' naco' beṇə' blao entr beṇə' ca' choso'osed choso'olo'i beṇə' Izrael gwlaž checho ca' xtižə' Diozən', ¿əna' cui chejni'ido' de'e ngan'?

11 De'e li əchnia' le', de'e nezeto'onə' chyixjue'eto' na' de'e bable'ito'onə' cho'eto' dižə' chei, na' cui chzenagle.

12 De'en chac yežlyo ngan' bagwnia' le'e na' cui chejle'ele. ¿Nacxa gaquən' šejle'ele šə nia' le'e de'en chac yoban'?

13 Ni to beṇə' cui zo yežlyo nga beṇə' babeyep yoban' par nezene' can' chac yoban'. Pero ca naca'

nada' ža, gwzoa' yoban' len Diozən' na' bsele'e nada' yežlyo nga par golja' beṇach, na' zotezə zoa' len Diozən' ben' zo yoban'. De'e na'anə' ŋezda' can' chac yoban'.

¹⁴ Na' can' gwlis de'e Moisezən' bel de bronsən' to le'e yag latjə dašən', can' cheyalə' yesə'alise' nada' to le'e yag, nadan' bselə' Diozən' golja' b'enach.

¹⁵ Na' gaquə chia' ca' par ničh notə'ətezə beṇə' gonlilažə' nada' bito cuiayi'e, sino gatə' yelə' mban zejlican che'.

Chaque Diozən' che beṇachən'

¹⁶ Lechuale chaque Diozən' che chio'o beṇach na' beṇ Xi'inə' tlišə'ənə' par ničh na' notə'ətezcho chonlilažə'əchone' bito cuiayi'icho mas de yelə' mban zejlicane checho.

¹⁷ Diozən' bsele'e Xi'inən' yežlyo nga caguə par ničh əchoglaogüe'en che chio'o beṇach de que napcho dolə', sino par ničh gone' ca cui yeyejcho lao yi' gabilən'.

¹⁸ Chio'o chonlilažə'əcho Xi'in Diozən' bach nchoglaon checho de que bito bi dolə' napcho, pero beṇə' cui chso'onlilažə' le' nchoglaon čhega'aque' de que zjənapə' dolə' čhedə' bito chso'onlilažə'e Xi'in tlišə' Diozən'.

¹⁹ Can' chac, beṇə' ca' cui chso'onlilažə' le' ban-choglaon čhega'aque' de que zjənapə' dolə', por ni che de'en babidə Xi'in Diozən' yežlyon' nse'e be'eni' par yichjla'aždao' beṇachən', na' chəsya'əbeichene' de'e žcholən' cle ca be'eni' che'enə' čhedə' chso'one' de'e malən'.

²⁰ Beṇə' ca' chso'on de'e malən' chəsə'əgue'ine' be'eni' che'enə', na' bito chse'enene' əgwse'eni'in

lo'o yichjla'ažda'oga'aque'enə', chedə' bito chse'enene' la'alaon de que de'e malən' chso'one'.

21 Caguə ca' chio'o chzenagcho che dižə' li che Diozən' par choncho can' cheyalə' goncho. Chio'o cho'echo latjə chse'eni'in lo'o yichjla'ažda'ochon' chedə' chene'echo goncho ca sa'acbe'i beṇə' de que Diozən' chaclene' chio'o len bi de'en chonchon'.

Juan ben' bchoa beṇə' nis be'e dižə' che Jeso'osən' de'e yoblə

22 Gwde na' neto' disipl gwyejto' len Jeso'osən' yež dao' ca' zjəchi' gan' mbane Jodean'. Na' žlac bega'antə'onə' Jeso'osən' bene' par ničh neto' bchoato' beṇə' nis.

23 Na' Juannə' leczə chchoe' beṇə' nis yež de'en nzi' Enon de'en chi' galə'əzə yež Salim, gan' dechgua nis. Na' ja'ac beṇə' na' gosə'əchoe' nisən'.

24 Cana' bitonə' gatə' Juannə' ližyan'.

25 Na' gotə' to bžəš entr disipl che Juannə' na' entr yeto chopə beṇə' Izrael gwlaž cheto' ca' che de'en chəsə'əchoe' beṇə' nis.

26 Na' disipl che Juannə' ja'aque' laogüe'enə' na' gwse'ene': —Maestr, ben' gwzo len le' yešla'alə yao Jordannə', ben' cho'o xtiže'e, le' bachchoe' beṇə' nisən' na' yoguə'əzə beṇə' chja'ac ga'an zoe'enə'.

27 Nach Juannə' gože' lega'aque': —Notono no əye'elao' šə cui gon Diozən' par ničh so'elao' beṇə' le'.

28 Le'e nezele can' bagwnia' de que bito naca' nada' Cristən' ben' bselə' Diozən' par gaquəlene' nasyon chechon'. Nada' naca' ben' bselə' Diozən' par cho'a xtižə' Cristən' ničh nitə' beṇə' probnid par yoso'ozenague' che' catə'an yide'enə'.

29 Catə' chəsə'əšagna' beṇə', beṇə' byo ben' chšagna' le'enə' chzi'e no'olən'. Na' beṇə' migw che ben' chšagna'anə', zeche' cuite'enə' chebeichgüeine' chenene' chšil ben' chšagna'anə'. Ca'aczən' chac len nada' ža, lechguale chebeida' de'en chso'elao' beṇə' Cristən'.

30 La' le'enə' cheyalə' šejəchlə gaque' beṇə' blaο; pero ca naquə nada', šejəchlə te chia'.

Ben' za' gan' zo Diozən'

31 Ca naquə ben' za' gan' zo Diozən', le' naque' blaοch ca notə'ətezəchlə beṇə'. Na' ca naquə notə'ətezəchlə beṇə' ža' yežlyo nga, be'en che yežlyo nga zjənaque' na' xtižə' yežlyo ngan' chso'e. Pero na' ben' za' gan' zo Diozən', le' naque' beṇə' blaοch ca notə'ətezəchlə beṇə'.

32 Le' cho'e dižə' che de'en bable'ine' gan' zo Diozən' na' che de'en babenene' na', na' notono no chzenag xtiže'enə'.

33 Na' šə non' choso'ozenag xtižə' ben' za' gan' zo Diozən' choso'olo'e de que zjənezene' Diozən' cho'e dižə' li.

34 Na' Xi'in Diozən' ben' bsele'enə' cho'e xtižə' Diozən' chedə' Diozən' chone' par nič zotezə zo Spirit che'enə' len le' dote tyemp.

35 Diozən' chaquene' che Xi'ine'enə' na' babene' ca chejni'ine' yoguə'əlol par nič le' əgwzejni'ine' benəchən'.

36 Na' chio'o chonlilažə'əcho Xi'in Diozən' de yelə' mban zejlicane checho. Na' beṇə' ca' chso'onczə yichjlaoga'aque' cui chso'onlilaže'ene', bito gatə' yelə' mban zejlicane chega'aque' sino yesə'əzi'e castigw zejlicane.

4

Jeso'osən' be'e dižə' len to no'olə Samaria

¹ Na' beṇə' fariseo ca' gwsa' acbe'ine' de que beṇə' zanch jəsə'ənaogüe' Jeso'osən' cle ca Juannə' na' de que beṇə' zanch chḥoe' nis cle ca Juannə'.

² Pero caguə cuin Jeso'osən' bḥoe' lega'aque' nis sino neto' disipl che' bḥo'ato' beṇə' nis.

³ Na' ca naquən' gwneze Jeso'osən' can' bagwsa' acbe'i beṇə' fariseo ca' de que beṇə' zan zjəsə'ənao le' nach beza'ato' distrit che Jodean' na' beyejto' distrit che Galilean'.

⁴ Par bežinto' Galilean' bedeto' distrit che Samaria na'alə.

⁵ Ca' goquən' bežinto' to yež de'e nzi' Sicar distrit che Samarian'. Naquə yežən' galə'əzə len yežlyon' de'en bnežjw de'e Jacobən' de'e xi'ine' Jwsen'.

⁶⁻⁸ Na' žia to pos na' de'e nzi' “Pos che de'e Jacobən’”. Jeso'osən' baḥ chjḥaque'ene' ngüe'e nezən' na' gwchi'e cho'a posən'. Baḥ naquə ca do gobiž. Na' neto' gwyejto' lao' yežən' par si'ito' de'e gaoto'. Na' bžin to no'olə Samarian' par güe'e nis, na' Jeso'osən' gože'ene': —Doa' latə' nis ye'eja'.

⁹ Na' no'olə Samarian' gože'ene': —¿Nactecxan' le' naco' beṇə' Izrael chṇabdo' nada' nis ye'ejo'? len no'olə Samaria nada'—. (Ca naquə beṇə' Izrael gwlaž cheto' ca' bito chəsə'əne' beṇə' Samaria ca'.)

¹⁰ Na' Jeso'osən' gože'ene': —Žalə' nezdə' de'en chene'e Diozən' goṇe' le' na' žalə' chacbe'ido' non' naca' nada' chapa'a le': “Doa' latə' nis ye'eja'”, le' əṇabdo'on nada' na' nada' goṇa' le' nis de'e chon yelə' mban zejlicane.

11 Na' no'olən' gože'ene': —Señor, caguə noxo'o bi gašə'ədo'onnə' na' pos nga naquən zitjw. ¿Gaxa si'o nis de'en choŋ yelə' mban zejlicane de'en nao' ca'?

12 ¿Echacdo' de que zaquə'əcho' le' ca de'e xaxta'ocho Jacobən' ben' bocua'an len neto' pos nga ga güe'ejə' na' xi'ine' ca' na' bia yixə' che' ca'?

13 Na' gož Jeso'osən' le': —Notə'ətezə beŋə' ye'ej nis nga bia'aczə əbiləchene'en de'e yoblə.

14 Pero na' notə'ətezə beŋə' ye'ej nisən' de'en əgwnežjua' nada' cuatəch əbilene'en la' gatə' yelə' mban zejlicane che'enə'. Na' nis de'en əgwnežjua'ane' gaquən lo'o yichjla'aždaogüe'en ca to nis de'e chxitə' chžia chaldin na' de'e cuat yebižən.

15 Na' no'olən' gože'ene': —Señor, beŋ nada' nisən' nao' ca' par niç cuich əbilda' na' cuich yida' dexia'an nga.

16 Jeso'osən' gože'ene': —Beyej jəyene be'en çio'onə' na' le'e da nga.

17 Nach gož no'olən' le': —Notono be'en çhia' zo.

Na' gož Jeso'osən' le': —Leiczədo' can' nao' de que notono be'en çio' zo,

18 la' gueyə' be'en çio' bagwnitə' beŋə' nšagna'aleno', na' ca naquə ben' zoleno' ŋa'a caguə nšagna'aleno'one'enə'. De'e li can' bagwnao'.

19 Na' gož no'olən' le': —Señor, bachache'ida' de que le' chyixjue'ido' bi de'en na Diozən'.

20 De'e xaxta'o neto' beŋə' Samaria gwso'elaogüe'e Diozən' ya'an zo na', na' le'e nale de que Jerosalen na'anə' cheyalə' güe'ela'ocho Diozən'.

21 Na' gož Jeso'osən' le': —No'olə, gwyejle' çhia' de que gwžin ža catə' bitoch gonən byen žje'ela'ole Xacho Diozən' ya'an zo na' na' ni Jerosalennə'.

22 Le'e nacle beṇə' Samaria bito nombia'ale ben' chejṇi'alažə'əle. Neto' beṇə' Izrael nombi'ato' Diozən' ben' chejṇi'alažə'əto'. Na' entr neto' beṇə' Izrael əchoj ben' chac yebej beṇəchən' xni'a de'e malən'.

23 Gwžin ža na' na'a baza'an beṇə' ca' chse'ejṇi'alaže'e Xacho Diozən' can' chazlāže'ene' əso'elaogüe'ene' do yichj do lažə'əga'aque' na' segon de'en naquə de'e li, chedə' Xacho Diozən' chyilje' beṇə' əso'elao' le' ca'.

24 Diozən' bito naque' beṇə' belə' chen. Na' beṇə' ca' chse'ejṇi'alaže'e le' cheyalə' so'elaogüe'ene' do yichj do lažə'əga'aque' na' segon de'en naquə de'e li.

25 Na' gož no'olən' le': —Nezda' de que yidə ben' gwlej Diozən' par gaquəlene' chio'o, ben' nzi' Mesias o Crist. Catə' yide' na' chixjue'ine' chio'o yoguə'əloj de'e quinga.

26 Nach Jeso'osən' gože'ene': —Nada'an naca' ben' nao' ca' na' cho'elena' le' dižə'.

27 Na' lei cho'elene' no'olən' dižə' catə' bežin neto' disipl che'. Na' bebaneto' de'en cho'elene' to no'olə dižə' pero ni toto' cui gwṇabeto'one' bi dižə'an cho'elene' no'olən' o bixchen' chšillene'ene'.

28 Nach no'olən' bcua'aṇ che'e che'ene' na' beyeje' yežən' jəyeže' beṇə' gwlaž che'ca':

29 —Leda legüia to beṇə' bagwne' nada' yoguə'əte de'en babena'. ĩšə bengalizən' Cristən'?

30 Na' besə'əžaše' yežən' ja'aque' gan' zo Jeso'osən'.

31 Žlac zjəyeda no'olən' gotə'əyoito' Jeso'osən' che'eto'one': —Maestr, gwdao.

32 Na' Jeso'osən' gože' neto': —Bito nezele de to yelə' guao chia'.

33 Nach gwnato' entr neto': —¿Šə nolizə babe-degua' de'e gwdaogüe'enə'?

34 Na' gož Jeso'osən' neto': —Par nada' naquən ca to yelə' guao chona' can' chene'e ben' əbselə' nada' nič gaquə yoguə' de'en chene'ene' gaquə.

35 Le'e nale: “Ne'e dech yetap bio' par yedobə cwsešən'.” Na' nada' əchnia' le'e, de yeto cwseš de'e cheyalə' yedobə, beṇə' ca' yoso'ozenag che Diozən' šə güe'elenchga'acchone' xtiže'enə'. Legon xbab de que bagolə' gatə'əyoiga'aquechone' yoso'ozenague' che'.

36 Ben' chon par nič beṇə' choso'ozenague' che Diozən' chaclene' beṇə' par nič chəsə'əzi'e yelə' mban zejlicane. Na' Diozən' chone' ca zoe' mbalaz por ni che de'en chaclene' lega'aque'. Can' chac, ben' chyixjui'e xtižə' Diozən' de'e neche na' ben' chon par nič beṇə' choso'ozenague' chei txennə' chəsyə'əbeine'.

37 De'e li can' na dižə'ən de'en de: “Beṇə' yoblən' chaz na' beṇə' yoblən' chelap.”

38 Nada' bač chselə'a le'e ca beṇə' yesyə'əlapə' gan' cui gwso'one' žin. Beṇə' yoblə' bagosə'əyixjui'e xtižə' Diozən' na' le'e gonle par nič beṇə' ca' gwse'enene' xtiže'enə' yoso'ozenague' chei.

39 Na' zan beṇə' ža' lao' yež Sicarən' gan' mbane Samarian' gwso'onlilaže'e Jeso'osən' por ni che de'en gwna no'olən': “Bagwne' nada' yoguə'əte de'e babena'.”

40 Na' catə' besə'əžin beṇə' Sicarən' gan' zoe'enə' gwsa'atə'əyoine' Jeso'osən' yega'aṇe' len lega'aque', na' bega'aṇe' chopə ža.

41 Na' beṇə' zanch gwso'onlilaže'ene' por ni che dižə' de'en be' cuin Jeso'osən'.

42 Na' gwse'e no'olən': —Na'a chonlilažə'ato'one' caguə por ni che de'en gwnao' na'azən' sino por ni che de'en babeneto' cho'e dižə' cuinczəto'. Banəzeto' de que de'e liczə bengan' Cristən' ben' gwlej Diozən' par yebeje' beṇačhən' xni'a de'e malən' con beṇə' se'ejle'e che'.

Jeso'osən' beyone' xi'in to beṇə' blao

43 Na' catə' goc čhopə ža zoto'onə', beza'ato' beyejto' Galilean'.

44 Na' cuin Jeso'osən' bagwnacze' de que beṇə' gwlaž che notə'atezə profet beṇə' cho'e xtižə' Diozən' bito chso'ene' yelə' bala'an na' nic chse'ejle'e che'.

45 Pero na' catə' bežinto' Galilean', beṇə' Galilea ca' besyə'əbeine' na' boso'ozenague' che Jeso'osən' čhedə' leczə lega'aque' ja'aque' Jerosalennə' par lni pascon' na' besə'əle'ine' yoguə' de'e güen de'en bene' bedote lao lṇinə'.

46 Na' gozejto' len Jeso'osən' yetši'i yež Canan' distrit che Galilean' gan' bene' par ničh beyac nisən' bino. Na' yež Capernaunnə' zo to beṇə' blao beṇə' chon žin che rein' na' chacšenchgüei xi'in'e'enə'.

47 Xa bi'inə' catə' benene' rson bežinto' Galilean' zeza'ato' Jodean', bide' lao Jeso'osən' na' gotə'əyoine' le' šeje' žjəyeyene' xi'in'e'enə', čhedə' bazon gatbo'.

48 Na' Jeso'osən' gože'ene': —Šə cui le'ile miłagr na' bichlə de'e zaquə' yebanele, bito šejle'ele chia'.

49 Nach ben' chon žin che rein' gože' le': —Señor, yo'ošga antslə cuiṇə' gat bi'i chia'anə'.

50 Na' Jeso'osən' gože'ene': —Beyej. Bito gat bi'i čchio'onə'.

Nach gwyejle' be'enə' de'en gož Jeso'osən' le' na' beze'e.

⁵¹ Na' lao bazengüe'e nezən' jəsə'əšag xmoše' ca' le' na' gwse'ene': —Bacheyaque bi'i chio'onə'.

⁵² Nach gwṇabene' lega'aque' bi or gwzolao beša'alažə'əbo'. Na' lega'aque' gwse'ene': —Neje cheda to gobiž bechojbo' de'e lan'.

⁵³ Nach xabo'onə' gocbe'ine' or na'anə' gož Jeso'osən' le' de que bito gat bi'i che'enə'. Nach benlilaže'e Jeso'osən', le' na' family che'enə' na' yoguə' beṇə' ža' liže'enə'.

⁵⁴ De'e nga goc chop las ben Jeso'osən' miḷagr catə' ze'e beze'e Jodean' na' bežine' Galilean'.

5

Jeso'osən' beyone' to beṇə' nat to part cuerp che'enə'

¹ Gwdenə' golə' to lni che neto' beṇə' Izrael Jerosalennə' na' gwyej Jeso'osən'.

² Jerosalen na' žia to tanc de'en nzi' Betesda dižə' ebreo. Žian galə'əzə cho'a puert che syodan' de'en nzi' “Che xilə' ca”. Na' nyechj mbi'i cuit cue'ej tanquən' gueyə' ca cha'ašil dao'.

³ Na' beṇə' zan beṇə' güe' zjəde' lo'o cha'ašil da'onə', no beṇə' lchol, beṇə' coj, na' no beṇə' zjənat to part güejə cuerp chega'aque'enə'. Zjədie' chəsə'əbeze' batə'əquən' ta nisən'.

⁴ To angl betje' tgüejə bte' nisən', na' con beṇə' chyobe chetj lo'o nisən' catə'an cheyož chta anglən' len, le'enə' cheyaque che bitə'ətezə yižgüe' de'e che'ine'.

⁵ Na' entr beṇə' ca' len to beṇə' byo bagoc ši'inšoṇəchoa iz chacšenene'.

6 Na' Jeso'osən' ble'ine' be'enə' na' gocbe'ine' de que bagwža de' ca'. Na' gože'ene': —¿Eche'endo' yeyacdo'?

7 Na' beṇə' güe'enə' gože'ene': —Señor, caguə no beṇə' zo cue'e nada' lo'o tanquən' catə'an chda nisən'. Na' žlacte əzya'a nada' par šo'a, beṇə' yoblə chyobene' chetje' lo'o nisən'.

8 Nach gož Jeso'osən' le': —Gwyas na' botobə xta'onə' na' gwda.

9 Na' le'e beyactei be'enə' na' botobe' xte'enə' na' gwzolao chde'. Goc de'enə' ža dezcanz.

10 Nach beṇə' blao che neto' beṇə' Izrael gwse'e ben' beyaquen': —Ža dezcanz ṇa'a. Bito de lsens yeyoa' xta'onə'.

11 Nach gože' le'ega'aque': —Ben' beyone nada' gože' nada': “Botobə xta'onə', beyoa'an na' gwda.”

12 Na' gwse'ene': —¿Noxan' gož le': “Botobə xta'onə' na' gwda”?

13 Na' ben' beyaquene' bito ṇezene' non', chedə' Jeso'osən' babebi'ize'e gan' ža' beṇə' zan ca'.

14 Gwdechlə bedil Jeso'osən' le' lo'o yo'odao' əblaonə' na' gože'ene': —Bač beyacdo' ṇa'a. Bitoch bi de'e mal gono' par nič cui gac chio' to de'e maləch.

15 Nach beza' be'enə' na' gwduxjue'ine' beṇə' blao che ṇasyon Izrael cheto'on de que Jeso'os na'anə' beyone le'.

16 Na' de'e na'anə' beṇə' blao ca' bosolagzejə bosolagzide' Jeso'osən' chəsə'əyiljlaže'e naclən' so'one' par so'ote'ene' de'en bene' milagr ca' ža dezcanzən'.

17 Na' Jeso'osən' gože' le'ega'aque': —Xa'anə' chelalene' yoguə' ža, na' leczə ca' nada'.

18 Nach beṇə' blao che nasyon cheto'on mazəchlə gosə'əyiljlaže'e naclən' so'one' par so'ote'ene' por ni che de'en gwne' de que Diozən' naquə Xe', caguə tlaozə de'en cui bembə'ane' ža dezcanz na'anə'. Na' de'en gwne' de que Diozən' naque' Xe' zejen de que tozəczə can' zaque'e len Diozən'.

Yelə' chnabia' che Xi'in Diozən'

19 Na' gož Jeso'osən' lega'aque': —De'e li chnia' le'e, bito gaquə bi gona' to gwłazza', nadan' naca' Xi'in Diozən'. De'en chle'ida' chon Xa'anə', lenṇə' chona'. Yoguə'əlol de'en chon Xa'anə', lecəə lenṇə' chona'.

20 Xa'anə' chaquene' chia', na' chlo'ine' nada' yoguə' de'en chon cuine'. Na' əgwlo'ine' nada' de'e zaguə'əch ca de'e quinga de'e gona' par ničh yebanele.

21 Xa' Diozən' chbeje' beṇə' na' chone' ca chatə' yelə' mban zejlicane chega'aque' par ničh cui əsa'aque' ca beṇə' guat len yichjla'ažda'oga'aque'enə'. Na' ca'aczən' chona' nada' naca' Xi'ine', chbeja' beṇə' par chnežjua' yelə' mban zejlicane chega'aque'.

22 Bito chchogłao Xa' Diozən' che ni to beṇə' šə nape' dolə', sino babene' nada' yelə' chnabia'anə' par əchogłaoğua'an che beṇəchən' šə non' napə dolə'anə', nadan' naca' Xi'ine'.

23 Xa' Diozən' chene'ene' de que yoguə'əlol beṇə' so'one' nada' yelə' bala'an can' chso'e le' yelə' bala'an. Ben' cui chon nada' naca' Xi'in Dioz yelə' bala'an, lente Xa' Dioz na'anə' cui cho'e yelə' bala'an, chedə' len' bsele'e nada'.

24 De'e li chnia' le'e, ben' chzenag xtiža'anə' na' chonlilaže'e Diozən' ben' əbselə' nada' de yelə'

m̄ban zejlicane che'. Na' cuat si'e castigon', chedə' bitoch naque' len yichjla'aždaogüe'en ca beṇə' guat, sino bade yelə' m̄ban zejlicane che'.

25 De'e li chnia' le'e gwžin ža catə'an beṇə' ca' zjanaque' len yichjla'ažda'oga'aque'enə' ca beṇə' guat əse'enene' xtiža'a nada' Xi'in Dioz, na' beṇə' ca' yoso'ozenag chia' yesə'əbane' zejlicane. Na' bačh chzolao chac ca' na'a.

26 Xa' Diozən' nse'e yelə' m̄ban zejlicane na' chac gwnežjue'en beṇačən', na' ca'aczə babene' par ničh nada' nsa'a yelə' m̄ban zejlicanen' na' chac chnežjua'an che beṇačən', nadan' naca' Xi'ine'enə'.

27 Na' leczə beṇe' nada' yelə' chnabia'anə' par ničh əčhoglaogua'an non' napə dolə' chedə' bsele'e nada' golja' beṇačh.

28 Bito yebanele de'e nga. Gwžin ža catə' yoguə'əloḷ beṇə' guat ca' ža' lo'o ban' əse'enene' ənia' lega'aque'.

29 Na' beṇə' ca' gwso'on de'e güen žlac gosə'əbane' yesyə'əchoje' par yesə'əbanche' zejlicane. Na' beṇə' ca' gwso'on de'e mal žlac gosə'əbane' yesyə'əchoje' par əsa'aque' castigw.

Jeso'osən' bzejni'ine' de que nape' yelə' chnabia'

30 Bito bi gaquə gona' de'e bia'azəlaža'a. Chzenaga' bin' na Xa'anə' par ničh nezdə' naquən' chčhoglaogua'an che beṇačən' šə non' napə dolə'. Na' chčhoglaogua'an che to toe' can' cheyalə'əczə gaquə chedə' bito chona'an de'e bia'azəlaža'a. Chona'an con can' chene'e Xa'anə' ben' əbselə' nada'anə'.

31 Žalə' toza' nada' cho'a dižə' non' naca', bito naquən de'e šejle'ele chia'.

32 Pero zo Xa'anə' cho'e dižə' non' naca', na' nezda' de que dižə' de'en cho'e chia'anə' naquən de'e li.

33 Bač bselə'əle beṇə' lao Juannə' par jəsə'əṇabene' le' chia'. Na' Juannə' be'e dižə' li non' naca'.

34 Pero ca naca' nada' bito chyažjda' ənezda' dižə' de'e güe' ni to beṇačən' chia'. Parzə nič le'e šejle'ele chia' na' gona' ca cui yeyejle lao yi' gabilən', de'e na'anə' che'enda' yosa'alažə'əle de'en gwna Juannə' chia'.

35 Juannə' goque' ca to lampara de'e chse'eni'ichgua, na' gone'ele bebeile šlož can' bsd əblo'ine'enə'.

36 De to de'e cho'en xtiža'a de'e zaquə'əche ca dižə' chia' de'en choe' Juannə'. Nada' chona' yoguə'ələl de'en chon Xa'anə' lao na'a gona', na' de'en chona' cho'en dižə' de que le'enə' bsele'e nada'.

37 Na' leczə Xa'anə' ben' bselə' nada' cuine' babe'e xtiža'a. Na' bitonə' gwzenagle xtiže'enə' nic ņe'e le'ile can' naque'enə'.

38 Bitonə' gone chele xtiže'enə' chedə' bito chonlilažə'əle nada' naca' ben' əbsele'enə'.

39 Chsedyaṇə'əle Xtižə' Diozən' de'en nyojən, chaquele napple yelə' mban zejlicane laogüe de'en chsedlen. Na' de'e ca' zjənyojən chso'en xtiža'a.

40 Pero cui chene'ele gonlilažə'əle nada' par gaple yelə' mban zejlicane.

41 Par nada' bito bi nonən šə beṇačən' so'oṇe' nada' yelə' bala'aṇ o šə cui.

42 Nada' nombi'a le'e na' nezda' cabi chaquele che Diozən'.

43 Xa'anə' bsele'e nada' na' beṇe' nada' yelə'

chnabia' par chona' con can' ne'enə' na' cabi chejle'ele chia'. Na' šə beṇə' yoblə yide' to gwłazze', gwyejle'ele che'.

⁴⁴ Bito gaquə šejle'ele chia' chedə' la' chi' yichjle chonle ca so'on ljuežjle ca' le'e yelə' bala'an na' cui cheyiljle naclən' gonle par ničh Diozən' gone' le'e yelə' bala'an. Tozə le'enə' cho'e yelə' bala'an de'en naquə de'e zaqu'e.

⁴⁵ Bito gonle xbab de que nada' gua'a le'e part lao Xa'anə'. De'e Moisezən', ben' zole lez gaquəlen le'e lao Diozən', le'enə' güe'e le'e part lao Xa'anə'.

⁴⁶ Žalə' gwyejle'ele che de'e Moisezən' na' šejle'etele len chia' nada', chedə' chia' nadan' bzoje'.

⁴⁷ Na' ca naquən' cui chejle'e de'en bzoje'enə', ħnacxa gonczle šejle'ele de'en bagwnia' le'e?

6

Jeso'osən' bguaogüe' gueyə' mil beṇə' byo

¹ Gozde de'e ca' gwyejto' len Jeso'osən' yešla'alə Nisdao' Galilean'. Na' nisda'onə' leczə nzi'in Nisdao' Tiberias.

² Na' beṇə' zan bedəsə'ənao le' chedə' besə'ale'ine' milagr ca' de'en chone' cheyone' beṇə' güe' ca'.

³ Na' gwloeto' to lao ya'a len Jeso'osən' na' na' gwche'eto' len le'.

⁴ Na' bazon baozə galə' lni che neto' beṇə' Izrael de'en nzi' lni pascw.

⁵ Na' catə' bgüia Jeso'osən' na' ble'ine' de que baza'ac beṇə' zan gan' zoe'enə', na' gože' Lipən': —Ĥaxa si'icho de'e əsa'o yoguə' beṇə' quinga?

⁶ Jeso'osən' gwne' ca' parzə ničh ye' Lipən' nac chaquene' cheyalə' gonto', la' baṇezczene' naquən' gone'.

7 Na' gož Lipən' le': —Tmil pes cabi gaquen si'icho de'e əsa'ogüe' latə' güejən.

8 Na' zo to disipl che Jeso'osən', ben' le Ndres, bišə' Simon Bedən'. Na' Ndresən' gože' Jeso'osən':

9 —Nga zo to bi'i byo na' de gueyə' yetxtil de sebad chebo' na' yečhopə bel ya'a. Pero bi de gon de'e quinga la' beṇə' zannə'.

10 Nach Jeso'osən' gože' neto': —Le'e gon mendad yesə'əbe' beṇə' ca'.

Chi'ichgua yixye daquə' latjən', nach gosə'əbe' beṇə' ca' laogüeinə'. Naquə ca do gueyə' mil beṇə' byo cui cuent no'olə na' cui cuent bidao'.

11 Nach gwxi' Jeso'osən' yetxtil ca'. Na' beyož be'e yelə' choxcwlen che Diozən' beṇe' che che neto' disipl par be'eto' che beṇə' ca' bazjəchi'. Na' leczə ca'atezəczə bene' len bel ya'a ca'. Be'eto' lega'aque' con catə'ətə' de'e gwse'enene'.

12 Na' catə' beyož gwse'eljene' nach gože' neto': —Le'e yetobə pedas ca' de'en bega'an par nič cui bi cuiayi'.

13 Nach botobəto' pedas ca' de'en besyə'əga'an beyož gwsa'o beṇə' ca', na' goquən šižin žomə lao gueyə' yetxtil de sebadən'.

14 Na' beṇə' ca' catə' besə'əle'ine' miłagr de'en ben Jeso'osən' nach gosə'əne': —De'e liczə bengan' profetən' ben' bagwlezcho selə' Diozən' yežlyo nga par gaquəlene' chio'o.

15 Na' catə' gocbe'i Jeso'osən' de que gwse'enene' yesə'əche'əxəxjene' par so'onene' rei čhega'aque'enə', nach bebi'iže'e gozeje' ya'ada'onə' toze'.

Gwda Jeso'osən' lao nisdə'onə'

16 Na' catə' be_{xjw} že'enə' neto' disipl che Jeso'osən' beyetjto' cho'a nisdə'onə'.

17 Na' beyo'oto' to lo'o barcw par zjəyedato' Capernaunnə'. Bago_l, na' Jeso'osən' bitonə' yele'e gan' zjəyedato'onə'.

18 Na' chas chatə' nisdə'onə' la' to be' fuert che_{chj}.

19 Ca do chopə legw babeza'ato' lao nisdə'onə' catə' ble'ito' zezə' Jeso'osən' lao nisən' galən' zda barcon'. Na' bžebto'.

20 Nach gože' neto': —Nada'anə'. Bito žeble.

21 Nach neto' chebeito' bego'oto'one' lo'o barcon'. Nach le'e bežinteto' cho'a nisdə'onə'.

Be_{nə}' zan chəsyə'əyilje' Jeso'osən'

22 Na' beteyo be_{nə}' ca' besyə'əga'an yeš_{la}alə nisdə'onə' bito besyə'əželene' Jeso'osən'. Gwsa'acbe'ine' caguə bi barcw gotə'əch sino yetoga de'en beyo'oto', na' gosə'ənezene' bito beyo'o Jeso'osən' lo'o barcon' gan' beyo'o neto'.

23 Nach besə'əžin to chopə barcw ca' de'en za'ac syoda de'en nzi' Tiberias, besə'əžinən galə'əzə gan' əgwsa'ogüe' catə'an gwde be' Xancho Jeso'osən' yelə' cho_xcwlen che Diozən'.

24 Na' catə' besə'əle'i be_{nə}' ca' caguə no Jeso'osən' n_{la}'anə', na' ni neto' disipl che', nach besyə'əyo'e lo'o barcw dao' ca' na' ja'aque' Capernaunnə' chesyə'əyilje'ene'.

Jeso'osən' naque' yelə' guao de'e chnezjon yelə' mban zejlica_{ne} che be_{nə}' chso'on_{lila}že'ene'

25 Na' catə' besyə'əželene' Jeso'osən' yeš_{la}alə nisdə'onə' na' gwse'ene': —Maestr, žbatə'əquə' bela'o ngan'?

26 Na' Jeso'osən' gože' lega'aque': —De'e li chnia' le'e, cheyiljle nada' caguə por ni che bagwyejni'ile bi zejen miłagr ca' bable'ile bena', sino por ni che de'en gwdaole na' beljele.

27 Bito cue'e yichjle gonle par ničh gatə' de'e ye'ej gaole de'en chde chei, sino lecue'e yichj le'e gon par ničh gaquə ye'ej gaole de'en gon le'e yelə' mban zejlicane. Diozən' bsele'e nada' golja' benach na' nada' gona' de'en ye'ej gaole par ničh əbanle zejlicane. Na' Diozən' babene' par ničh nezele bsele'e nada'.

28 Na' gwse'ene': —¿Bi cheyalə' gonto' par ničh yebei Diozən' neto'?

29 Na' gož Jeso'osən' lega'aque': —De'e nga gonle par ničh yebei Diozən' le'e, gonlilažə'əle nada' ben' əbsele'enə'.

30 Nach gwse'ene': —¿Bi miłagr gono' par ničh gonlilažə'əto' le'? ¿Bi gono' le'ito' ža?

31 De'e xaxta'ocho ca' gwsa'ogüe' mana latjə dašən', can' nyoj Xtižə' Diozən' nan: “Yelə' guao de'e za' yoban' be'e lega'aque' gwsa'ogüe'.”

32 Nach Jeso'osən' gože' lega'aque': —De'e li əchnia' le'e, caguə de'e Moisezən' bnežjue' lega'aque' yelə' guao de'en za' yoban', sino Xa' Dioz na'anə'. Na' Xa'anə' babselə'e par le'e to yelə' guao de'e zaquə'əche na' de'e li za'an yoban'.

33 Na' yelə' guao de'en babselə' Xa' Diozən', za'an yoban' na' betjən yežlyon' na' chnežjon yelə' mban zejlicane che notə'ətezə benə' chao len.

34 Nach gwse'ene': —Señor, beňšga neto' yelə' guaon' nao' ca' yedote.

35 Na' Jeso'osən' gože' lega'aque': —Nada' naca' yelə' guao de'en chnežjon benə' yelə'

mban zejlicane. Notə'atezə beṇə' chse'ejle' chia' yesyə'abeī la'ažda'oga'aque'enə' zejlicane, na' de'en chso'onlilaže'e nada', nite'e mbalaz zejlicane.

³⁶ Na' bagwniacza' le'e, la'anə'əczə bable'ile nada' naca' yelə' guaonə', bitoczə chonlilažə'əle nada'.

³⁷ Yoguə' beṇə' ca' chbej Diozən' par əsa'aque' nada' txen, chžin ža catə' chso'onlilaže'e nada'. Na' notə'atezə beṇə' ca' chso'onlilažə' nada', chebeida' chsa'aque' nada' txen.

³⁸ Nada' za'a yoban' na' betja' yežlyon' caguə par niç gona' de'e bia'azəlaža'anə', sino par niç gona' can' chene'e Xa'anə' ben' əbselə' nada'.

³⁹ Na' de'e ngan' de'en chene'e Xa'anə' ben' əbselə' nada', de que yoguə'əlol beṇə' bagwleje' par əsa'aque' nada' txen, ni toe' cui gua'a latjə cuiayi'e sino que yosbanga'aca'ane' ladjo beṇə' guat ca' šə bagwsa'ate' catə' əžin ža šo'o fin che yežlyon'.

⁴⁰ Xa'anə' chene'ene' de que yoguə'əlol beṇə' se'ejni'ine' non' naca' nada' na' so'onlilaže'e nada', par niç əgwnežjue' lega'aque' yelə' mban zejlicane, na' nada' yosbanga'aca'ane' ladjo beṇə' guat ca' šə bagwsa'ate' catə'an əžin ža šo'o fin che yežlyon'.

⁴¹ Na' beṇə' blao che nasyon Izrael cheton' besə'əže'eše'e che Jeso'osən' de'en gwne': "Nada' naca' yelə' guao de'en za' yoban'."

⁴² Na' gosə'əne': —¿Ecaguə bengan' Jeso'os xi'in Jwse ben' nombia'acho na' leczə ca' xne'enə'? ¿Bixchexa nga nalize' de que ze'e yoban' betje' yežlyon'?

⁴³ Nach Jeso'osən' gože' lega'aque': —Bito že'ešə'əle chia' entr le'e.

⁴⁴ Ni to cono no gonlilažə' nada' šə Xa'anə' ben' əbselə' nada' cui gone' ca se'ejle'e chia'. Na' beṇə' ca'

chse'ejle'e chia' yosbanga'aca'ane' ladjo beṇə' guat ca' šə bagwsa'ate' catə' əžin ža šo'o fin che yežlyon'.

45 Gan' nyoj de'e ca' boso'ozoj de'e profet ca' beṇə' ca' gwsə'e xtižə' Diozən' cana' nan: "Na' yoguə'əlole' əgwsed əgwlo'i Diozən'." Nachən' yoguə'əloḷ non' neze can' na Xa'anə' na' choso'ozenag che', yoguə' beṇə' can' chso'onlilaže'e nada'.

46 Bito nacho zo nochlə beṇə' bable'ine' Xa'anə' sino toza' nada', la' nadan' za'a gan' zo Xa' Diozən'.

47 De'e li chnia' le'e, beṇə' ca' chso'onlilažə' nada' de yelə' mban zejlicane chega'aque'.

48 Nada' naca' yelə' guao de'en chnežjon beṇə' yelə' mban zejlicane.

49 Xaxta'ocho ca' gwsa'ogüe' manan' latjə dašən', pero bia'aczə gwsa'ate'.

50 Nadan' cho'a dižə' de que naca' yelə' guao de'en za' yoban' de'en chnežjon yelə' mban zejlicane che beṇə' ca' chsa'ogüe'en par nich ca' cuich zjənaque' len yichjla'ažda'oga'aque'enə' ca beṇə' guat.

51 Nadan' naca' yelə' guao de'en za' yoban'. Nsa'a yelə' mban zejlicanenə' na' chac chnežjua'an beṇachən'. De'e na'anə' beṇə' ca' sa'o yelə' guao nga yesə'əbane' zejlicane. Na' yelə' guao de'e əgwnežjua' əsa'ogüe' naquən cuerp chia'anə', na' əgwnežjua'an par nich notə'atezə beṇach guaquə yesə'əzi'e yelə' mban zejlicanenə'.

52 Nach gwche' bžaš entr beṇə' blao che nasyon Izrael cheton' gosə'əne': —¿Nacxa gone'en goṇ cuerp che'enə' gaocho?

53 Na' Jeso'osən' gože' lega'aque': —De'e li chnia' le'e, Diozən' bsele'e nada' golja' beṇach, na' šə

cuiṇə' gaole cuerp chia'anə' na' šə cuiṇə' ye'eje
xčhena'anə', bito de yelə' mban chele zejlicane.

54 Beṇə' ca' chsa'o cuerp chia'anə' na' chse'eje'
xčhena'anə' de yelə' mban zejlicane chega'aque',
na' šə bagwsa'ate' catə' əžin ža šo'o fin che yežlyon',
yosbanga'aca'ane' ladjo beṇə' guat ca'.

55 Na' cuerp chia'anə' naquən yelə' guao de'e
le'ezelaogüe de'e zaque'e, na' xčhena'anə' de'en
chse'eje'enə' naquən le'ezelaogüe de'e zaque'e.

56 Na' beṇə' ca' chsa'o cuerp chia'anə' na'
chse'eje' xčhena'anə' nitə'atezə nite'e len nada'
na' nada' zotezə zoa' len lega'aque'.

57 Xa'anə' ben' zo zejlicane le'enə' bsele'e nada', na'
zoa' chedə' le' chone' ca zoa', na' ca'atezacən' ben'
gao cuerp chia'anə' soe' chedə' gona' ca soe'.

58 Cuerp chia'anə' naquən yelə' guao de'en za'
yoban'. Na' yelə' guao nga bito naquən ca manan'
de'en gwsa'o xaxta'ocho ca' na' bia'aczə gwsa'ate'.
Beṇə' ca' chsa'ogüe' yelə' guao nga nia' ca' nite'e
zejlicane.

59 De'e quinga əbsed əblo'i Jeso'osən' lo'o yo'odao'
Capernaunə'.

*Xtižə' Jeso'osən' chnežjon yelə' mban zejlicane che
beṇə' ca' choso'ozenag chei*

60 Na' beṇə' zan beṇə' ca' zjəsə'ənao Jeso'osən'
catə' gwse'enene' can' gože' lega'aque' nach
gosə'əne': —Zi'ichgua naquə dižə' quinga. ¿Noxaczə
šejle'e che'?

61 Na' gocbe'i Jeso'osən' de que chəsə'əže'eše'e por
ni che de'en gože' lega'aque', na' gozne': —¿Epor ni
che de'en gwnia' can' chene'ele yebiguə'əle gosx-
anlə'?

62 ¿Naquæchxa gonlen' šə le'ile nada' yeyepa' gan' gwzɔa' antslə? nadan' bselə' Diozən' golja' beŋačh.

63 Caguə por ni che de'en goljle beŋačh de yelə' mban zejlicane chele sino šə yo'o Spirit che Diozən' lo'o yichjla'ažda'olen' de yelə' mban zejlicane chele. Dižə' de'en babi'a len le'e zaquə'an par yichjla'ažda'olen' na' əbanle zejlicane šə šejle'ele chei.

64 Ne'e nitə' balle cui chonlilažə'əle nada'.

Jeso'osən' gwne' ca' čhedə' dezd gwzolao zjəsə'ənao beŋə' le' nezene' noquə' beŋə' ca' cui gwso'onlilaže'ene' na' non' əgwde le' lao na' beŋə' ca' chəsə'əgue'i le'.

65 Na' gože' lega'aque': —Chac can' gwnia'anə' de que notono no chac gonlilažə' nada' šə Xa'anə' ben' əbselə' nada' cui chone' par ničh gonlilaže'e nada'.

66 Nach besyə'əbi'izə' beŋə' zan beŋə' bagosə'adalene' Jeso'osən', bitoch gosə'ənaogüe'ene'.

67 Na' Jeso'osən' gože' šižinte neto': —¿Elen le'e chene'ele žjəya'acle?

68 Na' gož Simon Bedən' le': —Xanto', notono nochlə de no zaquə' əgwzenagto' chei. Nezeto' de que le' choŋo' yelə' mban zejlicane che notə'ətezə neto' chzenagto' xtižo'onə'.

69 Neto' bachejle'eto' na' baŋezeto' de que len' naco' Cristən' ben' bagwlej Diozən' par gaquəlene' nasyon chechon'. Naco' Xi'in Dioz ben' zo zejlicane.

70 Na' Jeso'osən' gože' neto': —Nada' gwleja' le'e šižinle na' nežda' de que tole chzenagle che gwxiye'enə'.

71 Gwne' ca' che Jod Iscariotən' xi'in Simonnə' la' Jod nan' əgwdi'ene' lao na' beŋə' ca' chəsə'əgue'i le', len nacte' txen neto' šižinto'.

7

Beṇə' bišə' Jeso'osən' bito gwso'onlilaže'e le'

¹ Catə' bagwde de'e ca' Jeso'osən' gwdacze' chsed chlo'ine' beṇə' ca' ža' distrit che Galilean'. Bito gone'ene' yeyeje' Jodean' par soe' na' chedə' beṇə' blao che nasyon Izrael cheton' chəsə'əyiljlaže'e naclən' so'one' par so'ote'ene'.

² Na' bazon galə'əzə lni che neto' beṇə' Izrael de'en nzi "lni che yo'o de laguə".

³ Na' beṇə' bišə' Jeso'osən' gwse'ene': —Bito yega'ano' nga, sino gwyej Jodean' par ničh disipl chio' ca' ša' na' yesə'əle'ine' de'e ca' chono'onə'.

⁴ Ni to beṇə' cui chone' bgašə'əzə to de'e chone' šə chene'ene' gombia' beṇə' le'. Šə de'e li chono' milagr, ben par ničh yesə'əneze yoguə'əlol beṇə' can' chono'onə'.

⁵ Beṇə' biše'e ca' gosə'əne' ca' chedə' ni lega'aque' cui gwso'onlilaže'e le'.

⁶ Nach gož Jeso'osən' lega'aque': —Bitonə' žin ža par gwlo'a non' naca', pero ca naquə le'e ža, guaquə žja'acle lnin' batə'ətezən'.

⁷ Beṇə' ca' cui zjənombia' Diozən' bito chəsə'əgue'ine' le'e, pero chəsə'əgue'ine' nada', chedə' chzejni'iga'acda'ane' de que chso'one' de'e malən'.

⁸ Le'e žja'ac lninə'. Nada' bito sa'a na'a chedə' bitonə' žin ža chia'anə' par sa'a lnin'.

⁹ Na' beyož gože' lega'aque' ca' bega'ane' Galilean' yeto chopə ža.

Jeso'osən' gwyeje' Jerosalennə' gan' yo'o lninə'

10 Nach gwde gwsa'ac beṇə' biše'e ca' əzja'aque' lṇinə' leczə gwza' le' zde' lṇinə', pero caguə zaquə'əlao sino bgašə'əzə.

11 Na' beṇə' blao che ṇasyon Izrael cḥeto'onə' besyə'əyilje' le' lao lṇinə' na' gosə'əne': —¿Ganxa be'ena'anə'?

12 Na' beṇə' ca' zjənžag lao lṇinə' zane' gwso'e dižə' che Jeso'osən' len ljuežjga'aque'. Na' caguə tozə can' gosə'əne' che'. Bale' gosə'əne': —Naque' beṇə' güennə'.

Na' yebale' gosə'əne': —Abi, chonleizene' beṇə'anə'.

13 Pero ni toe' cui gwso'e dižə' che' zaquə'əlao cḥedə' besə'əžebe' beṇə' blao che ṇasyon cḥeto'onə'.

14 Na' do gašjə zda lṇinə' catə' gwyo'o Jeso'osən' lo'o yo'odao' əblao che neto' beṇə' Izrael na' gwzola' chsed chlo'ine'.

15 Na' chasyə'əbane beṇə' blao ca', chəsə'əne': —¿Bixa chejni'i bengan' len caguə babsede' can' nsed chio'onə'?

16 Nach Jeso'osən' gože' lega'aque': —De'en chlo'ida'anə' caguə de'e chaljəlažə'anə', sino ben' əbselə' nada' blo'ine'en nada'.

17 Notə'ətezə beṇə' chene'ene' gone' can' chene'e Diozən', le' əṇezene' šə de'en chlo'ida'anə' naquən che Diozən' o šə naquən de'e bia'azəlažə'a.

18 Beṇə' ca' chso'e dižə' de'e bia'azəlažə'əga'aque' chasyə'əyilje' no so'e lega'aque' yelə' bala'an. Caguə ca' nada' cḥedə' cheyilja' naclə gona' par nič Diozən' ben' bselə' nada' si'e yelə' bala'an. De'e na'anə' guaquə gaple confyans de que nada' cho'a dižə' li, na' bito chxoayaga' beṇə'.

19 Le'e cho'ela'ole de'e Moisezən' ben' bzoj lei che Diozən', len ni tole cui chonle can' nanñə'. ¿Bixchen' chyiljlažə'əle naclən' gonle par gotle nada'?

20 Na' beñə' ca' zjənžaguən' gwse'ene': —Chac tonto'. ¿No chyiljlažə' naclə gone' par gote' le'?

21 Jeso'osən' gože' lega'aque': —Tozə milagr de'en babena' ža dezcanzən' na' de'e na'anə' yoguə'əle chebanele.

22 De'e Moisezən' bzoje' de que cheyalə' socho seňy de'en ne' sirconsision. Pero caguə gwzolaon len le' sino len de'e xaxta'ocho ca' beñə' ca' gwnitə' antslə ca le'. Na' le'e chzole bi'i byo dao' ca' seňy de'en ne' sirconsision ža dezcanzən'.

23 Na'a ža, šə chaquele chonən byen gwzole no bidao' seňy de'en ne' sirconsision ža dezcanzən' par gonle complir can' na lei de'en bzoj de'e Moisezən', ¿bixchen' chža'ale nada' de'en beyona' to beñə' ža dezcanzən' len yoguə'əloł de'en chac che'?

24 Bito con gonle xbab de que to de'e chle'ile chon beñə' naquən de'e mal, sino le'e co'o rson nič ənezele šə de'e li chone' de'e mal o šə chone' de'e güen.

Jeso'osən' be'e dižə' de que gwze'e gan' zo Diozən'

25 Nach to chopə beñə' Jerosalen ca' gosə'əne': —¿Ecaguə bengan' chəsyə'əyilje' par nič so'ote'ene'?

26 Le'e ggüiašc can' cho'e dižə' nga zaquə'əlao na' bitobi chse'ene'. De repentlja beñə' gwnabia' ca' bač chso'one' xbab de que naquəcze' Cristən' ben' gwlej Diozən' par gaquəlene' nasyon chechon'.

27 Pero na' nezecho ga beñə' be'enga, mas catə' yidə Cristən' ni to cono əneze ga be'enə'.

28 Ne'e chsed chlo'i Jeso'osən' lo'o yo'odao' əblao che neto' beṇə' Izrael catə'an gosə'əne' ca'. Nach gwne' zižjo gože' lega'aque': —Nada' nombi'ale na' nezele ga beṇə' nada'. Na' caguə con za'a de'e bia'azəlaža'anə'. De'e li zo ben' əbselə' nada' la'anə'əczə le'e bito nombi'alene'.

29 Nada' nombia'ane' chedə' gan' zoe' nan' gwza'a na' len' bsele'e nada'.

30 Nach chəsə'əyiljlaže'e naclən' so'one' par yesə'əzene' Jeso'osən', pero notono no gwzen le' chedə' bitonə' əžin ža par gaque' lao na'aga'aque'enə'.

31 Na' beṇə' zan gwso'onlilaže'e Jeso'osən' na' gosə'əne': —Catə'an yidə Cristən' bitolja gone' milagr zanch can' chon benga.

Xa'ag yo'odao' ca' ja'aque' par žjəsə'əxene' Jeso'osən'

32 Na' beṇə' fariseo ca' gwse'enene' beṇə' zan chso'e dižə' che Jeso'osən'. Nach boso'oxi'e len bχoz əblao che nasyon Izrael cheton' boso'osele'e xa'ag yo'odao' cheto' ca' par žjəsə'əxene' le'.

33 Na' Jeso'osən' chsed chlo'ichene' gwne': —Gw-zocha' yeto tyemp dao' len le'e nach yeya'a gan' zo ben' əbselə' nada'.

34 Yeyiljle nada' na' cabi yežecelele nada', la' gan' soa' nada', le'e bito gaquə yidle.

35 Nach beṇə' blao che nasyon Izrael cheton' gosə'əne' entr lega'aque': —¿Ga yeyej bengan' cui yeželechone'? ¿Ešə šejlene' beṇə' gwlaž checho ca' zjənaselas entr beṇə' griego ca' na' žjəsedene' beṇə' griego ca'?

³⁶ ¿Bi zeje dižə' de'e nga gwna benga? Gwne': "Yeyilje nada' na' cui yeželele nada'." Na' leczə gwne': "Ga'an soa' nada', le'e bito gaquə yidle."

Jeso'osən' be'e dižə' che Spirit che Diozən'

³⁷ Na' ža le'ezelaogüe na' ža xen che lɪnɪnə' gwzecha Jeso'osən' gan' chsed chlo'ine' na' gwne' zižjo: —Notə'atezle šə de'e tant chene'ele gatə' yelə' mban zejlicane chele xte banacle ca to beŋə' chbillaže'e, legonlilažə' nada' na' gonə' yelə' mban zejlicane chele.

³⁸ Le'e chonlilažə'əle nada', so de'en nabia' yichjla'ažda'olen' can' na Xtizə' Diozən' de'en nyojən, gonən par niç gaquəlenle yeziquə'əchlə beŋə' par yesə'əzi'e yelə' mban zejlicane. De'e na'anə' saquə'əlebele ca yao ca' de'en chso'onən par niç yežlyon' de tcho'alaoga'aquən choscha'on bitə'atezə.

³⁹ Jeso'osən' gwne' ca' chedə' gwnezeze' Spirit che Diozən' yedəson lo'o yichjla'aždao' chio'o chonlilažə'əcho le' par niç gaquəlencho beŋə' yesə'əzi'e yelə' mban zejlicane. Na' ca naquə Spiritən' bitonə' yedəson lo'o yichjla'aždao' beŋə' ca orən', chedə' beŋə' ca' chəsə'əgue'i Jeso'osən' bitonə' so'ote'ene', na' bitonə' güe' Diozən' le' yelə' bala'aŋ xen.

Gwsa'aque' choplə por ni che Jeso'osən'

⁴⁰ Beŋə' ca' ža'anə' gwse'enene' chsed chlo'i Jeso'osən' na' bale' gosə'əne': —De'e liczə bengan' profetən' ben' naquən yidə.

⁴¹ Na' yebale' gosə'əne': —Bengan' Cristən' ben' gwlej Diozən' par gaquəlene' nasyon chechon'.

Pero bale' gosə'əne': —¿Ena' n̄acho de que Galilea na' əchoj Cristən'?

42 ¿Ecaguə na Xtižə' Diozən' de'en nyojən de que Cristən' galje' lao dia che de'e Rei Dabin' na' de que galje' yež Belen laž de'e rein'?

43 Na' gotə' bžəš entr beṇə' ca' ža'anə' na' gwsa'aque' choplə por ni che Jeso'osən'.

44 Bale' gwsa'aque' cheyalə' yesə'əzene'ene', pero bito gwso'one' ca'.

Beṇə' gwnabia' che beṇə' Izrael ca' bito gwse'ejle'e che Jeso'osən'

45 Na' x̄a'ag yo'odao' che neto' beṇə' Izrael besyə'əžine' lao beṇə' ca' bosə'oselə' lega'aque'. Na' b̄xoz əblao che n̄asyon cheton' na' beṇə' fariseo ca' gwse'e lega'aque': —¿Bixchen' cui əgwche'elene'?

46 Na' x̄a'ag yo'odao' ca' gwse'e lega'aque': —Xte ža neža ni tozə beṇə' cuiṇə' ne' güen ca güennə' chne bengan'.

47 Nach beṇə' fariseo ca' gwse'e lega'aque': —¿Elente le'e bagwxoayagle?

48 Ni tozə neto' naquəto' beṇə' blao na' naquəto' beṇə' fariseo cuiṇə' šejle'eto' che'.

49 Pero beṇə' zan quinga ža' nga bito zjənombi'e lei de'en bzoj de'e Moisezən', na' bazjəmbi'ayi'e.

50 Na' Nicodemon', ben' gwyej lao Jeso'osən' še'elə, lene' beṇə' blao ca'. Na' Nicodemon' gože' lega'aque':

51 —Lei chechon' bito cho'en latjə choglaochon che to beṇə' de que malən' bene' sin cui güe'e dižə' nac goquə na' sin cui əžəš əche'enə bixa bene'enə'.

⁵² Nach gwse' beṇə' ca' le': —¿Ena' ṇacho leno' len' naco' beṇə' Galilea? Bsed na' əṇezdo' de que ni to profet cuiṇə' əchoj Galilean'.

Besyə'ədole'ene' to no'olə len xtoe'

⁵³ Na' besa'aque' jəya'aque' ližga'aque'.

8

¹ Nach Jeso'osən' gwyeje' ya'a de'en ne' Ya'a Olibos.

² Na' beteyo catə' gwye'eni' gwyeje' de'e yoblə yo'odao' əblao che neto' beṇə' Izrael. Na' yoguə' beṇə' ca' ža' na' gosə'əbigue'e laogüe'enə' na' Jeso'osən' gwchi'e na' gwzolaogüe' chsed chlo'ine' lega'aque'.

³ Nach beṇə' ca' choso'osed choso'olo'i lei de'en bzoj de'e Moisezən' na' len beṇə' fariseo ca' bedəsə'əgüe'e to no'olə beṇə' besyə'ədole'ene' len xtoe'. Na' bosə'ozeche'ene' gwchol beṇə' ca' lao Jeso'osən'.

⁴ Na' gwse'e Jeso'osən': —Maestr, no'ol nga babedolə'əto'one' mer delene' to xtoe'.

⁵ Na' lei de'en bzoj de'e Moisezən' chonən mendad gotcho no'ol ca' chso'on ca' əgwšizə'əga'acchone' yej. ¿Bixa ənao' le'? ¿bi cheyalə' gonechone'?

⁶ Gwse'e Jeso'osən' ca' chedə' gwse'enene' yesə'əbeje'ene' dižə' de'e yesə'əchine' contr le'. Nach Jeso'osən' con bcheque'e na' bzoje' lao yon' len xbene'.

⁷ Na' gwnitə'əcheche' chəsə'əṇabene' le' nacxa əṇe'enə'. Nach gwche'eša'ogüe'e na' gože' lega'aque': —Guaquə con to le'e beṇə' cui de xtole'e solaole əgwšizə'əle no'olə nga yejən'.

8 Nach bcheque'e de'e yoblə bzoje' lao yon'.

9 Na' beṇə' blao ca' beṇə' ca' chəsə'əcuiš no'olən' catə' gwse'ene' de'en gož Jeso'osən' lega'aque', gosə'əneze' lo'o yichjla'ažda'oga'aque'enə' de que yogue'e de xtolə'əga'aque'. Nach gwzolao besyə'əchoj tgüejə tgüejə', gwzolaotec besyə'əchoj beṇə' ca' zjəngoləch nach beṇə' ca' yelə' xte bega'an yetozə Jeso'osən' len no'olən' ladjo beṇə' ca' choso'ozenag che'.

10 Na' catə' bebe'ešao' Jeso'osən' caguə no beṇə' ca' ble'ichene' laogüe'enə' sino yetozə no'olən'. Na' gože'ene': —No'olə, ¿gan beṇə' ca' choso'ocuiš le'? ¿Eni toe' cui beṇ le' castigw?

11 Nach no'olən' gože'ene': —Ni toe' Señor.

Nach Jeso'osən' gože'ene': —Ni nada' bito goṇa' le' castigw. Beyej na' cuich gono' de'e malən'.

Jeso'osən' nse'e be'eni' par yichjla'aždao' beṇəchən'

12 Na' Jeso'osən' gozoe' dižə'an yetši'i len beṇə' ca' ža'anə', gože' lega'aque': —Nada' nsa'a be'eni' par yichjla'aždao' beṇəchən'. Beṇə' ca' chso'onlilaže'e nada' na' choso'ozenague' chia' bitoch chso'ontezə chso'one' de'e malən'. Yo'o be'eni'in lo'o yichjla'ažda'oga'aque'enə' chedə' zjənape' yelə' mban zejlicane.

13 Nach beṇə' fariseo ca' gwse'ene': —Le'etezə cho'o dižə' che cuino', na' bito naquən de'e se'ejle' beṇə'.

14 Na' gož Jeso'osən' lega'aque': —La'anə'əczə cho'a dižə' che cuina', xtiža'anə' naquən de'e li. Nada' nezdə' gan' gwza'a na' gan' yeya'a, pero le'e bito nezele gan' gwza'a na' gan' yeya'a.

15 Le'e con to chosbaga_ə'ale nada' de que napa' dolə' por ni che bi de'en chle'ile chona'. Nada' bito za'a par choglaogua'an che be_{nə}' de que zjənapə' dolə'.

16 Pero na' šə catə' choglaogua'an che notə'atezə be_{nə}' de que zjənapə' dolə', zaquə'əczə can' ə_nia'anə' chedə' bito choglaogua'an che be_{nə}' to gwłazza' sino con can' na Xa'anə' ben' bse_{lə}' nada'.

17 Lei chechon' de'en bzoj de'e Moisezən' nyojən nan de que dižə' de'en əso'e chopə testigw cheya_{lə}' šej_le'echo de que naquən de'e li šə tozə can' yesə'əne'.

18 Nada' cho'a dižə' che cuina' na' Xa'anə' leczə cho'e dižə' chia', na' le'enə' bse_le'e nada'. Neto' naquəto' testigw ca' chopə.

19 Na' gwse'ene': —¿Gaxa zo xa'onə'?

Na' gwna Jeso'osən': —Ni nada' ni Xa'anə' cui nombi'ale. Žalə' nombi'ale nada' leczə nombi'ale Xa'anə'.

20 Dižə' ca' be' Jeso'osən' bsed blo'ine' gan' chəsə'əgüe'e mech lo'o yo'odao' əblao che neto' be_{nə}' Izrael. Na' ni to cono gw_wxen le' chedə' cuinə' žin ža par gaque' lao na' be_{nə}' ca' chəsə'əgue'i le'.

Jeso'osən' gwne': "Gan' yeya'anə' le'e cabi gaquə da'acle"

21 Na' gož Jeso'osən' lega'aque' yetš'i:i: —Nada' yeya'a, na' le'e yeyilje nada', pero gan' yeya'anə' le'e cabi gaquə da'acle, chedə' le'e gatle catə' cuinə' yedinjele xtolə'əle ca'.

22 Na' be_{nə}' blao che nasyon Izrael cheto'on gosə'əne': —¿Eyeyot cuine'enə' ža, de'en ne' gan' yeyeje' bito gaquə šejcho?

²³ Na' gože' lega'aque': —Le'e chzenagle che gwxiye'enə', na' nada' chzenaga' che Diozən'. Le'e chonle can' chso'on yeziquə'əchlə beṇə' cui zjənombia' Diozən', na' nada' bito chona' ca'.

²⁴ De'e na'anə' gwnia' le'e de que gatle catə' cuiṇə' yedinjele xtolə'əlen'. Šə cui chejle'ele de que nada' naca' doxen can' gwnia'anə', gatle sin cui yedinjele xtolə'əle ca'.

²⁵ Na' gwse'ene': —¿No naco' le'enə'?

Na' gož Jeso'osən' lega'aque': —Nada' naca' ben' bagwnia' le'e bedote.

²⁶ Ne'e dech de'e zan de'e əṇia' chele gwzejni'ida' ca naquə xtolə'əle ca'. Xa'anə' bsele'e nada' par cho'a dižə' len beṇachən' de'en babenda' gwne'. Na' Xa' na'anə' cho'e dižə' li.

²⁷ Jeso'osən' be'e dižə' che Xə' Diozən', na' lega'aque' bito gwse'ejni'ine' šə che Dioz nan' cho'e dižə'.

²⁸ Na' Jeso'osən' gože' lega'aque': —Diozən' bsele'e nada' golja' beṇach, na' te gotle nada' le'e yag corozən' cana' əṇezele de que naca' ben' gwnia'anə'. Na' leczə əṇezele de que cabi bi chona' de'e bia'azəlaža'a, sino con bin' babzejni'i Xa'anə' nada', lenṇə' chnia'.

²⁹ Xa'anə' balsele'e nada' na' zocze' len nada'. Bito chbejyichje' nada' chedə' do tyempte chona' de'en chazlaže'enə'.

³⁰ Na' žlac choe' Jeso'osən' dižə' quinga beṇə' zan gwso'onlilaže'e le'.

Noquə'an zjənaquə xi'in Dioz na' noquə'an nitə' xni'a de'e malən'

31 Na' Jeso'osən' gože' balə beṇə' gwlaž četo' ca' bachse'ejle'e če': —Šə sotezə sole gonle de'e chnia' le'e gwlo'en de que de'e liczə banacle disipl chia'.

32 Na' šə sotezə sole gonle de'en chnia' le'e, nach ənezele bi zeje dižə' li chia'anə', na' šə baṇezele bi zejen, bitoch gacle ca esclabos.

33 Na' gwse'ene': —Dia če de'e Abraanṇə' naquəto' na' xte ža neža bitonə' gacto' ca esclabos. ĵBixachen' nao' le' de que bitoch gaquəto' ca esclabos?

34 Na' gož Jeso'osən' lega'aque': —De'e li chnia' le'e, yoguə' beṇə' chso'on de'e malən' nite'e xni'a de'e malən' ca esclabos.

35 Beṇə' naquə esclabo caguə do tyempte gaque' cuent len familyən' gan' naque' esclabo, pero beṇə' golje' lao familyən', do tyempte gaque' cuent len familyən'.

36 Na' šə nada' Xi'in Diozən' gona' ca əchojle xni'a de'e malən' par nič cuich gacle ca esclabos, de'e liczə əchojlen'.

37 Nezdə' de que nacle xi'in dia če de'e Abraanṇə' pero bia'aczə cheyiljlažə'əle naclən' gonle par nič gotle nada', na' chonle ca' čedə' bito chone čele xtiža'anə'.

38 Nada' cho'a dižə' če de'en bablo'i Xa'anə' nada', na' le'e chonle can' na xalen'.

39 Na' gwse' beṇə' ca' Jeso'osən': —Neto' naquəto' xi'in dia če de'e Abraanṇə'.

Na' gož Jeso'osən' lega'aque': —Žalə' nacle doalje xi'in dia če de'e Abraanṇə' gonle can' ben de'e Abraanṇə' žalə' ca'.

40 Na' la'anə'əczə babzejni'ida' le'e dižə' li de'en babsed blo'i Diozən' nada', le'e chene'ele gotle nada'. De'e Abraannə' cabi bene' can' chonlen'.

41 Tozəczə can' chonle len xalenə'.

Nach gwse'e le': —Tozə Diozən' naque' Xato' na' bito chzenagto' che nochlə beṇə'.

42 Na' Jeso'osən' gože' lega'aque': —Žalə' Diozən' naquə xale guaquele chia', chedə' nada' gwza'a gan' zo Diozən'. Caguə za'a de'e bia'azəlažə'anə'. Len' əbsele'e nada'.

43 ¿Bixchen' cui chejni'ile de'en chnia' le'e? Bito chejni'ile chedə' la' bito chene'ele gwzenagle xtižə'anə'.

44 Gwxiye' nan' naquə xale. Nachən' chebeile chonle can' chene'ennə'. Len naquən güet beṇə' dezd catə'an gwxe yežlyon', na' cui chdalenən dižə' li che Diozən' chedə' cui yo'o dižə' lin' lo'o yichjla'ažda'ogüe'ennə'. Catə' chnen de'e güenlažə' chnen con can' naquə cuinei chedə' naquən güenlažə' na' yoguə' dižə' güenlažə' za'an chei.

45 Na' cabi chejle'ele chia' nada', chedə' nada' əchnia' le'e dižə' li.

46 Ni tole cui gaquə əgwlo'ele de que babena' bi de'e malən'. Nada' cho'a dižə' li, ¿bixchen' cui chejle'ele chia'?

47 Beṇə' ca' zjənaquə xi'in Dioz choso'ozenague' che xtiže'enə'. Na' ca naquə le'e cui nacle xi'ine', de'e na'anə' bito chzenagle che'.

Ze'e galjə de'e Abraannə' bazoczə Cristən'

48 Na' beṇə' blao che nasyon Izrael cheton' gwse'ene': —Leiczeto' can' nato' de que le' naco' beṇə' Samaria na' de que chac tonto'onə'.

49 Na' gož Jeso'osən' lega'aque': —Bito chac tonta'. Nada' əchnežjua' yelə' bala'an̄ che Xa'anə' na' le'e chnitle yelə' bala'an̄ chia'anə'.

50 Nada' caguə chyilja' no gon̄ nada' yelə' bala'an̄nə'. Xa'anə' chone' nada' yelə' bala'an̄, na' len' əgwlo'e non' napə dolə' na' non' cui napə dolə'.

51 De'e li chnia' le'e, notə'atezə beṇə' choso'ozenag xtiža'anə', cuat nabia' yelə' gotən' lega'aque'.

52 Nach beṇə' blao che nasyon Izrael cheton' gwse'ene': —Na'a babeyož gwnezeteto' de que chac tonto'onə'. De'e xaxta'ocho Abraannə' gote' na' leczə de'e profet ca' beṇə' ca' gwso'e xtiža' Diozən' cana'. Na' le' nao' de que beṇə' ca' choso'ozenag chio' cuat nabia' yelə' gotən' lega'aque'.

53 ¿Ezaquə'əcho' le' ca de'e xaxta'ocho Abraannə'? Len' gote' na' leczə ca' de'e profet ca'. ¿Noxan' chacdo' naco'?

54 Na' gwna Jeso'osən': —Žalə' nada' choe' cuina' yelə' bala'an̄, cabi zaquə' yelə' bala'an̄nə'. Pero Xa'anə' chone' nada' yelə' bala'an̄, ben' nale naquə Dioz chelen'.

55 Le'e bito nombia'alene', pero nada' nombi'ane'. Žalə' nia' cui nombia'ane' gaca' beṇə' güenlažə' ca le'e. Nada' nombia'ane' ža, na' chzenaga' xtiže'enə'.

56 De'e xaxta'ocho Abraannə' bebeine' gwyejle'e de que le'ine' tyemp ni zoa' yežlyo ni. Na' bable'ine'en̄ na'a na' zoe' mbalaz.

57 Na' gwse' beṇə' blao che nasyon Izrael cheton' le': —Ni šiyon iz cuinə' žino'. ¿Ena' nezle'ido' de'e Abraannə'?

58 Na' gož Jeso'osən' lega'aque': —De'e li achnia' le'e, ca ze'e galjə de'e Abraannə' bazocza' nada'.

59 Nach gosə'əzi'e yej par yoso'ošiče'ene'en. Na' Jeso'osən' bocuaše'e na' beze'e yo'odao' əblaonə'. Bito gwsa'ache'ine' catə' bedie' gwcholga'aque'enə' zjəyede'.

9

Jeso'osən' bene' par nič ble'i to beṇə' golje' nchole'

1 Na' txen chdato' len Jeso'osən' catə' ble'ito' to beṇə' byo beṇə' golje' nchole'.

2 Na' gožto'one': —Maestr, čno napə dolə' de'en goljə bengan' nchole'? čəle' o šə xaxne'enə'?

3 Na' Jeso'osən' gože' neto': —Benga golje' nchole' caguə por ni che xtole'enə', na' caguə por ni che xtolə' xaxne'enə', sino par nič la'alaon can' gon Diozən' len le'.

4 Cheyalə' goncho xšin Diozən' ben' bselə' nada' žlac nede latjə. Gwžin catə' cuich gatə' latjə gonchoṇ.

5 Žlac nezoa' yežlyo nga chgua'a be'eni' lo'o yichjla'aždao' beṇə'.

6 Beyož gwne' ca' gwcho'oṇ xene'en lao yon' na' bene' benjw len xen' che'enə'. Na' gwdebe' benjon' jelao beṇə' lchoṷən'.

7 Na' gože'ene': —Gwyej jəyedib jelaogo'onə' cho'a tanc de'en nzi' Siloe—. Na' Siloe zejen dižə' Nselə'.

Na' gwyeje' na' beyib jelaogüe' ca'. Na' beze'e jəyede' bachle'ine'.

8 Na' beṇə' gwliž che' ca' na' beṇə' ca' besə'əle'i le' yoguə' las catə' ne'e nchole' gosə'əne': —čecaguə bengan' bable'icho bedote či'e chṇabe' caridan'?

⁹ Ba_{le}' gosə'əne': —Bengan'.

Na' ba_{le}' gosə'əne': —Cabi naquə l_e' sino ca naquə bengan' naque'.

Na' l_e' gwne': —Nada'anə'.

¹⁰ Na' gwse'ene': —¿Nacxa goquən' gwzolao chle'ido'?

¹¹ Na' gože' lega'aque': —To beṇə' le Jeso'os bene' beṇjw na' gwdebe'en jelaogua'anə' na' gože' nada': “Gwyej cho'a tanc de'en nzi' Siloen' na' jəyedibən.” Na' gwy'a na' beyiba'an, na' gwzolao chle'ida'.

¹² Nach gwse' beṇə' ca' l_e': —¿Ganxa be'enə'?

Na' gože' lega'aque': —Bito ne_zda'.

Beṇə' fariseo ca' gosə'əṇabene' be'enə' nac goquən' chle'ine'

¹³ Na' gosə'əche'e ben' goquə beṇə' l_{ch}olən' gan' nitə' beṇə' fariseo ca'.

¹⁴ Na' naquə ža dezcanz catə'an ben Jeso'osən' beṇjon' de'en gwdebe' jelaogua'anə' na' bey-
iban' na' gwzolao chle'ida'.

¹⁵ Na' beṇə' fariseo ca' lecza gosə'əṇabene' l_e' nac goquən' bachle'ine'. Na' l_e' gože' lega'aque': —Ben' beyone nada' gwdebe' beṇjon' jelaogua'anə' na' bey-
iban' na' gwzolao chle'ida'.

¹⁶ Nach to _{ch}opə beṇə' fariseo ca' gosə'əne': —Nezecho bito zo Diozən' len benga _{ch}edə' bito chomba'əne' ža dezcanzən'.

Na' ba_{le}' gosə'əne': —¿Nac gon to beṇə' güen de'e mal gone' mi_lagr quinga?

Na' gwsa'aque' _{ch}oplə entr lega'aque'.

¹⁷ Nach de'e yoblə gwse'e be'en goljə n_{ch}olən': —¿Bi nao' le' _{ch}e ben' ben par ni_{ch} chle'ido'?

Na' l_e' gwne': —Naque' to profet beṇə' bselə' Diozən'.

18 Na' beṇə' blaō che ṇasyon Izrael cḥeton' bito gwse'eje'e che ben' šə len' golje' nḥole' na' ṇa'a bachle'ine' xte que gwsa'axe' xaxne'enə'.

19 Na' gosə'əṇabene' lega'aque' gwse'ene': —¿Eben-gan' xi'inlen' ben' nale golje' nḥole'? ¿Nacxa goquən' chle'ine' ṇa'a?

20 Na' gwse' xaxne'e ca' lega'aque': —Nezeto' de que bengan' xi'into'onə', na' de que golje' nḥole'.

21 Mas nac chaquən' bachle'ine' bito nezeto', nic nezeto' noxa ben par niḥ bachle'ine'. Le' bazejəczene'. Lenabe le', güe'ecze' dižə' naquən' goc che'.

22 Xaxne'e ca' gosə'əne' ca' de'en besə'əžebe' beṇə' blaō che ṇasyon Izrael cḥeto'onə', chedə' lega'aque' baḥ zjənone'en de que notə'ətezə beṇə' güe'e dižə' de que Jeso'osən' naque' Cristən' ben' gwlej Diozən' par gaquəlene' ṇasyon cḥeton', cabi əso'e latjə šo'oche' lo'o yo'oda'onə'.

23 De'e na'anə' gosə'əna xaxne'e ca': “Bazejəczene'. Lenabe le'.”

24 Nach de'e yoblə gwsa'axe' ben' goljə nḥol gwse'ene': —Be'elao' Diozən' na' gwzo'one' testigw de que clelən' babe'eləno' neto' dižə' baḥe. Neto' nezeto' de que Jeso'osən' naque' to beṇə' güen de'e mal.

25 Na' gwne': —Šə naque' beṇə' güen de'e mal, bito nezda'. De'en nezda', nada' goca' beṇə' lḥol na' ṇa'a chle'ida'.

26 Na' de'e yoblə gwse'ene': —¿Bi benene' le'enə'? ¿Nac benen' par niḥ bachle'ido'?

27 Na' gože' lega'aque': —Bagwnia' le'e na' cui chzenagle. ¿Bixḥen' chene'ele yenele de'e yoblə? ¿Elen le'e chene'ele gacle disipl che'enə'?

28 Na' gwsa'ade'ene' dižə' gwse'ene': —Le' naco' disipl che', pero neto' naquəto' disipl che de'e Moisezən'.

29 Nezetə' de que Diozən' be'elene' de'e Moisezən' dižə' cho'a, pero benga bito nezetə' gan' ze'enə'.

30 Na' ben' goljə ncholən' gože' lega'aque': —Nactequan' le'e cui nezele ga ze'enə', len babene' par nich chle'ida'.

31 Na' nezecho de que Diozən' cabi chzenague' che benə' ca' chso'on de'e mal. Con benə' chso'ene' yelə' bala'an na' chso'one' can' chene'ene'enə', lega'acze' chzenag Diozən' chei.

32 Dezd gwxe yežlyon' ni to cononə' yene de que bagwzo benə' chone' par nich chle'i benə' goljə nchol.

33 Žalə' cui zo Diozən' len le' caguə bi milagr gaquə gone'.

34 Na' benə' blao ca' gwse'ene': —Pendejw, len' goljo' ncholə' yelə' benə' mal chio'onə', čana le' əgwseddo' neto'onə'?

Na' besyə'əbeje'ene' fuer.

Benə' ca' zjanchol yichjla'ažda'oga'aque'enə'

35 Goche'i Jeso'osən' de que babesyə'əbeje' be'enə' fuer, na' jəšague'ene' gože'ene': —čEchonlilažo'o le' Xi'in Diozən'?

36 Na' gož ben' le': —čNoxa'an ža? señor, par nich gonlilaža'ane'.

37 Na' gož Jeso'osən' le': —Nada'anə' ben' bable'ido' antslə na' nada'anə' cho'elena' le' dižə'.

38 Nach be'enə' bzo xibe' be'elaogüe'e Jeso'osən', gwne': —Xana', chonlilaža'a le'.

39 Na' gwnach Jeso'osən': —Nada' za'a yežlyo nga par nič la'alaon che beṇačhən' non' zjənapə dolə' na' non' cui zjənapə dolə'. Za'a chgua'a be'eni' par beṇə' ca' chsa'acbe'ine' zjənčhol yichjla'ažda'oga'aque'enə', na' za'a par yeca'a be'eni' che beṇə' ca' chsa'aque'ne' cui zjənčhol yichjla'ažda'oga'aque'enə'.

40 Na' balə beṇə' fariseo ca' nitə' galə'əzə gwse'enene' de'e nga. Na' gwse'e Jeso'osən': —¿Echacdo' len neto' nčhol yichjla'ažda'oto'onə'?

41 Na' gož Jeso'osən' lega'aque': —Žalə' cui chejni'ile bito bi xtolə'ale de. Pero por ni che de'en nale de que chejni'ile, de'e na'anə' deczə xtolə'alen'.

10

Jempl che xle'ej xilə' ca'

1 De'e li chnia' le'e, be'en cui cho'o cho'a puert xle'ej xilə' ca' na' ga yoblə chepe' par cho'e, beṇə' bguan be'enə'.

2 Be'en cho'o cho'a puertən', le'enə' goye xilə'anə'.

3 Na' be'en chapə puert che xle'ej xilə' ca' chsaljue' par nič cho'o beṇə' goyebən'. Na' xilə' ca' choso'ozenaguəb xtiže'enə' čhedə' zjənombia'ab le', na' chaxe'eb cho'e laga'aguəb catə' chbeje'eb.

4 Na' catə' bagwleje' yoguə' bia che' ca' lo'o xle'ejga'aguəbən', chbialaogüe' laoga'aguəbən' na' chjəsə'ənaob le' čhedə' zjənombi'ab ši'enə'.

5 Na' bito žjəsə'ənaob beṇə' yoblə, sino yesə'əxonjəb le' čhedə' cui zjənombi'ab ši'enə'.

6 Jeso'osən' be'e jempl nga par bzejni'ine' beṇə' ca' ža'anə', pero bito gwse'ejni'ine' bi zejen de'en gože' lega'aque' ca'.

Jeso'osən' chgüia chye' chio'o ca to goye xilə' beṇə' chgüia chye' bia che' ca' binlo

⁷ Nach gozṇe Jeso'osən' gože' lega'aque': —De'e li əchnia' le'e, nada' gwxaquə'əlebəda' ca cho'a puert che xle'ej xilə' ca'.

⁸ Yoguə' beṇə' goxoayag ca' babla'ac antslə ca nada' chəsə'əne' de que Diozən' bsele'e lega'aque' pero gwxaquə'əlebəga'aque' ca beṇə' bguan. Na' ca xilə' ca' cui choso'ozenaguəb xtižə' beṇə' cui zjənombi'ab, ca'aczən' beṇə' ca' chso'onlilažə' nada' cui choso'ozenague' che beṇə' goxoayag ca'.

⁹ Nada' gwxaquə'əlebəda' ca cho'a puert che xle'ej xilə' ca'. Xilə' ca' chəsə'yə'əyo'ob lo'o xle'ejga'aque' na' chəsə'əchojəb par chəsə'əyiljəb de'e chsa'ob. Na' ca xle'ej xilə' ca' chcue'ejən lega'aque' par niçh cui bi gac chega'aque'ab, ca'aczən' chcue'ēja' beṇə' ca' chso'onlilažə' nada' par niçh cui bi gac chega'aque'.

¹⁰ Beṇə' goxoayag ca' gwxaquə'əlebəga'aque' ca beṇə' bguan beṇə' ca' chda'ac lechgualə con to de'e yesə'əbane', na' so'ote', na' yesə'ənitlaogüe'. Nada' za'a par niçh chnežjua' yelə' mban zejlicane che beṇə' ca' chso'onlilažə' nada' na' par niçh nite'e mbalaz juisy.

¹¹ Nada' chgüia chya' beṇə' ca' chso'onlilažə' nada' can' chon to beṇə' goye xilə' beṇə' chgüia chye' xilə' che' ca' binlo. Na' de'en chgüia chyega'aca'ane' chsanlažə' cuina' so'ot beṇə' nada'.

¹² Balə beṇə' ca' choso'oye' xilə' chesə'əzi'e laxjwga'aque', la' xilə' ca' bito zjənaquəb bia chega'aque'. De'e na'anə' chəsə'əbejyichje'eb na' choso'oxonje' catə' chəsə'əle'ine' za' no becoyo'o,

chedə' bito zjənaque' xan xilə' ca'. Chso'e latjə chniz becoyo'onə' xilə' ca' na' choslasəb lega'aquəb.

¹³ Chesə'əxonje' chedə' bito zjənži'ine' xilə' ca' de'en cui zjənaquəb bia chega'aque', con zjənaque' goyeb.

¹⁴ Nada' chgüia chya' beṇə' ca' chso'onlilažə' nada' ca to beṇə' goye xilə' beṇə' chgüia chye' xilə' che' ca' binlo. Na' nombi'a beṇə' ca' chso'onlilažə' nada', na' lega'aque' zjənombi'e nada'.

¹⁵ Nombi'aga'aca'ane' ca Xa'anə' nombi'e nada' na' nada' nombi'a Xa'anə'. Na' de'en chgüia chyega'aca'ane' chsanlažə' cuina' so'ot beṇə' nada'.

¹⁶ Na' nitə' beṇə' ga yoblə beṇə' cui zjənaquə beṇə' Izrael beṇə' so'onlilažə' nada' na' yoso'ozenague' chia'. Leczə' lega'aque' cheyalə' əgwtoḃa' par nich yoguə'ələl no so'onlilažə' nada' əsa'aque' tozə' len ljuežjga'aque' na' toza' nada' ggüia gwyə' yoguə'əlolga'aque'.

¹⁷ Chsanlažə' cuina' so'ot beṇə' nada' pero techlə yebana'. Na' chaquəche Xa'an chia' de'en chazlažə'a chona' ca'.

¹⁸ Ni to cono yeque'e yelə' mban chia'anə' sino chsanlažə' cuina' so'ot beṇə' nada'. Napa' yelə' gwnabia'anə' par gwsanlažə' cuina' so'ote' nada', na' napa' yelə' gwnabia' par yeyas yebana' ladjo beṇə' guat ca'. Na' Xa'anə' babene' mendad gona' ca'.

¹⁹ Na' de'e yoblə gwsa'ac beṇə' blao che nasyon Izrael cheton' choplə por ni che dižə' ca' de'en gwse'enene' be'e.

²⁰ Zan beṇə' ca' gosə'əne': —Chac tonte'enə', bito chache'ine' bi dižə'an cho'e. ¿Bixchen' chzenagle che'?

21 Na' bale' gosə'əne': —Dižə' quinga caguə naquən ca che beṇə' chac tontən'. ¿Eguaquə gon to beṇə' chac tont par le'i beṇə' l'chol'?

Beṇə' blao che beṇə' Izrael ca' cuiczə gwse'enene' se'ejle'e che Jeso'osən'

22 Na' Jerosalennə' chac lṇi che yo'odao' əblao che neto' beṇə' Izrael de'en ne' “Dedicasion”. Na' naquə tyemp zag.

23 Na' Jeso'osən' chde' cha'ašil che yo'odao' əblaonə' part de'en chəsə'əne' “Cha'ašil che Salomon”.

24 Na' gwse'echj beṇə' blao che nasyon Izrael cheton' Jeso'osən' na' gwse'ene': —¿Bixchen' ne'e chono' par chaczejlažə'ətecto' šə len' Cristən' ben' gwlej Diozən' par gaquəlene' nasyon cheton'? Šə le'enə' Cristən', gwna neto' clar.

25 Na' gož Jeso'osən' lega'aque': —Bagwnia' le'e na' cui chejle'ele. Milagr ca' de'en babena' len yelə' guac che Xa'anə' chəsə'əlo'en de que le'enə' bsele'e nada'.

26 Na' le'e bito chejle'ele chia' chedə' cui nacle txen len beṇə' ca' chso'onlilažə' nada'.

27 Nombi'a beṇə' ca' chso'onlilaže'e nada' na' lega'aque' choso'ozenague' chia'.

28 Na' nada' chnežjoga'aca'ane' yelə' mban zejlicane, na' cuat yesə'əbiayi'e. Ni to cui no no əca'axaxj lega'aque' lao na'anə'.

29 Xa'anə' bagwleje' lega'aque' par niçh chgüia chyega'aca'ane'. Na' ni to cui no no gaquə əca'axaxj lega'aque' lao na' Xa'anə' chedə' nape' le'ezelaogüe' yelə' chnabia' xen.

30 Nada' na' Xa'anə' tozə can' naquə yichjla'ažda'oto'onə', tozə can' naquə yelə' guac čheto'onə' na' tozə can' chonto'.

31 Nach beṇə' blao che nasyon Izrael čheton' gosə'əzi'e yej par yoso'ošiže'ene'en.

32 Na' gož Jeso'osən' lega'aque': —De'e zan de'e güen bable'ile bena' len yelə' guac che Xa'anə'. ¿Non' de'e ca' babena' chonən par əgwšičə'əle nada' yejən'?

33 Na' beṇə' blao ca' gwse'e le': —Caguə por ni che bi de'e güen de'en babeno'on əgwšičə'əto' le' yejən', sino por ni che chžia chnito'o Diozən'. Con beṇəchzə le' na' nao' de que naco' Dioz.

34 Na' gož Jeso'osən' lega'aque': —Le'e chsedle Xtižə' Diozən' de'en nyoj gan' nan: “Nada' gwnia' de que le'e nacle ca Dioz.”

35 Na' Xtižə' Diozən' de'en nyojən caguə de'e te cheinə'. Na' lenṇə' nan de que Diozən' gwne' che beṇə' ca' əbnežjue' xtiže'enə' de que gwsa'aque' ca Dioz.

36 Ca naquə Diozən' gwne' zjənaque' ca cuine', čbixchen' nale de que chžia chnita'a Diozən' de'en gwnia' naca' Xi'ine'? Le'enə' gwleje' nada' par gaquələna' beṇəchən' na' bsele'e nada' yežlyo nga.

37 Žalə' de'e ca' chona'anə' bito zjənaquən de'en chon Xa'anə', bito šejle'ele chia'.

38 Pero na' de'en zjənaquən de'en chone'enə', cheyalə' šejle'ele de que naca' Xi'ine' la'anə'əczə cui chejle'ele xtižə'anə'. Šə šejle'ele che de'e ca' chona'anə' na' əṇezele de que Xa'anə' zoe' len nada' na' nada' zoa' len le'.

39 Na' de'e yoblə bosə'əsyə' naclən' gaquə ədole'e, pero bito besyə'əželene' naclən' so'one'.

40 Na' gwsa'ato' len Jeso'osən' jəsoto' yešla'alə yao Jordannə' gan' gwzo de'e Juannə' antslə catə'an bchoe' beṇə' nis.

41 Na' zan beṇə' bda'aque' gan' zoto' par bosozenague' xtižə' Jeso'osən' na' gosə'əne' che': —La'aṇə'əczə de'e Juannə' ni to miłagr cui bene', yoguə'əloḷ de'en gwne' che bengə naquən de'e li.

42 Na' beṇə' zan beṇə' nitə' na' gwso'onlilaže'e Jeso'osən'.

11

Can' goquə catə'an got ben' le Laḥ

1-2 Na' goquən chacšene to beṇə' Betania beṇə' le Laḥ. Betania nan' naquən laž Maria na' Marta, na' lega'aque'enə' zjənaque' beṇə' zan Laḥən'. Maria nga ben' bcuase' set zix ni'a Xancho Jeso'osən' na' bxie' ni'enə' len yišə' yichje'enə'.

3 Na' beṇə' zan Laḥən' bosozese'e rson gan' zo Jeso'osən' gwse'ene': —Xanto', be'en chacdo' chei chacšenene'.

4 Na' catə' gwneze Jeso'osən' na' gwne': —Yižgüe' che'enə' bito naquən de'e gattecze', sino par əye' Diozən' yelə' bala'aṇən' chacšenene' na' par niḥ nada' si'a yelə' bala'aṇ, nada' naca' Xi'in Diozən'.

5-6 Gwde gwneze Jeso'osən' de que chacšene Laḥən', nebega'aṇe' yəḥopə ža gan' zoe'enə' la'aṇə'əczə chaquene' che Martən', che beṇə' bile'enə' na' che Laḥən'.

7 Nach gože' neto': —Ləšo'o Jodean' de'e yoblə.

8 Nach gožto'one': —Maestr, bi ža na'azən' gwsa'aclažə' beṇə' blao che ṇasyon chechon' yoso'ošiže'e le' yej. ĵEna' de'e yoblə šejo' na'anə'?

9 Na' gwna Jeso'osən': —ĵEcaguə šižin orən' naquə težan'? Beṇə' chda teža bito chčhegü'e e chedə' la' nye'eni'inə'.

10 Mas beṇə' chda še'elə chčhegü'e e chedə' cuich nye'eni'. Ca'aczə naquən len nada', bito bi bi gaquə chia' žlac cuiṇə' əžin ža par so'ote' nada'.

11 Gwde gwne' ca' gozne' neto': —Beṇə' migw checho Lačən' bagwtase', na' ša'a žjəyesbana'ane'.

12 Na' gožto'one': —Xanto', šə bachtase'enə' goy-acczene'.

13 Jeso'osən' gwne' ca' chedə' gwṇezene' bagot Lačən', na' neto' bento' xbab de que gwne' ca' che bišgalən'.

14 Nach Jeso'osən' gwne' neto' clar: —Bagot Lačən'.

15 Na' chebeida' cui gwzoa' lao chacšenene', par nič ṇa'a gona' ca' šejle'echle chia'. Le'e šo'o gan' de'enə'.

16 Nach beṇə' ljuežjto' Tomasən' gože' neto': —Le'e šo'o par nič len chio'o so'ote' šə bachso'ote' Jeso'osən'.

Tomas na'anə' ben' boso'osi'e Didimo chedə' naque' beṇə' cuaš.

Jeso'osən' chosbane' beṇə' guat ca'

17 Nach gwyejto' len Jeso'osən' Betanian', na' catə' bžinto'onə' gwse' beṇə' ca' le' de que bagoc tap ža boso'ocuaše'e Lačən'.

18 Na' Betanian' chi'in galə'əzə Jerosalennə' ca do gašjə legw.

19 Na' beṇə' zan beṇə' Izrael gwlaž čheto' ca' ža' Jerosalennə' besə'əžine' gan' zo Martən' na' Marian' par chso'e lega'aque' yelə' chxenlažə' de'en got beṇə' zanga'aque'enə'.

20 Nach Martən' catə' gwnezene' bazon əžinto' na' bchoje' bedəšague' neto', na' Marian' bito bchoje' ližga'aque'enə'.

21 Nach Martən' gože' Jeso'osən': —Xana', žalə' gwzo' catə'an gocšene beṇə' zana'anə' bito gote' žalə' ca'.

22 Pero la'anə' bagote', nezda' de que Diozən' gone' bitə'ətezə de'en əṇabdo'one'.

23 Nach gož Jeso'osən' le': —Goban beṇə' zano'onə'.

24 Nach Martən' gože'ene': —Nezda' de que gobane' catə'an yesyə'əban beṇə' guat ca' žan' šo'o fin čhe yežlyon'.

25 Na' gož Jeso'osən' le': —Nada' chac chosbana' beṇə' guat ca' na' nada' nsa'a yelə' mban zejlicane par beṇə' ca' chso'onlilažə' nada'. De'e na'anə' beṇə' ca' chso'onlilažə' nada' la'anə'əczə sa'ate', de yelə' mban zejlicane čhega'aque'.

26 Na' notə'ətezə beṇə' chso'onlilaže'e nada' zjanape' yelə' mban zejlicane na' cuat ṇabia' yelə' gotən' lega'aque'. ¿Echejli'o de'e nga?

27 Na' gože'ene': —Xana', chejli'a de que naco' Xi'in Dioz. Chejli'a de que naco' Cristən' ben' babselə' Diozən' yežlyo nga par gaquəlene' neto'.

Jeso'osən' gwcheže' cho'a ba čhe Lačan'

28 Beyož gwna Martən' ca' nach beyeje' na' jəyeyeže' Maria bile'enə' žižizə: —Baza' Maestrən' na' chṇe' le'.

29 Na' Marian' catə' benene' can' gož Martən' le' le'e gwzoža'ate' bide' gan' zoto' len Jeso'osən'.

30 Na' caguə babžinto' lao yežən' ca orən', nenaguə'əto' gan' bedəšag Martən' neto'.

31 Na' beṇə' Jerosalen ca' nitə' len Marian' liže'enə', beṇə' ca' chso'e lega'aque' yelə' chxenlažə', catə' besə'əle'ine' gwza' Marian' nach gosə'ənaogüe'ene' chsa'aquene' cho'a ba na'an zde' zjəcheže'.

32 Na' Marian' catə' ble'e gan' zoto'onə' ble'ine' Jeso'osən', na' bzo xibe' laogüe'enə' na' gože'ene': —Xana', žalə' le' gwzo' nga catə'ən chacšene beṇə' zana'anə', bito gote' žalə' ca'.

33 Na' catə' ble'i Jeso'osən' chbež Marian' na' lecza chəsə'əbež beṇə' Jerosalen ca' nžague'enə', de'e juisy de'e goquene' na' bžaglaogüe' lo'o yichjla'ažda'ogüe'enə'.

34 Na' gože' lega'aque': —¿Ga əbcuašə'əlene'?

Na' lega'aque' gwse'ene': —Xanto', yo'o na' le'ido'.

35 Na' gwchež Jeso'osən'.

36 Na' gosə'əna beṇə' Jerosalen ca': —Le'e ggüiašč catequən' chaquene' che'.

37 Na' balə beṇə' ca' gosə'əne': —Le' ngan' bene' par nič ble'i beṇə' lchol' ca'. ¿Ecuí gaquən' žalə' bene' par nič cui gat Lačən'?

Jeso'osən' bosbane' Lačən' ladžo beṇə' guat ca'

38 Na' de'e yoblə de'e juisy de'e goque Jeso'osən' lo'o la'aždaogüe'enə'. Nach yoguə'əto' gwyejto' cho'a ban' len Jeso'osən'. Na' ban' naquən to bloj na' da' to yej cho'inə'.

39 Nach gož Jeso'osən': —Leca'a yejən'.

Na' Mart zan de'e beṇə' guatən' gože'ene': —Xana', bachla' ben' zban, la' bach goc tap ža ṇa'a gote'.

40 Na' gož Jeso'osən' le': —Bagwnia' le' šə chonlilažo'o nada' nach šejni'ido' bi zeje ca de'en gwlo'e Diozən' yelə' guac xen che'enə'.

41 Nach beṇə' ca' gosə'əque'e yejən'. Na' Jeso'osən' gwlis laogüe'en yobalə gwne': —Xa', choxcwleno' babzenago' chia'.

42 Nada' nezdə' de que syempr chzenago' chia'. Pero ənia' ca' par ničh beṇə' ca' ža' nga se'ejle'e de que len' əbselə'o nada'.

43 Na' beyož gwne' ca' lao orasyonṇə', belgüiže' de'e beṇə' guatən' gwne' zižjo gože'ene': —Lach bechoj.

44 Nach le'e bechojte Lachən', zjəncšeləyoy ni'a ne'e ca' cint de lachə' na' to bey nazjə laogüe'enə'. Na' gož Jeso'osən' lega'aque': —Le'e yozaše' lachə'ənə' na' le'e gwsane' yeyeje'.

Boso'oxi'e yesə'əzene' Jeso'osən'

45 Na' zan beṇə' Jerosalen ca' beṇə' ca' zja'ac len Marian' besə'əle'ine' miłagr de'en ben Jeso'osən' na' gwso'onlilaže'e le'.

46 Pero bale' ja'aque' lao beṇə' fariseo ca' jse'eže' lega'aque' can' bene' bosbane' Lachən'.

47 Nach bχoz əblao che ṇasyon Izrael cheton' na' beṇə' fariseo ca' besə'ətobe' yoguə'ələl beṇə' ca' chəsə'ənabia' ṇasyon cheton'. Nach boso'oxi'e gosə'əne': —¿Naclə gonchon'? la' miłagr zannə' chon benga.

48 La' šə gaquecho ljoye'enə', yoguə' beṇə' so'onlilaže'e le', nach da'ac beṇə' ṇasyon Roma

na' yoso'ožiaye'e yo'odao' əblao ɕhecho nga na' len n̄asyon ɕhechon'.

⁴⁹ Entr beṇə' golə beṇə' blao ca' toe' le Caifas na' naquəche' b̄xoz əblao ca izən'. Na' gože' lega'aque': —Le'e caguə bi nezenen'.

⁵⁰ Nic chonle xbab de que napən chio'o cuentən' tozə ben' gotcho lgua'a cuiayi' yoguə'əcho len n̄asyon ɕhecho nga.

⁵¹ Caifasən' naquəche' b̄xoz əblao ca izən' na' caguə con gwne' ca' to gwłazze'ənə'. Dioz nan' bene' par gw̄dix̄jui'e de que so'ote' Jeso'osən' por n̄asyon Izrael ɕheto'onə'.

⁵² Na' caguə so'ote'ene' par n̄asyon ɕheto' na'azənə'. Leczə so'ote'ene' par niɕh yoguə' beṇə' ca' bagwlej Diozən' par əque'e ca xi'ine' gatə'ətezə n̄asyon, yesyə'əyaque' tozə so'elaogüe'ene'.

⁵³ Na' ža na' gwzolao bosoxi'e naclən' so'one' par so'ote'ene'.

⁵⁴ Na' de'e nan' bitoch gwda Jeso'osən' zaquə'əlao entr beṇə' gwłaż ɕheto' ca'. Na' gwza'ato' gwyejto' to yež de'en nzi' Efrain, chi'in galə'əzə latjə dašən'. Na' gwzoto' na' len le'.

⁵⁵ Na' l̄ni pascw ɕhe neto' beṇə' Izrael bazon baozə. Na' beṇə' zan beṇə' za'ac to to yež ja'aque' Jerosalennə' antslə ze'e galə' l̄ni pascon' par gwso'on cuinga'aque' xi'ilažə' can' na lei ɕheto'onə'.

⁵⁶ Na' besyə'əyilje' Jeso'osən', na' ca nite'e chyo'o yo'odao' əblao ɕheton' gwse'e l̄juežje': —¿Bi xbab chontgualē? ¿əgüide' l̄ni nga?

⁵⁷ Gosə'əne' ca' ɕhedə' b̄xoz əblao ɕhe n̄asyon Izrael ɕheton' na' beṇə' fariseo ca' bagwso'one' mendad de que notə'ətezə beṇə' ənezene' gan'

zo Jeso'osən' gwzenene' lega'aque' par niçh
yesə'əzene'ene'.

12

Marian' chgü'e set zix ni'a Jeso'osən'

¹ Na' xop ža antslə lni pascon', gwyejlento'
Jeso'osən' Betanian' gan' zo Laçhən' ben' bosbane'
ladjo beṇə' guat ca'.

² Na' balə beṇə' Betania ca' bososi'ini'e to xše'
par Jeso'osən', na' Martən' bdie' de'en güe'ej gw-
daoto' len le'. Na' Laçhən' chi'e cho'a mesən' txen
len Jeso'osən' na' len neto' na' beṇə' ca' yela'.

³ Na' Marian' de tya set zix che' de'e
zaquə'achgüei na' gwlo'en ni'a Jeso'osən'. Na'
bxie' ni'enə' len yišə' yichje'enə'. Na' doxen yo'onə'
gwla'achgua ze set zixən' gwlo'e ni'enə'.

⁴ Na' zo Jod Iscariotən', ben' naquə' neto' txen.
Le'enə' banaquən əgwdie' Jeso'osən' lao na' beṇə'
ca' chəsə'əgue'i le'. Jodən' naque' xi'in to beṇə' le
Simon. Na' Jodən' gwne':

⁵ —¿Bixçhen' cui bete'e set zix nga? Zaquə'an do
tmil gueyə' gueyoa. Na' mechən' de'en le'ine' çhei
əgwnežjue'en beṇə' yašə' žalə' ca'.

⁶ Jodən' bene' xbabən' ca' caguə' por ni che
beyaše'ene' beṇə' yašə' ca' sino por ni che naque'
beṇə' bguan. Len' bexe'e mech de'en bçhin
yoguə'əto' na' gwlejlane' mechən'.

⁷ Nach Jeso'osən' gože'ene': —Ljoye'enə'. Babene'
de'en non gonene' nada' žan' əgaša'anə'.

⁸ Ca naquə' beṇə' yašə' ca', syempr nitə'əcze' len
le'e, pero nada' caguə' syempr soa' len le'e.

Bxoz əblao ca' bosoxi'e so'ote' Laçhən'

9 Na' beṇə' zan beṇə' Izrael gwlaž četon' gwsa'ache'ine' de que Jeso'osən' zoe' na'. Na' ja'aque', pero caguə por ni che Jeso'os na'azən', sino par besə'əle'ine' Lačən', ben' bosban Jeso'osən' ladjə beṇə' guat ca'.

10 Na' bχoz əblao che ṇasyon četon' leczə boso'oxi'e so'ote' len Lačən',

11 čhedə' beṇə' zan beṇə' Izrael gwlaž četon' ja'aque' na' gwsə'onlilaže'e Jeso'osən' por ni che le'.

Jeso'osən' beyo'e Jerosalennə'

12 Na' beteyo gwza'ato' Betanian' len Jeso'osən' na' gwyejto' Jerosalennə'. Na' ca orən' beṇə' zan čəsə'əžag Jerosalennə' beṇə' zja'ac lni pascon'. Na' gosə'əneze' de que Jeso'osən' yežine' Jerosalennə'.

13 Na' de'e na'anə' besə'əchoje' bedəsə'əleze' neto', zjənoxe'e no zin, na' čəsə'əgüe'e be' lban che' čəsə'əne': —Le' naco' Rei che ṇasyon Izrael čechon', goclenšga neto'. Sošgo' mbalaz le' baza'o nga, babselə' Xancho Diozən' le'.

14 Na' bžel to borr dao' bia gwžia Jeso'osən' lao zde'. Goc can' nyojczən nan:

15 Le'e ža'ale Jerosalennə' bito žeble.

Le'e ggüiašč baza' Rei čelen' žie' to borr dao'.

16 Na' neto' disipl che' bito gwyejni'ito' kategazə de que goc che' con can' boso'ozəj de'e profet ca' beṇə' ca' gwsə'e xtižə' Diozən' cana'. Gwde gwsə'ot beṇə' Jeso'osən' na' Diozən' be'ene' yelə' bala'an xen, na' canan' jəyeza'alažə'əto' dižə' ca' zjənyoj che' na' gocbe'ito' gwsə'one'ene' le' can' nyojənnə'.

17 Beṇə' ca' gwnitə' len Jeso'osən' catə'an bolgüiže' Lačən' na' bosbane'ene' par bechoje' lo'o ban' gwsə'e dižə' len beṇə' ca' ža' syodan' can' bene'enə'.

18 De'e na'anə' bedəsə'əleze'ene' čhedə' gosə'əņezene' ca milagr de'en bene'.

19 Na' gosə'əna beņə' fariseo ca' entr lega'aque': —Bachle'ile cuiczə bi de gonchon'. Yoguə' beņachən' zjəsə'ənao le'.

To chopə beņə' griego gwse'enene' əso'elene' Jeso'osən' dižə'

20 Na' zjəlen balə' beņə' griego, beņə' ja'ac līnə' par gwso'elaogüe'e Diozən'.

21 Beņə' quinga besə'əžine' gan' zo Lip beņə' Betsaida distrit che Galilean'. Na' gwsa'atə'əyoine' Lipən' gwse'ene': —Gwzi'ixenšga, chene'eto' güe'elento' Jeso'osən' dižə'.

22 Nach gwyej Lipən' jəye' Ndresən'. Nach Ndresən' len Lipən' jəsə'əye' Jeso'osən'.

23 Nach Jeso'osən' gože' lega'aque': —Na'a bachžin ža so'ot beņə' nada' par nič Diozən' gone' nada' yelə' bala'an xen. Len' bsele'e nada' golja' beņach.

24 De'e li əchnia' le'e, šə to trigon' cui yexinjən catə' əxopən lao yon', chega'aņczə tozən, pero šə yexinjən na' yela'an, de'e zan trigon' yeyaquən.

25 Notə'ətezə beņə' chaquene' gone' par nič cui čhi' saque'e o par nič cui no so'ot le', be'enan' cuiayi'. Na' notə'ətezə beņə' chsanlažə' cuine' čhi' saque'e o so'ot beņə' le' por ni čhia', bade yelə' mban zejlicane che'enə'.

26 Na' notə'ətezə beņə' chene'ene' gone' xšina'anə', čheyalə' gonlilaže'e nada' na' gwzenague' čhia'. Na' ga'an soa' na' so ben' gon xšina'anə'. Na' beņə' ca' so'on xšina'anə', Xa'anə' güe'e lega'aque' yelə' bala'an.

Jeso'osən' gwduxjue'e de que so'ot beņə' le'

27 Bachžaglaogua' lo'o yichjla'aždaogua'anə'. ¿Echaquele nabda' Xa'anə' yosle' nada' lao de'e ca' ze'e gaquə chia' na'a? Abi. Babida' par ničh gaquəczə chia' ca'anə'.

28 Nach bene' orasyonnə' gwne': —Xa', ben par ničh le' si'icho' yelə' bala'an.

Nach Diozən' ben' zo yoban' gwne' gože'ene': —Babena' ca gwxi'a yelə' bala'an, na' ze'e goncha' ca si'icha'anə'.

29 Benə' zan zjənžague' neto' ca orən' na' catə' gwse'enene' de'en gwna Diozən', bale' gosə'əne' de que gwñinnə'. Na' yebale' gosə'əne': —To anglən' əgwne le'.

30 Na' Jeso'osən' gože' neto': —Diozən' gwne' nada' zizjo caguə par ničh nada' ənezda' de que chzenague' chia'anə', sino par ničh əneze le'enə'.

31 Bachžin ža catə' Diozən' əgwnežjue' castigw zejlicane che beṇə' ca' cui zjənombia' le'. Na' bachžin ža catə' gwxiye'enə' de'en chnabia' beṇə' ca' cui zjənombia' Diozən' nit yelə' gwnabia' cheinə'.

32 Na' catə' gwso'ote' nada' le'e yag corozən', gona' par ničh yoguə'əlol beṇə' bagwlej Diozən' par əsa'aque' xi'ine' so'onlilaže'e nada'.

33 Na' de'e ngan' gwne' chzejni'ine' neto' de que so'ot beṇə' le' yoso'ode'ene' to le'e yag coroz.

34 Nach balə beṇə' zan ca' ža'anə' gwse'ene': —Neto' babeneto' choso'osed choso'olo'i beṇə' can' na Xtižə' Diozən' de'en nyojən, na' nezeto' nan de que Cristən' ben' gwlej Diozən' par gaquəlene' nasyon chechon' soe' zejlicane. Na' le' nao' de que Diozən' bsele'e le' goljo' beṇəch. ¿Bixchen' nao' le'

de que so'ot beṇə' le' to le'e yag coroz? ¿Ebselə' Diozən' le' goljo' beṇach'?

³⁵ Nach Jeso'osən' gože' lega'aque': —Nada' za'a par əchgua'a be'eni' lo'o yichjla'aždao' beṇachən'. Na' yeto term da'ogan' soa' par əgwsed əgwlo'ida' le'e. Le'e šejle' xtiža'anə' žlac ne'e de latjə par nič cui cuiayi'ile zejlicane. Beṇə' ca' cui chse'ejle'e xtiža'anə' bito chsa'acbe'ine' de que yesə'əbiayi'e. Zjənaque' ca to beṇə' chda gan' naquə žchol na' bito chacbe'ine' gan' chde'.

³⁶ Le'e gonlilažə' nada' na'a žlac ne'e de latjə par nič šo'o be'eni' chian' lo'o yichjla'ažda'olen' na' par nič əgwnežjwle be'eni' che yeziquə'əchlə beṇə'. Gwde gwna Jeso'osən' ca' beze'e bocuaše'ene' lega'aque'.

Zan beṇə' Izrael ca' bito gwso'onlilaže'e Jeso'osən'

³⁷ La'anə'əczə besə'əle'i beṇə' Izrael gwlaž cheton' ben Jeso'osən' zan miagr, casi yogue'e bito gwso'onlilaže'ene'.

³⁸ Na' de'en goc ca' goc complir can' bzoj de'e profet Isaiazən' ben' be' xtižə' Diozən' cana', nan: Xanto', casi notono no choso'ozenag dižə' de'en chyixjue'eto'onə'.

Na' casi notono chsa'acbe'i de que babesə'əle'ine' blo'o yelə' guac chio'onə'.

³⁹ Bito goquə se'ejle'e, chedə' chac chega'aque' can' na yeto de'en bzoj de'e profet Isaiazən', nan:

⁴⁰ Diozən' babene' par nič nažjo yichjla'aždao' beṇə' quinga na' par nič zjənaque' beṇə' godenag.

Babene' par ničh chəsə'əle'ine' pero
cabi chsa'acbe'ine' bi zejen de'en
chəsə'əle'ine'enə',

na' chse'enene' pero bito chse'ejni'ine' bi zejen
de'en chse'enene'enə'.

Gosyə'ədinjljei xtolə'əga'aque'enə na' gwso'elje'
latjə yocobə Diozən' yichjla'ažda'oga'aque'enə'
žalə' chse'ejni'ine'en na' žalə' chsa'acbe'ine'
bi zejen.

⁴¹ De'e quinga gwna de'e profet Isaiazən' chedə'
ble'ine' yelə' chey che'eni' che Jeso'osən' na' be'e
dižə' che'.

⁴² Lə'anə'əczə beṇə' zanch lao nasyon Izrael
cheton' bito gwse'ejle'e che Jeso'osən', bia'aczə
zane' gwso'onlilažə'ene', na' len no beṇə' gwnabia'
četo' ca'. Pero na' bito gwso'e dižə' de que
chso'onlilažə'ene' chedə' besə'əžebe' cabich əso'e
beṇə' fariseo ca' latjə par so'e lo'o yo'oda'onə'.

⁴³ Gwse'enchene' so'e beṇə'achən' lega'aque' yelə'
bala'an cle ca so'one' ca güe' Diozən' lega'aque' yelə'
bala'an.

Xtižə' Jeso'osən' zjənaquən de'e žialao xen

⁴⁴ Na' Jeso'osən' gwne' zižjo gože' lega'aque':
—Beṇə' ca' chso'onlilažə' nada' caguə nadə'əzan'
chso'onlilažə'e sino lenczə Xa'anə' ben' əbselə'
nada'.

⁴⁵ Ben' chle'i nada' leczə chle'ine' Xa'anə' ben'
bselə' nada'.

⁴⁶ Nada' za'a yežlyo nga par ničh chgua'a be'eni'
lo'o yichjla'aždao' beṇə' ca' chso'onlilažə' nada'.
Chgua'a be'eni' lo'o yichjla'ažda'oga'aque'enə' par
ničh cuich so'ontezə so'one' de'e malən'.

47 Na' notə'ətezə beṇə' chse'ene xtiž'a'anə' na' bito choso'ozenague' chei caguə nada' choglaogua'an chęga'aque' de que zjənapē' dolə, chedə' bito za'a yežlyo nga par nič choglaogua'an che beṇačhən' de que zjənapē' dolə' sino par nič gona' ca cui žjəya'aque' lao yi' gabilən' šə so'onlilaže'e nada'.

48 Xtiž'a'anə' de'en babi'a len lega'aque' choglaon chęga'aque' de que zjənapē' dolə' chedə' bito chse'ejle'e chia' na' nic choso'ozenague' che xtiž'a'anə'. Choglaon chęga'aque' de que zjənapē' dolə' catə' əžin ža šo'o fin che yežlyon'.

49 Dižə' de'en babi'anə' bito bi'an de'e bia'azəlaža'a. Xa'anə' bsele'e nada' na' le'enə' none' mendad bin' cheyalə' nia' na' bin' əgwswed əgwlo'ida' beṇə'.

50 Na' notə'ətezə beṇə' yoso'ozenag che xtižə' Xa'anə' de'en none' mendad cho'elena' beṇačhən', əgwnežjue' yelə' mban zejlīcane chęga'aque'. De'e na'anə' cho'elena' le'e dižə' con can' bagwna Xa'anə'.

13

Gwdib Jeso'osən' ni'a disipl che' ca'

1 Na' ca naquə Jeso'osən', bedote chaquene' che neto' chonlilažə'əto' le' yežlyo nga. Na' nezene' de que bachžin ža yeze'e yežlyo nga par yeyeje' gan' zo Xe'enə'. De'e na'anə' catə' ze'e za'alə lni pascon' blo'ichene' neto' can' lechgualę chaquene' cheto'.

2 Na' bač gwlo'o gwxiye'enə' xbabən' lo'o yičjla'aždao' Jod Iscariot xi'in Simonṇə' par əgwdie' Jeso'osən' lao na' beṇə' contr che' ca'.

3 Na' neze Jeso'osən' de que Xe'enə' babene' par nič nape' le'ezelaogüe yelə' chnabia' xen, na'

nezene' de que gan' zo Dioz nan' gwze'e na' gan' zo Dioz nan' yeyeje'.

⁴ Na' lao chaoto' xše'enə' Jeso'osən' gwzože'e na' gwcua'a xadoṅ che'enə' na' gwxi'e to lachə' na' bcheje'en lsine'enə'.

⁵ Nach gwxi'e nisən' gwde'en to lo'o ša' na' gwzo-laogüe' gwdibe' ni'ato'onə' ca to mos. Na' bosbiže' ni'ato'onə' len lachən' de'e nchej lsine'enə'.

⁶ Na' catə' bžine' gan' chi' Simon Bedən', Bedən' gože' le': —Xana' žəle' chibo' ni'anə'?

⁷ Na' gož Jeso'osən' le': —De'e nga chona' cabi chejni'ido'on na'a, pero gwyejni'ido'on telə.

⁸ Na' gož Bedən' le': —Le' cuat chibo' ni'anə'.

Na' Jeso'osən' gože'ene': —Šə cui ga'a chiba' le' caguə leno' nada'anə'.

⁹ Na' Bedən' gože'ene': —Xana' caguə ni'a na'azən', sino doxencza'.

¹⁰ Nach gož Jeso'osən' le': —Benə' nošə' nazjə, ni'e na'azə chyažje chibe', la' banaquəczə doxen cuerp che'enə' xi'ilažə'. Ca naquə le'e ža, naquəczle xi'ilažə' la'aṅə'əczə caguə yoguə'əle.

¹¹ Jeso'osən' nezene' non' əgwde le' lao na' benə' contr che' ca', na' de'e na'anə' gwne': “Caguə yoguə'əle nacle xi'ilažə'”, na' zejen caguə yoguə'əto' naquəto' benə' la'aždao' xi'ilažə'.

¹² Na' catə' beyož gwdibe' ni'ato'onə', na' beyaz xadoṅ che'enə' na' bebi'e de'e yoblə cho'a mesən'. Na' gože' neto': —žEchejni'ile bi zejen de'en babena' len le'e?

¹³ De'e nga zejen. Le'e nsi'ile nada' Maestr na' Xanle, na' güencən' nale chedə' can' naca'.

14 Na' nada' naca' Xanlen' na' nactia' Maestr chelen' bagwdiba' ni'alen' ca to mos, de'e na'anə le'e lecəə cheyalə' gaquəlen ljuežjle ca to mos.

15 Bagwdiba' ni'alen' parzə nič gwlo'ida' le'e de que cheyalə' gonle can' babena'anə'.

16 De'e li əchnia' le'e notə'ətezə mos bito naque' blaoch ca xane'enə', ni ben' chej mendadən' cui naque' blaoch ca ben' chselə' le'.

17 Šə chejni'ile de'e quinga na' gonle can' nia'anə', nachən' sole mbalaz.

18 Caguə nia' ca' che yoguə'əlen'. Nada' nezda' nac naquə yichjda'aždao' le'e bagwleja' par nacle disipl chia'. Pero na' gwleja' le'e par nič gaquə complir can' na Xtižə' Diozən' de'en nyojən nan: "Be'en gwdaolena' txen bablej bšošje' nada'."

19 Nada' əchnia' le'e de'e nga na'a antslə cuinə' gaquən, par nič catə' gaquən šejle'ele de que nada' naca' ben' bagwnia' le'e.

20 De'e li əchnia' le'e ben' cho'elao' notə'ətezə beṇə' əchselə'a, nada'anə' cho'elaogüe'e. Na' ben' cho'elao' nada', ben' əbselə' nada' na'anə' cho'elaogüe'e.

Jeso'osən' be'e dižə' che ben' naquən əgwde le' lao na' beṇə' ca' chəsə'əgue'i le'

21 Beyož gwna Jeso'osən' de'e ca' bachžaglaogüe' lo'o yichjla'aždaogüe'enə', na' gwne' clar: —De'e li əchnia' le'e de que to le'e əgwdele nada' lao na' beṇə' ca' chəsə'əgue'i nada'.

22 Nach neto' bgüia lao ljuežjto' chaqueto' noto' chein' ne' ca'.

23 Nach nada' chi'a cuite'enə' chedə' chacchgüeine' chia'.

24 Na' Bedən' bene' seňy len nada' par ničh gwnabda' Jeso'osən' no chein' gwne' ca'.

25 Nach bgüiga'a bao goža' Jeso'osən': —Xana', ĩnon'?

26 Nach gož Jeso'osən' nada': —Be'en əgwnežjua' to pedas yetən' catə' bablo'oja'an xojən', le'enə'.

Nach blo'oje' yetən' xojən' na' bnežjue'en Jod Is-cariot xi'in Simonŋə'.

27 Na' beyož bnežjue' Jodən' yetən' le'e gwyo'o gwyazte Satanasən' de'en chnabia' de xio' ca' lo'o yichjla'aždao' Jodən'. Nach Jeso'osən' gože'ene': —De'en gono'onə' benən lgüegwzə.

28 Na' ni to neto' ža'ato'onə' cui gwyejni'ito' bixchen' gože' le' ca'.

29 Jodən' noxe'e bols mechən' na' de'e na'anə' baləto' bento' xbab de que Jeso'osən' gože' le' šeje' žjəxi'e de'e chyažjeto' lao lnin' o de que cheyalə' əgwnežjue' latə' mechən' beŋə' yašə' ca'.

30 Na' catə' beyož gwdao Jodən' pedas yetən' de'en bnežjw Jeso'osən' le', le'e bchojte'. Na' ca orən' bagol.

To de'e cobə de'e non Jeso'osən' mendad goncho

31 Na' gwde bchoj Jodən' Jeso'osən' gwne': —Diozən' bsele'e nada' golja' beŋəch, na' ŋa'a so'ot beŋə' nada' na' gone' nada' yelə' bala'aŋ xen. Na' leczə Diozən' si'e yelə' bala'aŋ xen ca de'en gaquə chia'.

32 Na' ca naquə Diozən' si'e yelə' bala'aŋ ca de'en gaquə chia', leczə le'enə' gone' nada' yelə' bala'aŋ, na' le'e solaote gone' nada' yelə' bala'aŋnə' ŋa'a.

33 Xi'indaogua'a, yešlož da'ogan' soa' len le'e. Na' yeyilje nada', na' can' goža' beŋə' blao che ŋasyon

Izrael chechon', leczə can' əchnia' le'e na'a de que gan' yeya'a bito gaquə sa'alēnle nada'.

³⁴ Nach to de'e cobə chona' mendad gonle, de que gaque che ljuēžjle tole yetole can' chacda' chele, leczə can' le'e gaque che ljuēžjle tole yetole.

³⁵ Na' yesə'əneze yoguə'əlol benə' de que nacle disipl chia' šə gaquele che ljuēžjle tole yetole.

Jeso'osən' ne' de que Bedən' cui chebe' de que nombi'ene'

³⁶ Na' gož Bedən' le': —Xana', ¿gan' yeyejo'?

Na' gož Jeso'osən' le': —Gan' yeya'a bito gaquə denaogo' nada' na'a, pero telə denaogo'.

³⁷ Na' gož Bedən' le': —Xana' ¿bixchen' cui gaquə denaogua' le' na'a? Gwsanlažə' cuina' so'ot benə' nada' laogüe de'en chacda' chio' šə chonclən byen.

³⁸ Na' gož Jeso'osən' le': —¿Echacdo' gwsanlažə' cuino' so'ot benə' le' laogüe de'en chacdo' chia'? De'e li əchnia' le' de que bito cuež lecon' antslə ze'e gaquə šon las cui chchēbo' de que nombi'o nada'.

14

Benə' ca' chso'onlilažə' Jesocristən' zjanombi'e Xe' Diozən'

¹ Bito gaquəžəjlažə'əle chia' nada'. legonlilažə' Diozən', na' leczə legonlilažə' nada'.

² Gan' zo Xa' Diozən' naquən ca to yo'o xen gan' ža' de'e zan quart. Gwnia' le' žalə' cui bi quart de par le'e. Na' yeya'a žjəyeyenšaogua'a quart par to tole.

³ Na' catə'ən babeyož jəyeyenšaogua'a quart chelen', yida' yetši'i na' yechi'a le'e socho txen par nich gan' soa' na' so le'e.

4 Banombi'ale gan' yeya'a na' baņezele naquān' gonle par yeda'acle na'.

5 Na' gož Tomasān' le': —Xanto', bito ņezetō' gan' yeyejo'. ĶNa' nacxa gaquān' āņezetō' nac gonto' par yela'ato' na'?

6 Jeso'osān' gože'ene': —De'en cheyalā' gonle gonlilažā'āle nada' par niĉ yežinle gan' zo Xa'anā'. Nada' ņezda' na' chzejni'ida' yoguā'āloļ de'en naquā de'e li che Diozān'. Na' nada' nsā'a yelā' mban zejlicane par beņā' ca' chso'onlilažā' nada'. Ni to cono yežin gan' zo Xa'anā' šā cui gonlilaže'e nada'.

7 Žalā' nombi'ayanā'āle nada', lente Xa'anā' nombi'ale žalā' ca'. Na' dezd ņa'a banombi'alene' na' bable'ilene'.

8 Na' gož Lipān' le': —Ben par niĉ le'ito' Xa'onā'. Lezān de'en chene'eto'.

9 Jeso'osān' gože'ene': —Lip, sša xen bagwzoa' len le'e, Ķāna' cuiņā' gombi'o nada'anā'? Notā'atezā beņā' bable'i nada' lenczā Xa'anā' bable'ine'. ĶBixĉen' nao' gona' par niĉ le'ile Xa'anā'?

10 ĶEcuī chejli'o de que nada' zoa' len Xa'anā' na' Xa'anā' zoe' len nada'? Dižā' quinga cho'a nada', caguā cho'an de'e bia'azālaža'anā'. Xa' na'anā' zoe' len nada' na' len' chone' par niĉ cho'a dižā' quinga na' chona' yoguā'āloļ de'en chona'.

11 Le'e šejle' ĉhia' ca de'en āņia' de que zoa' len Xa'anā' na' le' zoe' len nada'. Na' šā cui chejle'ele xtiža'anā', le'e šejle' ĉhia' por ni che de'en bable'ile chona'anā'.

12 De'e li āchnia' le'e ben' chonlilažā' nada', ca de'e ca' chona' leczā gone'en. Na' de'e zaquā'āch ca de'e ca' gone' ĉhedā' nada' yeya'a gan' zo Xa'anā'.

13 Na' yoguə' de'e ə̃nabele X̣a'anə' gona' laogüe de'en chonlilažə'əle nada', gona'an par niç X̣a'anə' si'e yelə' bala'an ca de'en gona' naca' Xi'ine'.

14 Bitə'ətezə de'e ə̃nabele gona' por ni che de'en chonlilažə'əle nada', nada' gona'an.

Jeso'osən' bene' lyebe sele'e Spirit che Diozən'

15 Šə chaquele chia' cheyalə' gonle can' nona' mendad gonle.

16 Na' nabda' X̣a'anə' par əsele'e Spirit che'enə' len le'e par gaquəlenən le'e can' babena' nada'. Na' son len le'e zejlicane. Spirit che Diozən' əgwzejni'in le'e de'en naquə de'e li.

17 Beṇə' ca' cui zjənombia' Diozən' bito chso'elaogüe'e Spiritən' chedə' bito chesə'əle'ine'en na' nic zjənombi'en. Pero le'e nombi'alen chedə' zon len le'e ṇa'a na' gwžin ža catə' son lo'o la'ažda'olen'.

18 Bito gwcua'aṇa'a le'e ca gozebə. Güida' yeto nga gan' zole.

19 Na' yešlož da'ozə na' beṇə' ca' cui zjənombia' Diozən' cabich yesə'əle'ine' nada', pero le'e gwle'ile nada'. Na' laogüe de'en zoa' nsa'a yelə' mban zejlicane che beṇə' chso'onlilažə' nada', de'e na'anə' le'e sole zejlicane.

20 Na' catə' əžin ža la' Spirit che Diozən' son lo'o la'ažda'olen' canan' ə̃nezele de que nada' zoa' len X̣a'anə', na' le'e zole len nada', na' nada' zoa' len le'e.

21 Ben' neze can' nona' mendad na' chone' can' əni'anə', bena'an chaque chia'. Na' ben' chaque chia' leczə chaque X̣a'anə' che', na' gwzochcza' gaquəda' che' na' gona' par niç ə̃nezene' de que zotezə zoa' len le'.

22 Na' Jodən' pero caguə Jod Iscariotən' gože' le': —Xanto' ĵbixchen' gono' par niĉ neto' le'icheto' le' na' cui gono' par niĉ beṇə' yoblə yesə'əle'ichene' le'?

23 Na' Jeso'osən' gože'ene': —Le'e chaquele ĉhia' chzenagle xtiža'anə'. Na' Xa'anə' leczə chaque'ne' ĉhele na' neto' desoto' len le'e.

24 Beṇə' ca' cui chsa'aque ĉhia' bito choso'ozenague' xtiža'anə'. Dižə' de'en chenele ənia' le'e, caguə cho'an de'e bia'azəlaža'anə', sino cho'a dižə' de'en chene'e Xa'anə' ben' əbselə' nada'.

25 De'e quinga bagwnia' le'e žlac ne'e zoa' len le'e.

26 Na' Xa'anə' əsele'e Spirit ĉhe'enə' son lo'o la'aždao' le'e chonlilažə'əle nada' niĉ gaquəlenən le'e. Na' Spiritən' əgwzejni'in le'e yoguə'əloḷ de'en cheyalə' ənezele na' gonən ca žjəyeza'alažə'əle yoguə'əloḷ de'en bagwnia' le'e.

27 Chona' par niĉ so cuezle binlo len xbab de'en yo'o lo'o yichjla'ažda'olen' ca binlo zo chbeza' len xbab de'en yo'o lo'o yichjla'aždaogua'anə'. Nada' chona' ca zo chbezəchle binlo len xbab de'en yo'o lo'o yichjla'ažda'olen' cle ca chso'on beṇəĉən' par so cuezle binlo len xbab de'en yo'o lo'o yichjla'ažda'olen'. Bito gaquəžejlažə'əle, nic žeble.

28 Babenele can' bagwnia' de que yeya'a gan' zo Xa'anə', na' de que yida' de'e yoblə gan' zolen'. Žalə' chaquele ĉhia' can' cheyalə'ənə', gobeile de'en yeya'a, ĉhedə' Xa'anə' zaquə'əche' ca nada'.

29 Na'a ža bagwnia' le'e de'e ca' antslə cuiṇə' sa'acquən par niĉ catə' sa'acquən šejle'ele de que naca' ben' bagwnia' le'e.

30 Bitoch gua'a dižə' zan len le'e ĉhedə' baza' gwxiye' de'en chnabia' beṇə' ca' cui chso'onlilažə'

nada' na' tilalenən nada'. Pero bito soin nada'.

³¹ Chona' con can' non Xa'anə' mendad par niç əneze benəçən' de que chacda' che Xa'anə'. Na'a ža lešo'o šejəchcho.

15

Jeso'osən' gwxaquə'əlebene' ca to yag oba

¹ Nada' gwxaquə'əlebəda' ca to yag oba de'en naquə le'ezelaogüe yag zaque'e. Xa'anə' gwxaquə'əlebene' ca ben' chonši'i yaguən'.

² Na' le'e chonlilažə'əle nada' gwxaquə'əlebele ca xozə' yaguən'. To to xoze'e ca' cui bi frot chbian, chçogüe'en. Na' to to xoze'e ca' de'e chəsə'əbia frot, chpe'en par niç chbiachən frot zanch.

³ Can' banaquə yichjla'ažda'olen' chedə' chzenagle xtiža'anə' de'en babi'a len le'e.

⁴ Lesotezə leso len nada' par niç nada' gaquə sotezə soa' len le'e. Ca che xozə' yag frotən', bito bi frot cuian to gwłazzen šə cui zon nca'an le'e yaguən', can' naquən len le'e, bito gaquə gonle de'en chazlažə' Diozən' šə cui sotezə sole len nada'.

⁵ De'e yoblə əhia' de que nada' gwxaquə'əlebəda' ca yag oban' na' le'e ca xoze'enə'. Notə'ətezle šə zotezə zole len nada' na' nada' zotezə zoa' len le'e, gonçgualde de'en chazlažə' Diozən'. Pero cuiczə gac gonle de'en chazlaže'enə' to gwłazle.

⁶ Beṇə' cui zotezə zo len nada' əhoje' ca'alə, ca che xozə' yag oban' de'e ca' chçog ben' chonši'i yaguən' na' chəsə'əbižən. Nach chtobe'en chade'en yi' par chse'eyən.

7 Šə le'e zotezə zole len nada' na' šə yo'o yichjle xtiža'anə' do tyempte, bitə'ətezə de'e chene'ele ənable len orasyonnə' de'e si'iczlənə'.

8 Yelə' bala'an chzi' Xa'anə' catə'an chonchguale can' chazlaže'enə', na' bačh chlo'ele de que chonlilažə'əle nada' na' chzenagle chia' can' cheyalə' gonle šə bachonchguale de'en chazlaže'enə'.

9 Ca Xa'anə' chaqueene' chia', leczə ca' nada' bachacda' chele. Le'e so legon ca gacbe'ile de que chacda' chele.

10 Šə chonle can' nona' mendadən', nachən' gacbe'ile de que chacda' chele, ca nada' chona' can' non Xa'anə' mendadən' na' chacbe'ida' de que chaqueene' chia'.

11 Bagwnia' le'e ca' par ničh sole mbalaz ca mbalazən' zoa' nada'. Che'enda' sole mbalaz juisy.

12 De'e nga chona' mendad gonle, gaquele che ljuežjle tole yetole can' chacda' chele.

13 Notono nla' beṇə' chaquechene' che ljuežje' mazəchlə can' chaque ben' chsanlažə' cuine' so'ot beṇə' le' par gaquəlene' beṇə' migw che' ca'.

14 Le'e nacle migw chia' šə chonle can' nona' mendadən'.

15 Bitoch ənia' le'e mos chia' chedə' beṇə' zjənaquə mos bito zjənezene' bi chon xanga'aque'enə'. Bania' le' migw chia', chedə' yoguə'əloḷ de'e ca' babenda' gwna Xa'anə' babzejni'ida'an le'e.

16 Caguə le'e gwlejjle nada' par naca' Xanle. Nada' bagwleja' le'e par chonlilažə'əle nada'. Na' chselə'a le'e par ničh šejəchle gonchguale can' chazlažə' Xa'anə' na' caguə de'e te che de'e ca' gonlen'. Na'

šə gonle can' chazlaže'enə', yoguə'əlol de'en ənabele
 Xa'anə' laogüe de'en chonlilažə'əle nada', gone'en.

17 De'e nga de'en chona' mendad gonle, de que
 gaquele che lježjle tole yetole.

*Beṇə' ca' cui zjənombia' Diozən' chəsə'əgue'ine'
 beṇə' ca' choso'ozenag che Jeso'osən'*

18 Bito yebanele de'en chəsə'əgue'i beṇə' ca'
 cui zjənombia' Diozən' le'e. Legon xbab de que
 zgua'atec nadan' besə'əgue'ine' antslə ca le'e.

19 Žalə' nacle txen len beṇə' ca' cui zjənombia'
 Diozən', gwsa'aquene' chele can' chsa'aquene' che
 beṇə' ca' zjənaque' txen. Nada' bagwleja' le'e par
 naole nada', na' bitoch nacle txen len beṇə' ca' cui
 zjənombia' Diozən', na' de'e na'anə' chəsə'əgue'ine'
 le'e.

20 Le'e žjsa'alažə' de'en bagwnia' le'e: "Notə'atezə
 mos bito naque' blaoch ca xane'enə'." Can'
 baboso'olagzejə bosə'olagzide' nada', leczə
 can' yoso'olagzejə yoso'olagzide' le'e. Žalə'
 bosə'ozenague' xtiža'anə', leczə gosə'əzenague'
 xtižə'əlen'.

21 Nə' yoguə' de'e ca' so'one' len le'e chedə' le'e
 chonlilažə'əle nada' na' lega'aque' bito zjənombi'e
 Xa'anə' ben' bselə' nada'.

22 Žalə' nada' cui bida', na' žalə' cui bia'a dižə'
 len lega'aque', bito zjənape' dolə' ca naquən'
 chəsə'əgue'ine' nada'. Na' na'a cuiczə bi de bi
 yoso'ode'ine' par yesə'əne' cui bi dolə' zjənape'.

23 Ben' chgue'i nada', lenczə Xa' nan' chgue'ine'.

24 Žalə' cui bena' entr lega'aque' miłagr de'e cuinə'
 gon ni to beṇə' yoblə, bito zjənape' dolə' ca naquən'
 chəsə'əgue'ine' nada'. Pero na'a babesə'əle'ine' de'e

ca' chona' na' bia'aczə chəsə'əgue'ine' nada' na' len Xa'anə'.

²⁵ Pero na' chac ca' par niçh chac complir can' na Xtižə' Diozən' gan' nyojən nan: “Besə'əgue'ine' nada' sin cui bi bi de'e mal bena'.”

²⁶ Bagwnia' le'e de que selə'a Spirit che Xa' Diozən' par gaquəlenən le'e na' par əgwzejni'in le'e de'en naquə de'e li. Spiritən' sa'an gan' zo Xa'anə' la' selə'an par güe'en xtižə'anə'.

²⁷ Na' leczə ca' le'e güe'ele xtižə'anə', çhedə' bagwzole len nada' dezd catə'ən gwzolaə chyixjui'a xtižə' Xa' Diozən'.

16

¹ Bagwnia' le'e de'e ca' par niçh cui yebiguə'əle gosxanlə.

² Yesyə'əbeje' le'e lo'o yo'odao' çhega'aque' ca'. Na' bazon əžin ža catə' notə'ətezə benə' se'enene' so'ote' le'e so'one' xbab yebei Diozən' lega'aque' de'en so'one' ca'.

³ So'one' ca' len le'e çhedə' cui zjənombi'e Xa'anə' na' ni nada' cui zjənombi'e.

⁴ Na' bagwnia' le'e ca' par niçh catə' əžin ža gac ca' žjəsa'alažə'əle de que bagwnia' le'e can' gaquən.

De'e chon Spirit che Diozən'

Catə'ən gwleja' le'e par nacle disipl chia' bito gwnia' le'e yoguə' de'e ca' gac chele, çhedə' gwņezda' socha' len le'e.

⁵ Na' la'anə'əczə yeya'a na'a gan' zo Xa'anə' ben' əbselə' nada', ni tole cui chņabele nada' bi zejen de'en yeya'anə'.

⁶ Na' de'en bagwnia' le'e de'e ca' bachacchgüeile lo'o la'ažda'olen'.

⁷ Pero de'e li əchnia' le'e napən le'e cuent yeya'a, la' šə cui yeya'a Spirit che Diozən' de'en gaquəlen le'e bito yedəson lo'o la'ažda'olen'. Na' de'en yeya'anə' əselə'an len le'e.

⁸ Na' catə'əch yidə'an əgwzejni'in benəchən' de que zjənapə' dolə', əgwzejni'in lega'aque' de que naca' le'ezelaogüe benə' güen, na' əgwzejni'in lega'aque' de que gatə' castigw zejlicane che notə'ətezə benə' cui choso'ozenag chia'.

⁹ Egwzejni'in lega'aque' de que zjənapə' dolə' de'en cui chso'onlilaže'e nada'.

¹⁰ Egwzejni'in lega'aque' de que naca' le'ezelaogüe benə' güen chedə' yeya'a gan' zo Xa'anə' na' bitoch le'ile nada'.

¹¹ Na' əgwzejni'in lega'aque' de que gatə' castigw zejlicane che notə'ətezə benə' cui choso'ozenag chia', chedə' gwxiye' de'en chnabia' benə' ca' cui zjənombia' Diozən' banchoglaon chei de que si'in castigw zejlicane.

¹² Nedech de'e zan de'e ənia' le'e, pero zdebə naquən na'a par šejni'ilen.

¹³ Pero catə' yedəso Spirit che Diozən' lo'o la'ažda'olen' par əgwzejni'in le'e de'en naquə de'e li, əgwsed əgwlo'in le'e yoguə'əlo' de'en cheyalə' ənezele chia' nada'. Bito güe'en dižə' de'e bia'azəlaže'i sino güe'en bitə'ətezə dižə' de'en chzene Xa'anə' len na' chixjue'in le'e biquə' de'e ze'e za'ac.

¹⁴ Goṇən nada' yelə' bala'an, chedə' əgwzejni'in le'e chia' nada'.

¹⁵ Xa'anə' babene' ca nezda' yoguə'əlo' de'en nezene' na' de'e na'anə' gwnia' de que Spirit che'enə' əgwzejni'in le'e de'e ca' nezda'.

Jeso'osən' gože' disipl che' ca' de que nite'e trist to tyemp dao' na' techlə yesyə'əbeine'

16 Yeto tyemp dao' le'e bitoch le'ile nada'. Na' techlə yeto tyemp dao' yoblə na' yezle'ile nada' nach yeya'a gan' zo Xa'anə'.

17 Na' balə neto' disipl che' gož ljuežjto': —¿Bi zejen de'e nga che'e chio'o de que yeto tyemp da'ozə na' bitoch le'ichone' na' de que techlə yeto tyemp dao' yoblə na' yezle'ichone'? ¿Na' bi zejen de'en ne' yeyeje' gan' zo Xe'enə'?

18 ¿Bi zejen de'en ne' yeto tyemp da'ozə ža? Cuili bixchen' ne' ca'.

19 Na' gocbe'i Jeso'osən' de que chene'eto' nabeto'one' bi zejennə', na' gože' neto': —¿Ede'e ngan' de'en chnabe ljuežjle? ¿Echene'ele ənezele bi zejen ca de'en gwnia' le'e de que yeto tyemp da'ozə na' bitoch le'ile nada', na' techlə yeto tyemp dao' yoblə na' yezle'ile nada'?

20 De'e li chnia' le'e de que bazon cuežle na' yegüine'ele na' beṇə' ca' cui zjənombia' Diozən' yesyə'əbeine'. Yeyašə'əlažə'əle pero con to tyemp da'ozən' na' techlə yebeile.

21 Šə catə' chzan to no'olə, chžaglaogüe' lao chaque' bes che yelə' sannə'. Pero na' catə' bagoljə bda'onə' bitoch chone' xbab che de'en bžaglaogüe'enə' de'e tant chebeine' de que bagoljə yeto beṇəch yežlyo nga.

22 Leczə can' len le'e, na'a sole trist, pero catə' yežagcho de'e yoblə cana' yebeile lo'o la'ažda'olen'. Na' ni to cono yeca'a yelə' chebei chelen'.

23 Na' catə' babžin ža soa' gan' zo Xa'anə' de'e yoblə bito yažjele bi ənable gona' par le'e. De'e li

əchnia' le'e bitə'ətezə de'e ənabele Xa'anə' laogüe de'en chonlilažə'əle nada', goņe'en par le'e.

²⁴ Xte na'a cuiczə bi ne'e nabele Xa'anə' ye'elene' de que chnablen por ni che de'en chonlilažə'əle nada'. Na' na'a lenabe Xa'anə' bi de'en ənabelene' ye'elene' ca', na' gone' can' ənabelene' par ničh sole mbalaz juisy.

Jesocrisən' babene' par ničh gwxiye'enə' cuich nabi'an chio'o

²⁵ De'e zan de'e ca' bagwnia' le'e babzejni'ida'an len jempl. Ežin žan' catə' bitoch əgwzejni'ida' le'e len jempl sino clar chixjue'ida' le'e che Xa'anə'.

²⁶ Na' catə' babžin ža soa' gan' zo Xa'anə' de'e yoblə, cana'ach ənabele Xa'anə' bi de'en ənabelene' ye'elene' de que chnablen por ni che de'en chonlilažə'əle nada'. Na' bito ənia' le'e de que nada' naba' lao Xa'anə' par ničh gaquəlene' le'e.

²⁷ Cuinczə Xa'anə' chaquene' chele por ni che de'en bachequəle chia' na' de'en bachejle'ele de que gwza'a gan' zoe'enə'.

²⁸ Gan' zo Xa'anə' gwza'a babida' yežlyo nga. Na' na'a yeza'a yežlyo nga na' yeya'a gan' zo Xa'anə'.

²⁹ Na' neto' disipl che' gožto'one': —Na'a cho'o dižə'an clar. Bito cho'o dižə' len jempl de'e cui chejni'ito'.

³⁰ Na' chache'ito' de que nez nle'ido' xbab che benachən'. Bito chyaždo' no əna le' bin' chse'ene'ene' yesə'ənezene'. De'e na'anə' chejle'eto' de que gwza'o gan' zo Diozən'.

³¹ Na' gwna Jeso'osən' neto': —ĵEna'a chejle'ele ža?

³² Gwžin or na' na'a baza'an catə' gasə'əlasle. To tole ca'ale xnez che chele na' əgwcuə'anle toza'. Pero caguə zoa' toza'anə' chedə' Xa'anə' zoe' len nada'.

³³ Bagwnia' le'e ca' par nič so cuezle binlo len xbab de'e yo'o lo'o yičhja'ažda'olen' laogüe de'en chonlilažə'əle nada'. Yežlyo nga či' saquə'əle, pero bito žeble, nada' babena' par nič gwxiye'enə' cuich nābia'an le'e.

17

Jeso'osən' bene' orasyon par nič gaquəlen Diozən' disipl che' ca'

¹ Gwde gwna Jeso'osən' ca', bgüie' yobalə na' gwne': —Xa', babžin or par gaquə chia' can' babžio' bia' gaquə. Ben nada' yelə bala'an par nič leczə ca' nada' gona' le' yelə' bala'an, nadan' naca' Xi'ino'.

² Babeno' nada' yelə' chnabia' lao yoguə' beṇač par nič chnežjua' yelə' mban zejlicane che yoguə'əlo' noquə' beṇə' ca' bagwlejo' par chso'onlilaže'e nada'.

³ Na' beṇə' ca' zjənapə yelə' mban zejlicanen' zjənombi'e le' ca tozon' zaco'o par güe'ela'oto', na' leczə zjənombi'e nada' Jesocrist ben' əbselo'onə'.

⁴ Babena' le' yelə' bala'an yežlyo nga ca de'en babeyož bena' yoguə'əlo' de'en gwlo'o lao na'a gona'.

⁵ Na'a ža Xa', ben par nič yezi'a yelə' bala'an chia'anə' catə' yela'a gan' zo'onə' ca yelə' bala'an de'en gwɔapa' catə'an gwzoa' len le' antslə ze'e xē yežlyo nga.

⁶ Bagwlejo' balə beṇač par chso'onlilaže'e nada' na' bablo'iga'acda'ane' naquən' naquə

yichjla'aždaogo'onə' na' naquən' chono'. Zjənaque' xi'ino', na' beno' par nič chso'onlilaže'e nada' na' chso'one' can' nono' mendadən'.

⁷ Na' bazjənezene' de que yoguə'əloj de'en chona' na' yoguə' dižə' de'en cho'a za'an che cuino'.

⁸ Babe'elena' lega'aque' dižə' de'en beno' mendad güe'elenga'aca'ane', na' bazjənonen čhəga'aque'. Na' bachsa'acbe'ine' de que de'e liczə gwza'a gan' zo'onə', na' chse'ejle'e de que len' əbselo'o nada'.

⁹ Čhəabda' le' gaquəleno' lega'aque'. Caguə čhəabda' le' gaquəleno' yoguə' beṇəčən', sino gaquəleno' beṇə' ca' zjənaquə xi'ino', beṇə' ca' gwlejo' par chso'onlilaže'e nada'.

¹⁰ Na' yoguə' beṇə' ca' chso'onlilažə' nada' zjənaque' xi'ino'. Na' ca'aczən' naquən, notə'atezə beṇə' zjənaquə xi'ino' leczə zjənaque' xi'ina'. Echzi'a yelə' bala'aṇ de'en chso'onlilaže'e nada' na' de'en chso'one' bichlə de'en chso'one'enə'.

¹¹ Na' ṇa'a caguə socha' yežlyo ngan', pero beṇə' quinga ṇitə'əcze' yežlyo nga. Nada' bazeza'a gan' zo'onə'. Xa', naco' le'ezelaogüe beṇə' la'aždao' xi'ilažə'. Na' ca' naquə beṇə' ca' gwlejo' par chso'onlilaže'e nada', bcuasə' bcue'ejga'aque' len de'e malən' por yelə' čhnabia' čhio'onə'. Bcuasə' bcue'ejga'aque' len de'e malən' par nič əsa'aque' tozə len ljuežjga'aque'enə' ca' čhio'o naccho tozə.

¹² Bedote žlac zoa' len lega'aque' babcuasə' bcue'ejga'aca'ane' len de'e malən' por yelə' čhnabia' čhio'onə'. De'e na'anə' ni toga'aque' cui gwžiai' sino tozə ben' banaquəczən cuiayi'e par nič gaquə complir can' na' Xtizo'onə' de'en nyojən.

¹³ Na' ṇa'a bazeza'a gan' zo'onə', na' cho'a dižə' quinga lao orasyonṇə' žlac ṇe'e zoa' yežlyo nga par

nich lega'aque' nitə'əchgüe' mbalaz ca mbalazən' zoa' nada'.

14 Nada' babe'elenga'aca'ane' xtižo'onə'. Pero na' beṇə' ca' cui zjənombia' le' chəsə'əgue'ine' beṇə' ca' chso'onlilažə' nada' por ni che de'en cuich zjənaque' txen len lega'aque', ca nada' cui naca' txen len beṇə' ca' cui zjənombia' le'.

15 Na' ca naquə beṇə' ca' chso'onlilažə' nada', caguə chṇabda' le' yeca'aga'aco'one' lao yežlyo ngan', sino chṇabda' le' par əgwcuasə' əgwcue'ejga'aco'one' len de'en chon gwxiye'enə'.

16 Bito zjənaque' txen len beṇə' ca' cui zjənombia' le' ca nada' cui naca' txen len beṇə' ca' cui zjənombia' le'.

17 Ben par nich beṇə' ca' chso'onlilažə' nada' so'on cuinga'aque' lažə' na'onə' laogüe de'en bazjənombi'e dižə' li chio'onə'. Yoguə'əlołte de'en babzejni'ido' lega'aque' naquən de'e li.

18 Len' bselo'o nada' yežlyo nga par chzejni'ida' beṇəchən' dižə' li chio'onə', na' leczə ca' nada' bach-selə'a lega'aque' par yoso'ozejni'ine' beṇəchən' dižə' li chio'onə'.

19 Zoa' chon cuina' lažə' na'onə' chedə' chacda' che beṇə' ca' chso'onlilažə' nada'. Na' chona' ca' par nich lega'aque' so'on cuinga'aque' lažə' na'onə' laogüe de'en bazjənombi'e dižə' li chio'onə'.

20 Na' ca naquə chṇaba' gaquəleno' beṇə' ca', bito chṇaba' gaquəleno' lega'acze' sino leczə gaquəleno' beṇə' ca' so'onlilažə' nada' catə' əse'enene' dižə' de'en əsoe' beṇə' ca'.

21 Xa', ben par nich yoguə'əlole' əsa'aque' tozə len ljuežjga'aque' ca le' naco' tozə len nada' na' nada' naca' tozə len le'. Ben ca əsa'aque' tozə laogüe

de'en zjəngode'e txen len chio'o, par niçh beṇə' ca' cui zjənombia' le' se'ejle'e de que len' əbselo'o nada'.

²² Babeno' par niçh chsa'acbe'i beṇə' de que noṇo' nada' yelə' bala'an, ca'aczən' chona' nada' par niçh chsa'acbe'ine' de que chnežjua' lega'aque' yelə' bala'an. Na' chona' ca' par niçh əsa'aque' tozə len ljuežjga'aque' ca chio'o naccho tozə.

²³ Lega'aque' zjəngode'e txen len nada' na' nada' ngoda'a txen len le' niçh yoguə'əcho gaccho tozə na' ca' beṇə' ca' cui zjənombia' le' yesə'ənezene' de que len' əbselo'o nada' na' de que chacdo' che beṇə' ca' zjəngodə' txen len nada' can' chacdo' chia'.

²⁴ Xa', bachacdo' chia' antslə ze'e xe yežlyo nga. De'e na'anə' beṇo' nada' yelə' chey che'eni'inə'. Na' che'enda' de que beṇə' ca' bagwlejo' par chso'onlilaže'e nada' nite'e len nada' gan' so'anə' par niçh yesə'əle'ine' yelə' chey che'eni' chia'anə'.

²⁵ Xa', le' naco' le'ezelaogüe beṇə' güen, na' ca naquə beṇə' ca' cui chso'onlilažə' nada' bito zjənombi'e le', pero nada' nombi'a le' na' beṇə' ca' bagwlejo' par chso'onlilaže'e nada' bazjənezene' de que len' əbselo'o nada'.

²⁶ Na' babena' par niçh zjənezene' can' naquə yichjla'aždaogo'onə' na' can' chono', na' ne'e gonchca' ca yesə'ənezene'. Chzejni'iga'acda'ane' can' naquə yichjla'aždaogo'onə' na' can' chono' par niçh əsa'acbe'ine' de que chacdo' chega'aque' can' chacdo' chia' nada' na' par niçh sotezə soa' len lega'aque'.

18

Jodən' bdie' Jeso'osən' lao na' soldad ca'

1 Na' ca beyož gwna Jeso'osən' de'e ca', neto' disipl che' gwza'ato' len le' gwyejto' šla'a yao Sedron gan' gotə' to güert, na' gwyo'oto' len le'.

2 Na' Jodən' ben' banaquən gone' Jeso'osən' lao na' beṇə' ca' chəsə'əgue'i le' nombi'e güertən', chedə' zan las bagwyejto' len Jeso'osən' lo'o güertən'.

3 Na' bχoz əblao ca' na' beṇə' fariseo ca' bososele'e xonj soldad na' len xa'ag yo'odao' ca' zja'aclene' Jodən' par jəsə'əxene' Jeso'osən' lo'o güertən'. Zja'aque' gan' zo Jeso'osən' zjənoxe'e lintern, yi' yech na' spad.

4 Jeso'osən' banezene' yoguə'əlol de'en gaquə che', nach bchoje' jəšague' lega'aque' nach gože': —¿Non' cheyiljle?

5 Na' gwse'ene': —Jeso'os beṇə' Nasaret.

Na' gož Jeso'osən' lega'aque': —Nada'anə'.

Na' len Jodən' lega'aque', ben' banaquən gone' Jeso'osən' lao na'aga'aque'enə'.

6 Na' catə' gože' lega'aque': “Nada'anə'”, le'e besyə'əbiguə'əte' gosxanlə na' gosə'əbixe' gwsa'ate'e lao yon'.

7 Na' de'e yoblə gože' lega'aque': —¿Non' cheyiljle?

Na' lega'aque' gosə'əze'ene': —Cheyiljto' Jeso'os beṇə' Nasaret.

8 Na' gwna Jeso'osən': —Bagwnia' le'e de que nada'anə'. Na' šə nadan' cheyiljle, le'e güe' latjə žjəya'ac beṇə' quinga.

9 Gože' ca' par niç goc complir can' gwne' de que ni to beṇə' ca' bagwlej Diozən' par chso'onlilaže'ene' cui yesə'əbiayi'e.

10 Na' Simon Bedən' no'e to spad na' golje'en gw̄chogue' nag l̄icha xmos beṇə' gwnabia' che b̄xoz ca'. Na' mosən' le' Malco.

11 Na' Jeso'osən' gože' Bedən': —Bego'o spad chio'onə' lo'o liže. ¿Echaquele gonle par nič cui chi' saca'a can' babsi' Xa'anə' x̄neze chi' saca'a?

Gosə'əche'e Jeso'osən' lao ben' le Anas

12 Nach soldad ca' len capitan chega'aque'enə' na' zjəlen x̄a'ag yo'odao' che n̄asyon Izrael cheton' gosə'əzene' Jeso'osən' na' bosə'ocheje'ene'.

13 Na' gosə'əche'ene' zgua'atec lao Anas xta'obin' che Caifasən'. Caifasən' naquəche' b̄xoz əblao che n̄asyon cheton' ca izən'.

14 Na' Caifas na'anə' babnežjue' beṇə' blao che n̄asyon Izrael cheton' consejon' de que napən lega'aque' cuent tozə ben' so'ote' lgua'a yesə'əbiayi' yogue'e len n̄asyon cheto'onə'.

Bedən' bito gw̄chebe' šə lene' Jeso'osən'

15 Simon Bedən' na' nada' jənaoto' Jeso'osən'. Na' nombia' b̄xoz əblaonə' nada'. De'e na'anə' goc gwyo'a len Jeso'osən' chyo'o che b̄xoz əblaonə'.

16 Na' Bedən' bega'ane' cho'a puertən' fuerlə. Na' bechoja' na' be'elena' no'olən' chapə cho'a puertən' dižə', nach gwlo'o no'olən' Bedən' chedə' nombia' b̄xoz əblaonə' nada'.

17 Nach no'olən' chapə cho'a puertən' gože' Bedən': —¿Ecaguə leno' len' naco' disipl che be'enə'?

Na' gwne': —Bito lena' nada'.

18 Na' mos ca' na' x̄a'ag yo'odao' ca' bagosə'əbeque' yi' ya'alj chedə' chac zag. Na' zjəzeche' cho'a yi'inə' par chəsyə'əže'ine'. Na'

len Bedən' zeche' len lega'aque' cho'a yi'inə' par cheže'ine'.

Gosə'əṅabene' Jeso'osən' che de'en chsed chlo'ine'

¹⁹ Na' bχoz əblaonə' gwṅabene' Jeso'osən' che neto' disipl che' na' che de'en chsed chlo'ine'.

²⁰ Nach Jeso'osən' gože'ene': —Nada' zaquə'əlao babi'a dižə' len beṅačən'. Syempr babsed blo'ida' lo'o yo'odao' checho ca' na' leczə ca' lo'o yo'odao' əblaonə' gan' chəsə'əžag yoguə' beṅə' Izrael gwlaž chechon'. Bito bi bi dižə' ne'e gua'a bgašə'əzə.

²¹ ¿Bixčen' chṅabdo' nada'? Gwṅabe beṅə' ca' bagwse'ene de'en babsed bablo'ida'. Lega'aque' zjənezene' bi dižə'ən babe'elenga'aca'ane'.

²² Gwde gwna Jeso'osən' ca', to xə'ag yo'odao' beṅə' zechan' gwdape'e xague'enə', nach gože'ene': —¿Eca' choži'o xtižə' ben' naquə bχoz əblaonə'?

²³ Nach gož Jeso'osən' le': —Šə bi de'e mal bagwnia', be' dižə' che bi de'e malən'. Na' šə gwnia' de'e güen, ¿bixčen' chgapo'o nada'?

²⁴ Nach Anasən' bdie' Jeso'osən' ncheje' lao Caifasən' ben' naquəch bχoz əblaonə'.

De'e yoblə Bedən' bito gwchebe' šə lene' Jeso'osən'

²⁵ Na' Bedən' ne'e zeche' cho'a yi'inə' par cheže'ine' na' beṅə' ca' zjəzecha na' gosə'əze'ene': —¿Ecaguə leczə lenon' naco' disipl che be'enə'?

Na' bito gwchebe', na' gwne': —Bito lena' nada'.

²⁶ To xmos beṅə' gwnabia' che bχoz ca' naque' family che ben' əgwčhog Bedən' nague', na' gože' Bedən': —¿Ecaguə zle'ida' le' len Jeso'osən' lo'o güertən'?

²⁷ Na' Bedən' de'e yoblə bito gwchebe', na' le'e gwchežte to lecw.

Gosə'əche'e Jeso'osən' lao Pilatən'

28 Na' do che'eni'ilas b̄xoz əblao ca' gosə'əbeje' Jeso'osən' gan' zo Caifasən' na' gosə'əche'ene' gan' chon Pilatən' yelə' jostisən'. Na' lega'aque' bito gwso'e len Jeso'osən' gan' chon Pilatən' yelə' jostisən' chedə' segon costombr chęga'aque' bito gaquə əsa'ogüe' de'e ca' gwso'one' par xše' l̄ni pascon' šə so'e l̄o'o yo'o che beṇə' ca' cui chəsə'ənao costombr chęga'aque' ca'.

29 De'e na'anə' Pilatən' bchoje' gan' nitə' beṇə' blao che ṇasyon Izrael cheton' na' gože' lega'aque': —¿Bi ben bengan'? ¿Ede bi de'e chaole xyā?

30 Na' gwse'ene': —Žalə' bengā cui naque' beṇə' mal bito əgwdeto'one' lao na'onə'.

31 Na' gož Pilatən' lega'aque': —Le'e yeche'e na' le'e gon yelə' jostis che'enə' segon lei chelen'.

Na' beṇə' blao che ṇasyon Izrael cheton' gwse'ene': —Bito bi lsens cheto' de par no gotto'.

32 Ca goquən' goc complir can' gwna Jeso'osən' bzejni'ine' naquən' gaquə so'ote'ene'.

33 Nach Pilatən' beyo'e gan' chone' yelə' jostisən', na' goxe' Jeso'osən' nach gože'ene': —¿Elen' naco' Rei che beṇə' Izrael ca'?

34 Jeso'osən' gože'ene': —¿Econ de'e babidzən yichjo'onə' nao' ca', o šə beṇə' yoblə gosə'əne' le' ca'anə'?

35 Pilatən' gože'ene': —¿Echacdo' naca' nada' beṇə' Izraelən'? Beṇə' gwlaž chio' ca' na' b̄xoz əblao chele can' boso'odie' le' lao na'a nga. ¿Bi de'e xinjən' beno'?

36 Nach Jeso'osən' goze'ene': —Nža'alə can' chnabia' nada' na' nža'alən' chəsə'ənabia' notə'ətezəchlə beṇə' gwnabia'. Yelə' gwnabia'

čhi'anə' bito za'an che beṇə' ža' yežlyo nga. Žalə' za'an che beṇə' ža' yežlyo nga beṇə' ca' chəsə'anabi'anə' yesə'ədile' par nič cui gaca' lao na' beṇə' Izrael gwlaž čhia' quinga. Pero yelə' chnabia' čhia'anə' bito za'an che yežlyo nga.

³⁷ Nach gož Pilatən' le': —¿Ena' rein' naco'?

Na' gwna Jeso'osən': —De'e lin' bagwnao' de que nada' naca' rei. Babida' yežlyo nga golja' par nič ṇabi'a na' par nič əgwzejni'ida' beṇə'čən' dižə' li che Diozən'. Beṇə' ca' bachoso'ozenag che dižə' li che Diozən' leczə choso'ozenague' čhia'.

³⁸ Nach gož Pilatən' le': —Cuili bin' naquə dižə' lin'.

Gosə'əchoglaogü'en so'ote' Jeso'osən'

Na' beyož gwna Pilatən' ca' bchoje' yetši'i gan' nitə' beṇə' blao che ṇasyon Izrael četon' na' gože' lega'aque': —Bito bi chla'alaon šə bi dolə'anə' napə benga.

³⁹ Na' ca naquə de costombr chele de que to beṇə' presən' gwsana' lao lni pascon', ¿əchene'ele gwsana' benga naquə Rei che le'e beṇə' Izrael?

⁴⁰ Nach gwso'osye'e gosə'əne': —Bito gwsano' be'ena'. Barrabas na' əgwsano'.

Len Barrabasən' naque' to beṇə' bguan.

19

¹ Nach ben Pilatən' mendad gosə'əyine' Jeso'osən'.

² Na' soldad ca' gwso'one' to coron de xis yešə' na' bosə'ožine'en yichje'enə'. Na' bosə'oguae'ene' to clas lachə' morad ca de'en chəsə'əčin rei ca'.

3 Na' gwo'onene' borl gosə'əne': —Biba Rei che beṇə' Izrael.

Na' gosə'əgape'e xague'enə'.

4 Nach Pilatən' bchoje' chyo'onə' de'e yoblə na' gože' beṇə' Izrael ca' ža'anə': —Na'a cueja'ane' par nič əṇezele ca xyan' de'en chaole che', ni to de'e xiṅj cui cheželda' šə bin' none'.

5 Na' bchoj Jeso'osən' chyo'onə', zo coron de yešə'anə' yichje'enə', na' nyaze' lachə' moradən'. Na' gož Pilatən' lega'aque': —Le'e ggüia, nga zecha be'enə'.

6 Na' bχoz əblao ca' na' xa'ag yo'odao' ca', catə' besə'əle'ine' le' gwso'osye'e gosə'əne': —jBde'e le'e yag corozən'! jBde'e le'e yag corozən'!

Pilatən' gože' lega'aque': —Le'e leche'e na' legwde'e le'e yag corozən' chedə' ca xyan' chaole che', ni to de'e xiṅj cui cheželda' šə bin' none'.

7 Na' gwse' beṇə' blao che nasyon Izrael cheton' le': —Segon lei cheto' de'en de cheyalə' gotchone' chedə' ne' naque' xi'iq̄ Dioz la'anə'əczə naque' con to beṇə'chzə.

8 Bachžeb Pilatən' ca de'en bachaquən', na' catə' benene' gosə'əne' ca' che Jeso'osən' nachlə bžebəche'.

9 Nach beyo'o Pilatən' len Jeso'osən' de'e yoblə gan' chone' yelə' jostisən'. Na' gože' Jeso'osən': —¿Ga beṇə' le'?

Pero Jeso'osən' bito boži'e xtiže'enə'.

10 Nach Pilatən' gože'ene': —¿Ecuí choži'o xtiža'anə'? ¿Ecuí nezdə'onə' nada' napa' yelə' chnabia' par gwsana' le' na' napa' yelə' chnabia' par əgwda' le' le'e yag corozən'?

¹¹ Jeso'osən' gože'ene': —Bito bi yelə' gwnabia' napo' len nada' žalə' Diozən' cui nonē'en le'. Na' ben' əbde nada' lao na'onə' dolə' xench nape' cle ca le'.

¹² Nach gwdiljlažə' Pilatən' naclə gone' əgwsane'ene'. Pero beṇə' blao che nasyon Izrael cheton' gwso'osye'e gosə'əne': —Šə əgwsano' bengā, contr Rei Sesar nan' gono' šə ca'. Notə'əteza beṇə' ne' de que naque' rei, contr Rei Sesarən' chone'.

¹³⁻¹⁴ Nach Pilatən' beyož benene' de'en əgwse' beṇə' ca' le', gwleje' Jeso'osən' chyo'onə'. Na' leczə bchoj le' chyo'onə' gan' nao yej, gan' nzi'in dižə' ebreo Gabata. Na' gwchi'e gan' chbi'e catə' chone' yelə' jostisən'. Nach gože' beṇə' blao che nasyon Izrael cheton': —Nga zo Rei chelen'.

Na' do gobiž catə'an gože' lega'aque' ca', na' beṇə' Izrael gwlaž cheto' ca' choso'osi'ini'e par lni pas-con' žanə'.

¹⁵ Nach lega'aque' gwso'osye'e gosə'əne': —ǰGwcue'e! ǰBde'e le'e yag corozən'!

Na' gož Pilatən' lega'aque': —ǰErei chele nga gona' mendad yoso'ode'ene' le'e yag corozən'?

Nach bχoz əblao ca' gwse'ene': —Caguə rei cheto' bengā. Tozə Sesarən' naque' rei cheto'.

¹⁶ Ca' goquən' bdie' Jeso'osən' lao na'aga'aque'enə' par te'e le'e yag corozən'.

Boso'ode'e Jeso'osən' le'e yag corozən'

¹⁷ Nach gosə'əche'e Jeso'osən' fuerlə syodan' gan' boso'oda' soldad ca' le' le'e yag corozən'. Latjən' nzi'in Golgota dižə' ebreo, zejen dižə' latjə che yichj beṇə' guat. Na' gwze'e zde' noa' coroz che'enə'.

18 Na' Golgota na' boso'ode'ene' le'e yag corozən'. Na' len yechopə beṇə' yoblə boso'ode'e le'e yechopə yag coroz tgüje' cuite'enə', Jeso'osən' gwyo'e gw-chol.

19 Na' Pilatən' bene' mendad byoḷ to chopə letr de'e gwda' yichj yag coroz che Jeso'osən', boso'ozoje'en nan: "Jeso'os beṇə' Nasaret, Rei che beṇə' Izrael."

20 Boso'ozoje'en dižə' ebreo, dižə' griego na' dižə' latin. Na' zan beṇə' Izrael gwlaž cheton' boso'olabe' de'enə' byoḷən', chedə' gan' gwda' Jeso'osən' le'e yag corozən' naquən galə'əzə syo-dan'.

21 De'e na'anə' beṇə' ca' zjənaquə bχoz əblao che nasyon Izrael cheton' gwse'e Pilatən': —Bša'an par nich cui nan de que naque' rei che neto' beṇə' Izrael, sino nan de que len' gwne' naque' rei cheto'.

22 Na' Pilatən' gwne': —De'en bena' mendad boso'ozoje', banyoḷənnə'.

23 Nach soldad ca', beyož boso'ode'e Jeo'osən' le'e yag corozən' gosə'əzi'e xalane'e ca' na' gwso'one'en taplə, to part güejən gosə'əzi'e. Na' leczə ca' gosə'əzi'e xe'enə' de'en naquə ca' xadoṇ cha'o. Pero lachə'anə' naquən de to golizə. Bito bi dia nyazən.

24 Na' gwse'e ljuežje': —Bito əgwzoxjchon' sino gonchon rif. Yešč no yechelən.

Na' gwso'one' ca' par nich goc can' nyoj Xtižə' Diozən' gan' nan: "Yosyo'ole'e xalana'anə' entr lega'aque' na' so'one'en rif." Na' ca'anə' gwso'on soldad ca'.

25 Na' cuit coroz che Jeso'osən' zecha xne'enə' len beṇə' bile'enə' na' len Maria no'ol che Cleofas na' Maria beṇə' Magdala.

26 Na' catə' Jeso'osən' ble'ine' zecha xne'enə' galə'əzə na' nada' zecha' cuite'enə', nach gože'ene': —Naogüe, benga gaque' ca xi'ino'.

27 Nach gože' nada': —Bži'ilažə' xna'a nga ca xna'onə'.

Na' lao žanə' nada' gwcua'ane' bena'ane' ca family chia'acza'.

Can' goquə catə'an got Jeso'osən'

28 Jeso'osən' nezene' de que bačh goc yoguə'əloł de'en cheyalə' gaquən. Na' par ničh gaquə can' na Xtižə' Diozən' de'enə' nyojən gwne': —Chbilda' nis.

29 Na' de latə' bino corrient de'e yožə to lo'o xguaguə dao'. Na' to beṇə' bosgaže'e to sponj len bino corrientən' na' bosšine'en cho'a Jeso'osən' bso'en to lao xis de'en ne' isopo.

30 Na' beyož gwxop Jeso'osən' bino corrientən' gwne': —Bačh goc yoguə'əloł de'en cheyalə' gaquən'.

Na' bchequə' yičhje'enə' gote'.

To soldadən' gode'e lanz cuit le'e Jeso'osən'

31 Nach beṇə' blao che nasyon Izrael cheton' gosə'əṇabene' Pilatən' gone' mendad yesə'əyišjw soldad ca' ni'a beṇə' ca' zjəda' le'e yag corozən' ničh yob sa'ate' par ničh ca' yesyə'əque'e lega'aque'. Bito gwse'enene' yesyə'əga'an cuerp ca' le'e yag corozən' xte yeteyo, chedə' yeteyon' naquən ža dezcanz na' ža lṇi xen.

32 Nach Pilatən' bene' mendad ja'ac soldad ca' na' gosə'əyišjue' chopə la'a ni'a ben' boso'ode'e to šla'a cuit Jeso'osən'. Na' leczə ca' gwso'one' len ben' gwda' le'e yag corozən' cuite'en yešla'a.

33 Na' catə' besə'əžine' gan' da' Jeso'osən', besə'əle'ine' bagote', na' bito gosə'əyišjue' n̄i'e ca'.

34 Pero to soldadən' gode'e lanzən' cuit le'e Jeso'osən', na' le'e bchojten chen len nis.

35 Nada' ble'ida' can' goquən' na' nezda' de que dižə' de'en cho'a naquən de'e li. Na' cho'a dižə'əna' par nič lenczə le'e šejle'ele.

36 Goc ca' par nič goc complir can' na Xtižə' Diozən' de'en nyojən gan' nan: "Ni to žit yo'e cui yesə'əyišjue'."

37 Na' len yeto gan' nan: "Yoso'ogüie' ben' əgwsa'ade'e lanzən'."

Boso'ocuaš'e Jeso'osən'

38 Na' gwde na' Jwse beṇə' Arimatea gwṇabene' Pilatən' gwnežjue' lsens yeque'e cuerp che Jeso'osən'. Na' Pilatən' be'e lsens. Nach gwyej Jwsen' na' beque'e cuerpən'. Jwsen' naque' disipl che Jeso'osən' pero bgašə'əzə por ni che bžebe' beṇə' blao che n̄asyon Izrael cheton'.

39 Na' leczə gwyejlen Nicodemon' le' ben' bagwyej antslə gan' zo Jeso'osən' to še'elə. Na' Nicodemon' no'e to de'e chl̄a' zix de'e none' len mirra na' aloes, ca do tapa robən'.

40 Na' boso'ochele' cuerp che Jeso'osən' sint de lachə' na' len de'en chl̄a' zixən', ca costombr che neto' beṇə' Izrael catə'ən chcuašə'əto' beṇə' guat.

41 Na' galə'əzə gan' gwso'ote' Jeso'osən' le'e yag corozən' gotə' to güert. Na' lo'o güertən' bazo to bloj ba de'e cobə de'e bagwche'en Jwsen' le'e yej ga cuiczə no beṇə' guat ne'e šo'o.

42 Na' boso'ocuaše'e Jeso'osən' lo'o bloj banə' laogüe de'e zon galə'əzə chedə' chsa'acbyenene' por ni che de'e naquə yeteyo ža dezcanz na' ža xen che lni pascon'.

20

Beban Jeso'osən' ladjo beṇə' guat ca'

1 Na' bal dmigw Maria beṇə' Magdalan' gwyeye' cho'a bloj ban'. Na' ble'ine' yejən' da' cho'inə' babga'an.

2 Nach beza'adoe' beyede' ga'an zoto' len Simon Bedən', nach gwne' neto': —Babesyə'əbeje' Xanchon' lo'o ban', na' bito nezecho galə besyə'əyo'ene'.

3 Nach gwza'ato' len Bedən' gwyejto' cho'a bloj ban'.

4 Chopteto' gwsa'adoto' pero nada' gwsa'adocha' ca Bedən' na' zgua'atec nada' bžina'.

5 Na' bcheca'a bgüia' lo'o ban' na' ble'ida' lachə' ca' gan' zjəchi'in, pero bito gwyo'a.

6 Le'e bla'ate Simon Bedən' na' le' gwyo'e lo'o ban' na' leczə ble'ine' lachə' ca' gan' zjəchi'in.

7 Na' bey de'en bosyo'oguazje' laogüe'enə' bito lenən lachə' ca' yela', ndobən chi'in ca'alə.

8 Na' la'aṇə'əczə nadə'əteca' byob bžina', gwdechlä gwyo'a lo'o ban', na' catə' ble'ida' de'e ca' gwyejli'a de que beban Jeso'osən'.

9 La' ca orən' bito ne'e šejni'ito' Xtižə' Diozən' de'enə' nyojən nan de que yeban Jeso'osən' ladjo beṇə' guat ca'.

10 Na' beza'ato' beyej ližto'.

Maria beṇə' Magdalan' ble'ine' de que mbanczə Jeso'osən'

11 Na' Marian' bega'ane' chbeže' cho'a bloj ban'. Na' lao chbeže'enə' bcheque'e bgüie' lo'inə'.

12 Na' ble'ine' chopə angl zjənyaze' lachə' šyiš zjəchi'e lo'o ban', toe' chi' zda yichjlei na' yetoe' chi' zda xni'alei gan' gotə' cuerp che Jeso'osən'.

13 Nach gwse'e no'olən': —¿Bixchen' chbežo' no'olə?

Na' le' boži'en gože' lega'aque': —Chedə' babesyə'əyo'e Xana'anə', na' cabi nezda' galə jəsyə'əsane'ene'.

14 Ca beyož gwna Marian' ca', gwyečje' bgüie' traslə na' ble'ine' Jeso'osən' zeche' cože'enə', pero bito beyombia' Marian' le'.

15 Nach gož Jeso'osən' le': —No'olə ¿bixchen' chbežo'? ¿Non' cheyljo'?

Na' Marian' bene' xbab de que ben' chapə güert na'anə', na' gože'ene': —Šə le' babeyo'one'enə', gwna nada' galə jəyesano'one'enə' na' nada' yeyo'ane'.

16 Jeso'osən' gože' le': —Maria.

Na' Marian' gwyečje' de'e yoblə na' gože'ene': —Raboni—, naquən dižə' ebreo na' zejen Maestr.

17 Jeso'osən' gože' le': —Bito goxo'o nada', la' bito ne'e yeyepa' ga'an zo Xa'anə'. Beyej lao disipl chia' ca' yela' beṇə' ca' zjənaquə ca biša'a na' zana' na' gožga'aque' de que yeyepa' ga'an zo Xa'anə', ben' leczə naque' Xale. Naque' Dioz ben' cho'elaogua'a na' leczə naque' Dioz ben' cho'ela'ole.

18 Nach beza' Maria beṇə' Magdalan' bedəyedixjue'ine' neto' disipl de que bable'ine'

Ḫanchon'. Na' be'elene' neto' dižə' de'en gož Jeso'osən' le'.

Disipl che Jeso'osən' besə'ale'ine' de que mbancze'

¹⁹ Na' ca beḵjw že' ža dmigon' neto' displ che' nžagto' txen. Na' zjənyeyjw puert ca' por ni che de'en bžebto' beḵə' blao che nasyon Izrael cheton'. Catə'əczla goche'ito' bazecha Jeso'osən' gwchołto'onə'. Nach gože' neto': —Leso binlo len xbab de'en yo'o lo'o yichjla'ažda'olen'.

²⁰ Ca beyož gwne' ca' blo'ine' neto' lo'o taque'e ca' na' cuit le'enə'. Na' bebeito' ble'ito' Ḫanchon'.

²¹ Nach goze'e neto' yetši'i: —Leso binlo len xbab de'en yo'o lo'o yichjla'ažda'olen'. Can' bselə' Ḫa'anə' nada' yežlyo nga par chona' xšine'enə', ca'aczən' əchseła'a le'e par gonle xšina'anə'.

²² Beyož gwne' ca' blobe' neto' nach gože' neto': —Le'e si' Spirit che Diozən'.

²³ Beḵə' ca' yesyə'ədinje xtolə'əga'aque'enə' naple yelə' chnabia' par ye'ega'aclene' de que bagwnitlaon. Pero beḵə' ca' cui yesyə'ədinje xtolə'əga'aque'enə' naple yelə' chnabia' par ye'ega'aclene' de que bito nitlaon.

Tomasən' ble'ine' de que mban Jeso'osən'

²⁴ Na' Tomas ben' bososi'e Didimo laogüe de'en naque' beḵə' cuaš, lene' neto' šižinto', pero bito zoe' len neto' catə'an bedəyelo'elao Jeso'osən'.

²⁵ Na' neto' gožto'one': —Bable'ito' Ḫanchon'.

Nach Tomasən' gože' neto': —Xte que le'ida' taque'e ca' na' əgwzebə xbenanə' gan' gwdebə clab ca', na' əgwzebə nanə' cuit le'enə', nach šejli'a.

²⁶ Gozde to xman zezzoto' lo'o yo'onə' de'e yoblə, na' zo Tomasən' len neto'. Na' lecə zjənyeyjw

puert ca', catə'əc̣zla bezla' Jeso'osən' na' gozzeche' gwcholto'onə', na' gwne': —Leso binlo len xbab de'en yo'o lo'o yichjla'ažda'olen'.

²⁷ Nach gože' Tomasən': —Bgüia lo'o taca'a quinga na' bzeb xbeno'onə'. Na' bzeb na'onə' cuit li'a nga par nič šejli'o. Na' cui gaco' to beṇə' cui chejle'.

²⁸ Nach Tomasən' gože'ene': —Xana', na' Dioz chia'.

²⁹ Nach gož Jeso'osən' le': —Xte que ble'ido' nada' nach gwyejli'o. Mbalazəch len beṇə' cui yesə'əle'i nada' na' se'ejle'e.

Libr nga nyojən par nič šejle' beṇə' de que Jeso'osən' naque' Xi'in Dioz

³⁰ Na' de'e zan milagr de'e ben Jeso'osən' gan' zoto'onə' pero bito bzojga'aca'an nga.

³¹ Pero zjənyoj de'e quinga par nič sotezə sole šejle'ele de que Jeso'os na'an Xi'in Diozən' ben' gwlej Diozən' par gaquəlene' beṇəchən', na' par nič gata' yelə' mban zejlicane chele laogüe de'en chonlilažə'əlene'.

21

Jeso'osən' blo'elaogüe' gažə disipl che' ca'

¹ Gwde goc de'e ca', Jeso'osən' bozloe' laogüe' neto' disipl che' yetši'i cho'a nisdao' Galilea de'en leczə nzi' Tiberias. Quinga blo'elaogüe' neto':

² Txen zoto'onə' Simon Bedən', len Tomasən', na' Natanaelən' na' nada' na' beṇə' biša'a na' yečhopə disiplən'. Natanaelən' naque' beṇə' Cana, to yež de'e chi' gan' mbane Galilean'. Na' Tomasən' de'en naque' beṇə' cuaš nachən' bososi'ene' Didimo.

³ Simon Bedən' gože' neto': —Ša'ayetošca' gwɣxen bel.

Na' gožto'one': —Leczə gwza' neto'.

Nach gwza'ato' gwyejto' cho'a nisdə'onə' na' gwyo'oto' to lo'o barcw. Pero že'enə' cuiczə no no bdole'eto'.

⁴ Na' che'eni'ilas bla' Jeso'osən' cho'a nisdə'onə' pero na' neto' bito beyombi'ato' šə le'enə'.

⁵ Jeso'osən' gwne' zižjo gože' neto': —Xi'inda'ogua'a ɷgaŋ bel ya'a gaocho?

Na' boži'ito' xtiže'enə' gožto'one': —Notono de.

⁶ Nach gože' neto': —Le'e gwzalə' yixjw bel chelen' cuit barcon' lichalə na' əželeleb.

Nach bzalə'əto' yixjw bel cheto'onə' na' xte caguə gwzoito' yecueto'on lo'o barcon' tant bel zan gwža' lo'inə'.

⁷ Nach nada' goža' Bedən': —Xancho na'anə'.

Nach Simon Bedən' cate goža'ane': “Xancho na'anə'”, le'e beyacwte' xalane'enə', la' de'e cho'o lo'olzən' nacue' par niç chone' žinŋə', na' le'e bexitə'əte' lao nisən' par niç byob bežine' gan' zo Jeso'osən'.

⁸ Na' neto' zeyo'oto' lo'o barcw da'onə' ze'e zenxobəto' yixjw belən' gan' ža' bel ya'a ca'. Caguə nactequəch zitə' cho'a nisdə'onə', ca do yeto gueyoa metrən'.

⁹ Na' catə' bežinto' cho'a nisdə'onə' beyetjto' lo'o barcon' na' ble'ito' chi' yi' ya'aljən' na' xoa to bel ya'a laogüen', na' len yet.

¹⁰ Jeso'osən' gože' neto': —Le'e yeyoxə' la' bel ya'a ca' ze'e gwxenle nilə.

¹¹ Na' Simon Bedən' gwyeje' gan' chi' barcon' na' jəyeseže' yixjw belən' gan' nchejən. Nach

bexobəto'on yo bižlə. Na' ža'an to gueyoa ši'inəyon bel xen. Na' bito gwchezə yixjon' la'anə'əczə bia zannə' gwža' lo'inə'.

¹² Jeso'osən' gože' neto': —Le'e da gaole xsil.

Na' ni toto' cui beyaxjeto' ye'eto'one': “¿No le?” la' gocbe'ito' de que Xancho na'aczənə'.

¹³ Jeso'osən' bgüigue'e gwxi'e yetən' na' beņe' che čheto'. Na' leczə ca' bene' len belən'.

¹⁴ De'e nga beyon las blo'elao Jeso'osən' neto' disipl che' lao bebane' ladjo beņə' guat ca'.

Jeso'osən' be'elene' Simon Bedən' dižə'

¹⁵ Na' ca bedaoto'onə' Jeso'osən' gože' Simon Bedən': —Simon xi'in Jonas ¿əchaquəchdo' čhia' can' chsa'aque beņə' quinga čhia'?

Na' boži'en gože': —Xana' le' nezdə' de que chacda' čhio'.

Jeso'osən' gože' le': —Bsed blo'i beņə' ca' ze'e gwzolao chso'onlilažə' nada'.

¹⁶ Na' de'e əgwchop lase goze'ene': —Simon xi'in Jonas ¿əchacdo' čhia'?

Na' Bedən' gože'ene': —Xana' le' nezdə' de que chacda' čhio'.

Jeso'osən' gože' le': —Bgüia bye beņə' ca' chso'onlilažə' nada'.

¹⁷ De'e əgwyon lase gože'ene': —Simon xi'in Jonas, ¿əchacdo' čhia'?

Na' Bedən' gocchgüeine' de'e gože'ene' de'e gwyon lase: “¿Echacdo' čhia'?” Na' gože' le': —Xana' le' neze nle'ido' yoguə'əlo'. Le' nezdə' de que chacda' čhio'.

Jeso'osən' gože' le': —Bsed blo'i beņə' ca' chso'onlilažə' nada'.

18 De'e li əchnia' le' catə' goco' beṇə' güego' cuino' bočej doxpeyo'onə' na' gwyejo' con ga nazən čhio'. Pero catə' gaco' beṇə' golə, əgwli na'onə' na' beṇə' yoblə yočheje' doxpeyo'onə' na' yesə'əche'e le' ga cui che'endo'.

19 Na' de'en gože'ene' ca' zeje dižə' de que Bedən' gone' ca si' Diozən' yelə' bala'an ca de'en gaquə Bedən' lao na' beṇə' mal ca' par so'ote'ene'. Gwde gwna Jeso'osən' can' gaquə che Bedən' nach gože' Bedən': —Da len nada'.

Jeso'osən' goquene' che Juannə'

20 Na' beyechj Bedən' ble'ine' nada' naogua' lega'aque' na' bene' xbab can' chaque Jeso'osən' čhia', la' nada'an gwchi'a cuit Jeso'osən' žen' gwdaoto' xše'enə' txen catə'an goža'ane': “Xana', ĵnox-aczxən' əgwde le' lao na' beṇə' ca'?”

21 Nach Bedən' gože' Jeso'osən': —Xana' ĵnac gaquə che benga?

22 Jeso'osən' gože' le': —Šə che'enda' ne'e zoczə benga xte catə'an yida' yetlas ĵbixa zedən' chaco'? Con gwzotezə gwzo benlilažə' nada' na' bzenag čhia'.

23 De'e na'anə' gwditj dižə'anə' entr beṇə' ca' chso'onlilažə' Cristən' de que nada' bito gata'. Pero Jeso'osən' caguə gože' Bedən' cui gata'anə' sino gože'ene': “Šə nada' che'enda' ne'e zoczə' xte catə'an yida' yetlas ĵbixa zedən' chaco'?”

24 Nada'an naca' disiplən' ben' goquene' chei na' nezdə' can' goquə yoguə' de'e quinga babzoja'. Na' lecə' le'e nezczele de que dižə' lin' cho'a.

25 Zanch de'e de de'e ben Jeso'osən' de'e cui
zjənyoj. Žalə' zjənyoj yoguə'ən na' tgüejə tgüejən libr
zan juisy zjəde žalə' ca'.

De'e na'azən' chzoja'.

**Testament Cobə de'en choe' dižə' che ancho
Jesocristən'
New Testament in Zapotec, Yatzachi (MX:zav:Zapotec,
Yatzachi)**

copyright © 1971 Wycliffe Bible Translators, Inc.

Language: Zapotec, Yatzachi

Translation by: Wycliffe Bible Translators, Inc.

Zapoteco, Yatzachi [zav], Mexico

Copyright Information

© 1971, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Yatzachi

© 1971, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022
d439ce34-67af-5db7-b82c-f44ad9932db2